


Л. В. Барышева,  
А. С. Мозымова

Ками кыб кузя  
изложенияслои  
сборник

I — III-бд классын  
велбдчысьяслы

Коми  
книжнй  
издательство  
1983





Учительяслысь тодомлунъяс кыпöдан  
Коми республиканской институт

Л. В. БАРЫШЕВА да А. С. МОЗЫМОВА

КОНТРОЛЬНЫЙ  
ЭКЗЕМПЛЯР

*Коми кыв кузя  
изложенияслön  
сборник*

1—III-öд КЛАССЫН ВЕЛÖДЧЫСЬЯСЛЫ

Коймöд издание

Сыктывкар  
Коми книжной издательство  
1983



## Водзны

Сборник лосьдёма начальнй классъясн уджалысь учительяслы. Сборникö пыртöма статьяссö роч да коми писательяслön произведениясысь, газетъясысь да журналясысь, а öткымынъясöс авторъяс лосьодисны асьныс.

Став материалсö юклöма классъяс вылö. Быд статья помö сетöма кывъяс, кодъясöс колö учительлы объяснитны да гижны дöска вылö.

Первой класслы текстъяс помö сетöма вопросъяс, а мöд да коймöд классъяслы — план. Сыысь кындзи, уна висът помö сетöма задание, кöни индöма, кутшöм удж бурджык нуöдны сйö либö мöд текст кузя. Шуам, висътавны содержаниясö, гижны изложение веськыд сёрнитöг либö веськыд сёрни пыртöмön, однороднй членъясön либö натöг да мукöд пöлöс уджъяс.

Сборникын материалсö сетöма медясö изложение гижöм вылö. Но эмöсь гырысь текстъяс, кодъясöс колö сöмын план серти висътавны. Например: «Будённйлön ус», «Тöлын вуграсьöм», «Щорс йылысь висът» да мукöд.

Быд классын изложение нуöдсьö разнй ногön.

Первой классын мöд во джынйын колö нуöдны нин изложение. Танй челядь гижöны сöмын вопросъяс вылö öтветъяс. Вопросъяссö колö водзвыв гижны дöска вылö, кывъясылысь гижанногсö объяснитны да гижны дöска вылö жö, петкöдлыны, кыдзи найöс колö вуджöдны öти строкаысь мöдö.

Мöд классын челядь первой велöдчöны гижны вопросъяс вылö öтветъяс сйö кывъясön, кодъяс эмöсь вопросъясас. Сэсся вопросъяс вылö öтветъяссö гижöны мукöд кывъяс содталöмön. И медбöрын, öти вопрос вылö велöдчысыяс öтветитöны некымын предложениеön.

Коймöд классын челядьöс колö велöдны гижны подробнй изложение. Подробнй изложение нуöдсьö таdzi:

1. Учитель лыддьö текстсö да нуödö беседа.
2. Лосьодöны план.
3. Уджалöны кывъяс да кыв сочетанияяс вылын.
4. Учитель лыддьö текстсö выль пöв да гоз-мöд велöдчысь висъталöны текстлысь содержаниясö.

## 5. Велодчысьяс гижоны изложение.

Первой да мөд классъясса велодчысьяслы учитель сетө гөтөвөй план. Коймөд классын плансө лөсьөдөны коллективнөя, поэь тшөктыны лөсьөдны сійөс велодчысьяслы аслыныс.

Плансө поэь лөсьөдны разнөй ногон: вопросительнөй, повествовательнөй да назывнөй предложениеясөн. Медся кокни план лөсьөдны вопросительнөй предложениеясөн (первой да мөд классъясын плансө колө лөсьөдны вопросительнөй предложениеясөн).

Сборникын текстъяссө сетөма тырмымөн, сы вөсна учитель вермас бөрийны сэтшөм текстъяс, кодъяс медся ёна лөсялөны велөдан темалы.

## 1 класс

### Миян класс.

Миян классным ыджыд да югыд. Дежурнойяс пыр следитоны пöрадок бöрся. Миян классын уна цветъяс. Найöс ми асьным садитим.

Кы в ъ я с: *следитны, пöрадок, цветъяс.*

#### Вопросъяс.

1. Кутшöм миян классным?
2. Мый вöчöны дежурнойяс?
3. Мый эм классын?
4. Коді садиталис цветъяссö?

### Чери.

Вокыскöд Витя муніс чери кыйны. Налы шедіс уна чери. Асывнас мамыс пöжаліс черинянь.

Кы в ъ я с: *шедіс, черинянь.*

#### Вопросъяс.

1. Кодкöд Витя муніс чери кыйны?
2. Уна-ö чери шедіс налы?
3. Мый пöжаліс мамыс?

### Ичöt ур.

Маша ордын оліс ур. Урсö Машалы пöдаритісны детинкаяс. Ур быдмис. Маша лэдзис сійöс вöрö. Ена радліс ур!

Кы в ъ я с: *лэдзис, сійöс,*

### **Вопросъяс.**

1. Коді оліс Маша ордын?
2. Коді пōдаритіс Машалы урсō?
3. Кытчō лэдзис сійōс Маша?

### **Задание.**

Висьталōй, кутшōм зверъяс олōны миян вōръясын.

## Кык пу.

Таня да Алēнка локтісны школаō. Пионеръяс сетісны налы кык пу. Пуяссō нывкаяс садитісны школа дворō.

Кы в ъ я с: *пионеръяс, пуяссō.*

### **Вопросъяс.**

1. Кытчō локтісны Таня да Алēнка?
2. Мый сетісны налы пионеръяс?
3. Кытчō найō садитісны пуяссō?

## Вōрын.

Челядь мунісны вōрō. Вера да Люба вотісны оз. Надя да Таня пырисны вōрō. Сэні быдмисны цветъяс. Нывкаяс чукōртісны мича цветъяс.

Кы в ъ я с: *чукōртісны, сэні.*

### **Вопросъяс.**

1. Кытчō мунісны челядь?
2. Мый вотісны Вера да Люба?
3. Мый чукōртісны Надя да Таня?

## Ёртъяс.

Володя да Сеня мунісны ю дорō. Детинкаяс кутісны вуграсьны. Сеня кыйис ёкыш. А Володялы шедіс сир. Черияссō детинкаяс пуктісны ōти дозйō.

Кы в ъ я с: *ёкыш, сир.*

### **Вопросъяс.**

1. Қытчө мунісны Володя да Сеня?
2. Мый кутісны вөчны детинкая?
3. Мый кыйис Сеня?
4. Мый шедіс Володялы?

### **Задание.**

Висьталөй, кутшөм черияс олөны миян юясын.

## Катя да Маша.

Асывнас Катя муніс тшак вотны. Съөрсьыс сійө босьтіс Машаөс. Маша вөлі ичөтик. Қовмис вуджны паськыд шор. Катя көшельөдіс Машаөс да вуджис шор вомөн.

*Л. Толстой* серти.

Қы в ъ я с: *тшак, вуджны.*

### **Вопросъяс.**

1. Қытчө муніс Катя?
2. Көдөс сійө босьтіс съөрсьыс?
3. Мый қовмис налы вуджны?
4. Қызди Катя вуджөдіс Машаөс шор вомөн?

### **Задание.**

Точкаяс местаө гижөй колана букваяс: мун...с, с...йө, босьт...с, вөл... , ичөт...к.

## Катшыс пон.

Ывлаын котраліс Катшыс пон. Челядь вөчисны сылы чом. Чомйыс артмис лөсьыд. Сэтчө вольсалісны важ эшкын. Шоныд лои Катшыслөн чомйыс.

*«Пионерской правда»* газетысь.

Қы в ъ я с: *чом, эшкын, вольсалісны.*

### **Вопросъяс.**

1. Көні котраліс Катшыс?
2. Мый вөчисны челядь?
3. Кутшөм лои чомйыс?
4. Коді сэні кутіс овны?

## Медся бур.

Живой уголокын эмось зверьяс, лэбачьяс, черьяс. Сэни оліс весиг ур. Но челядь медся ёна радейтісны Шарик понйос. Сійо вöлі зэв кывзысьсы да бур.

«Пионерской правда» газетысь.

Кы в ъ я с: *лэбачьяс, кывзысьсы.*

### Вопросьяс.

1. Кодьяс олоны живой уголокын?
2. Кодос медся ёна радейтісны челядь?
3. Мыйла найо радейтісны понйос?

### Заданиеяс.

1. Висьталой, кутшом животнойяс эмось гортаньд.
2. Точкаяс местаас гижой колана букваяс: л...бачьяс, з...в, рад...йтисны.

## Ёж.

Сашалы да Машалы подаритисны мичаник ёжос. На ордын сійо оліс гожомбыд. Ёж велалис челядь дино. Найо зэв ёна радейтісны ёжос. Челядь вердісны сійос няньон да йолон.

М. Быкова серги.

Кы в ъ я с: *гожомбыд, няньон.*

### Вопросьяс.

1. Кодьяслы подаритисны ёжос?
2. Қони сійо оліс гожомбыд?
3. Код дино велалис ёж?
4. Кодос радейтісны челядь?
5. Мыйон найо вердісны ёжос?

## Коньки.

Мам меным нёбис коньки. Ме вöлі зэв рад. Конькиаси да петі ывлао. Воськовті, и пыр жо уси. А лун-мод мысти ме бура нин кужи иславны конькион.

Кы в ъ я с: *коньки, воськовті, лун-мод,*

### **Вопросъяс.**

1. Мый ньобис мамыс?
2. Кытчö петис зонка?
3. Кыдзи сийö ислалис конькион первойсö?
4. Кор сийö велалис иславны конькион?

### **Заданиеяс.**

1. Висьталöй, эм-ö тiян сиктын (либö карын) каток.
2. Кöни тi ислаланнуд төвнас?

## Школаö мунтöдз.

Люся чеччö водз. Вöчö зарядка. Мыссьö да весалö пиньсö. Идралö ассъыс крöватсьö. Шыльöдö юрсисö. Завтракайтö. Завтракайтöм бöрын пасьталö школьной форма. Сэсся пальтоасьö да муно школаö.

Кы въяс: *чеччö, зарядка, мыссьö, ассъыс, пальтоасьö.*

### **Вопросъяс.**

1. Кор чеччö Люся?
2. Мый сийö вöчö чеччöм бöрас?
3. Кытчö сийö муно завтрак бöрын?

## Детскöй сад.

Частö октябрията ветлывлöны совхозса детскöй садйö. Найö вöчалöны челядьлы чачаяс, ворсöны накöд. Лöсьыд ворсны посни челядькöд.

Кы въяс: *октябрията, детскöй сад, посни.*

### **Вопросъяс.**

1. Кытчö ветлывлöны октябрията?
2. Мый найö вöчöны детскöй садйын?

### **Задание.**

Висьталöй, ветлывланнуд-ö тi детскöй садйö. Ветлывланнуд кö, мый сэни вöчаннуд?

## Гожся асылын.

Водз асыв. Вөр сайысь тыдовтчис шонді. Ловзис вөр. Мөдісны сывны лэбачьяс. Заводитісны уджавны став вөрса олысьяс.

Кы в ъ я с: *вөр сайысь, вөрса олысьяс.*

### **Вопросъяс.**

1. Кытысь тыдовтчис шонді?
2. Мый кутісны вочны лэбачьяс, вөрса олысьяс?

## Совхозлы отсөг.

Совхозлөн муыс паськыд. Сэні быдмө быд сикас пуктас. Гожомнас ми киськалім капуста да өгурцы.

Кы в ъ я с: *өгурцы, киськалім.*

### **Вопросъяс.**

1. Кутшөм муыс совхозлөн?
2. Мый сэні быдмө?
3. Мый челядь вөчөмаось гожомнас?

### **Задание.**

Висьталöй, мый быдмө тiян школаса град йöрын.

## Дед да челядь.

Тöрыт öшинь улын Тарас дед поткөдліс пес. Талун тэчис пессö. Сэсся көсйис роскөн чышкыны ёгсö. Сэтчö локтісны челядь. Найö отсалісны Тарас дедлы чышкыны öшинь увсö да нуны ёгсö.

Кы в ъ я с: *öшинь улын, тэчис, сэсся, ёгсö, сэтчö.*

### **Вопросъяс.**

1. Мый вöчис öшинь улын Тарас дед?
2. Кодьяс сэтчö локтісны?
3. Мый вöчисны челядь?

### **Задание.**

Висьталöй, кыдзи тi отсаянныд гортад мам-батылы.

## Жучка.

Вөлі төв. Войнас чужисны кроликпиян. Төдлытөг өти кроликпи уси клеткасыс лым вылө. А орччөн вөлі Жучка понлөн чомйыс. Кроликписө сійө нуис аслас чомйө. Войбыд Жучка ас бердас шонтіс сійөс. Тадзи кроликпи коли ловъя.

«Пионерскöй правда» газетысь.

К ы в ъ я с: *кроликпиян, орччөн, войбыд, ловъя.*

### Вопросъяс.

1. Кор чужисны кроликпиян?
2. Мый лои өти кроликпикөд?
3. Коді кроликписө нуис чомйө?
4. Кызни сійөс спаситіс Жучка?

## Сыктывкар.

Сыктывкар — Коми республикалөн столица. Сійө сулалө Эжва да Сысола юяс берегын. Сыктывкарын уличаясыс паськыдөсь. Улича бокъясын быдмөны пуяс. Керкаясыс джуджыдөсь да мичаөсь.

К ы в ъ я с: *Сысола, джуджыдөсь.*

### Вопросъяс.

1. Кутшөм кар лоө Коми республикалөн столицаөн?
2. Көні сійө сулалө?
3. Кутшөмөсь Сыктывкарын уличаясыс?
4. Мый быдмө улича бокъясын?
5. Кутшөмөсь керкаясыс?

### Задание.

1. Висьталөй, кутшөм карын либө сиктын ті оланныд, кутшөмджык сійө.
2. Висьталөй, кутшөм каръяс ті ещө төданныд Коми республикаысь.

## Миян Рөдина.

Миян Рөдина ыджыд да озыр страна. Миян странаын олөны разнөй сёрниа йөз. Найө олөны да уджалөны дружнөя. Ми радейтам асьыным Рөдинаөс.

К ы в ъ я с: *Рөдина, разнөй сёрниа йөз.*

### **Вопросъяс.**

1. Кутшом мян Рөдинаным?
2. Кутшом йоз олоны мян странаын?
3. Кызди найо олоны да уджалоны?

### **Каньпи.**

Вася да Катя — чоя-вока. Налон вөлі кань. Тулыснас каньыс воши. Челядь ёна корсисны, но некытысь эз аддзыны.

Отчюд найо ворсисны сарай дорын да друг кылісны нявзём. Вася кайис сарайо. Сэтысь сійо аддзис ассьыс каньсө. Сылөн чужома вит каньпи. Катя котөртліс гортас да вайис йөв.

*Л. Толстой серти.*

**Кы в ъ я с:** *чоя-вока, некытысь эз аддзыны, нявзём, каньпи.*

### **Вопросъяс.**

1. Кодлөн вөлі кань?
2. Мый лон канькөд?
3. Кытысь кылісны Вася да Катя каньлысь нявзёмсө?
4. Кытчо кайис Вася?
5. Кодөс сійо аддзис?
6. Мый вөчис Катя?

### **Ичөтик льом пу.**

Сад помын быдмис ичөтик льом пу. Сэтчө омөля весь-кавліс шонді. Сы вөсна пуыс вөлі зэв вөсньыдик да ичөтик.

Витя босьтіс зыр да перйис льом пусө. Детинка садитіс сійөс мөдлао: югыдинө. Виль местаын льом пу кутіс бура быдмыны.

**Кы в ъ я с:** *льом пу, вөсньыдик, югыдинө.*

### **Вопросъяс.**

1. Көні быдмис льом пу?
2. Кутшөмджык вөлі льом пуыс?
3. Мый вөчис Витя?
4. Кызди кутіс быдмыны льом пуыс виль местаың?

## Ёлка.

Воис Выль во. Школа залё сувтөдісны ыджыд ёлка. Сійё вөлі зэв мича. Челядь гажөдісны ёлкасө. Ёлка йылас кутіс өзіыны гөрд звезда. Асьныс челядь пасьтасисны көчьясөн, урьясөн, ручьясөн да ошьясөн. Найё ворсісны, сьылісны ёлка дорын. Ставныслы вөлі зэв гажа.

Кы в ъ я с: *өзіё, пасьтасисны, көчьясөн.*

### Вопросьяс.

1. Мый сувтөдісны залё Выль во дырйи?
2. Кутшөм вөлі ёлкаыс?
3. Коді гажөдіс ёлкасө?
4. Мый вөчисны ёлка дорын челядь?

### Задание.

Сетөм кывьясө гижөй ъ либө ъ знакьяс: *көч...яс, ур...яс, руч...яс, ош...яс.*

## Лым чирьяс.

Пурга ланьтіс, пышйис водзө. Енэжыс лои сөстөм-сөстөм.

Ывлаын көздөдіс. Толаясын шойччысь лым чирьяс топөдчисны. Найё лоины еджыд лыа кодьось, босьтан киад да сідз и тюргоны чуньяс костөдыд.

Кы в ъ я с: *лым чирьяс, енэжыс, сөстөм-сөстөм, шойччысь, лыа кодьось.*

### Задание.

Гижөй изложение.

## Живөй уголок.

Миян школаын эм живөй уголок. Сэні өти клеткаын олө кролик, мөдын — ёж, коймөдын — пинькай, а нельөдын — морской свинка. Живөй уголокын эм и аквариум. Аквариумын олөны гычьяс.

Живөй уголокын дежуритөны челядь.

Кы в ъ я с: *аквариум* — стеклөысь вөчөм ящик, *көні* олөны черияс; *пинькай* — ичөтик лэбач.

### **Вопросъяс.**

1. Мый эм школаын?
2. Кодъяс олöны клеткаын?
3. Кодъяс олöны аквариумын?
4. Кодъяс дежуритöны живöй уголокын?

## Кормушка.

Пуксис төв. Федя да Витя вöчисны лэбачьяслы кормушка.

Быд асыв школаö мунтöдз детинкаяс котöртлісны сэтчö. Найö содтылісны нянь крöшкияс, шыдöс. Лэбачьяс частö пуксьывлісны сэтчö, кокавлісны сёянсö.

Кы въяс: *котöртлісны, содтылісны, нянь крöшкияс.*

### **Вопросъяс.**

1. Мый вöчисны Федя да Витя?
2. Кор детинкаяс содтывлісны кормушкаас сёянсö?
3. Кодъяс пуксьывлісны кормушка вылö?

## Володя Ульянов.

Челядь дырйиыс Володя Ульянов зэв ёна радейтліс ворсны ичөтджык Оля чойыскөд. Найö вöчлісны садйö чом да ворслісны сэні. Дружитліс Володя и мукöд челядькөд.

Кы въяс: *челядь дырйиыс, чом.*

### **Вопросъяс.**

1. Кодкөд радейтліс ворсны челядь дырйиыс Володя?
2. Мый найö вöчлісны садйö?
3. Кодкөд ещö дружитліс Володя?

## Чавкан да гулю.

Чавкан аддзис, мый гулюясöс бара вердöны. Сійö еждöдіс асьсö да пырис гулю позйö. Гулюяс первойсö чайтисны, мый сійö на кодъ жö гулю, да лэдзисны сійöс. Но чавкан вунöдчис да ас ногыс горöдіс. Сэки гулюяс пон-

дісны сійӧс кокавны дай вӧтлісны. Чавкан лэбзис чавканъяс дорӧ, но найӧ повзисны сысы, сы вӧсна мый сійӧ вӧлі еджыд, да вӧтлісны жӧ.

*Л. Толстой серги.*

Кы в ъ я с: *едждӧдіс, лэбзисны, лэбзис.*

### **Вопросъяс.**

1. Мыйла чавкан пӧртчис гулюӧ?
2. Мыйла гулюясыс вӧтлісны сійӧс?
3. Мыйла эз примитны ас дінас чавканъяс?
4. Мыйӧ велӧдӧ висьтыс?

## **Пышкой.**

Оля зэв ёна радейтӧ лэбачьясӧс. Ӧтчид кызкӧ позйысь усьӧма нчӧтик пышкой. Оля босьтіс сійӧс да нуис гортас. Пышкой оліс нывка ордын. Сэсся сійӧ велаліс лэбавны.

Нывкалы жаль вӧлі лэдзны пышкойсӧ. Но Оля лэдзис. Пышкой жбыркнитіс-лэбис вывлань.

*«Пионер» журналысь.*

Кы в ъ я с: *лэдзны, жбыркнитіс-лэбис.*

### **Вопросъяс.**

1. Кодьясӧс радейтіс Оля?
2. Коді усьӧма позйысь?
3. Қытчӧ Оля нуис сійӧс?
4. Мый вӧчис Оля, кор пышкой велаліс лэбавны?
5. Правильнӧ-ӧ вӧчис Оля?

## **Надя да Лизук.**

Надя — кукань видзысьлӧн ныв. Лизук — еджыд кокъяса, лӧз мышвыла кукань.

Надя мамыскӧд частӧ волывлӧ картаӧ, отсасьӧ идрасьны. Сійӧ радейтӧ куканьясӧс, но медся ёна радейтӧ Лизукӧс. И Лизук радейтӧ Надяӧс, мелі синъясӧн видзӧдӧ нывка вылӧ да век нюжӧдчӧ нюлыштны сійӧс.

Кы в ъ я с: *кукань видзысь, лӧз мышвыла.*

### **Вопросъяс.**

1. Коді сэтшөм Надяыс?
2. Коді сэтшөм Лизукуыс?
3. Кодөс радейтө Надя?
4. Кодөс радейтө Лизук?

### **Гычпи.**

Витялы неважөн мамыс пөдаритіс аквариум. Сэні вөлі зэв мича чери! Эзысь гычпи — со кыдзи шусис сійө. Витя вердіс черисө, вежлаліс аквариумысь васө.

Вөлі ещө налөн Мурзик нима кань. Гөныс сылөн вөлі руд, а синъясыс вижөсь. Мурзик ёна радейтіс видзөдны гычпи вылө. Кань частө пукавліс аквариум дорын да видзөдіс чери вылө.

*Н. Носов.*

Кы в ъ я с: *гычпи, Мурзик.*

### **Вопросъяс.**

1. Мый пөдаритіс мамыс Витялы?
2. Кутшөм чери оліс аквариумын?
3. Коді ещө налөн вөлі?
4. Мый радейтіс вөчны Мурзик? Кутшөм сійө вөлі?

### **Лым көч.**

Луныс вөлі шоньд. Лымйыс уль. Челядь петісны ывлаө. Найө кутісны вөчны лымйысь разнөй зверьясөс. Ичөтик Катя көсийс вөчны көчөс. Дыр сійө ноксис, но, лым чукөрысь кындзи, нинөм эз артмы. Отсалісны сылы гырысьджык челядь. Көчыс артмис еджыд да кузь пеля.

Кы в ъ я с: *зверьяс, гырысьджык, кындзи.*

### **Вопросъяс.**

1. Кутшөм вөлі луныс?
2. Мый кутісны вөчны челядь?
3. Мый көсийс вөчны ичөтик Катя?
4. Кодъяс сылы отсалісны? Мый налөн артмис?

### **Задание.**

Асланыд изложениеысь корсьөй да визьнитөй өти слога кывъяс.

## Гажа лун.

Саша велөдчис первой классын. Сылы сьöкыда сетчис арифметика. Тöлысь чöж сийö решайтчис. И со талун — медводдза пятёрка. Саша котөрөн петис школаысь, мыйкö вомгорулас сьылыштис. Поводдяыс вöлі мича. Югъялис гажа шонди. И Сашалы кажитчис, мый став йöзыслы талун долыд.

А. Кузнецов.

Кы въяс: *медводдза, вомгорулас, поводдя, югъялис.*

### Вопросъяс.

1. Кутшöм классын велөдчис Саша?
2. Кутшöм предмет сылы вöлі сетчö сьöкыда?
3. Мый вöчис сийö тöлысь чöж?
4. Кутшöм öтметка пöлучитис?
5. Кутшöм вöлі поводдяыс?
6. Кутшöмджык вöлі сьölöм вылас Сашалы первой пятёрка пöлучитöм бöрын?

## Өгурец да капуста.

(Мойд.)

Өтчүд капуста көчан да өгурец мунісны өтлаын ю дорө. Өгурец пырысь-пыр уськөдчис ваө. Капуста көчан кольччис берегас да кутіс пөрччысьны. Пөрччысис да пөрччысис. Рытөдзыс пөрччысис. Өгурец виччысис, виччысис да көдзыдысла пупырышъясөн вевттысис.

Кы в ъ я с: *пырысь-пыр, вевттысис, виччысис, кольччис, пөрччысис, пупырышъясөн.*

### План.

1. Кытчө мунісны өгурец да капуста?
2. Мый кутіс вөчны өгурец, а мый капуста?
3. Мый лои өгурецкөд капустаөс виччысигөн?

## Тополь.

Воис төв. Пуяс сулалісны кушөсь. Ыджыд тополь улысь Оля аддзис тополь вож да босьтіс.

Сійө вайис тополь вожсө гортас да суйис ва тыра дозийө. Лунысь-лун топольлөн гаръясыс лоины кузьджыкөсь и кузьджыкөсь.

И друг өти лунө челядь аддзисны — тополь вож ловзьёма. Съөдов гаръяс потөмаөсь, да мыччысьөмаөсь медводдза коръяс.

Воис тулыс, и челядь садитісны тополь вожсө муө.

*А. Гарф* серти.

Кы в ъ я с: *лунысь-лун, гаръяс, мыччысьөмаөсь.*

### План.

1. Воис төв.
2. Тополь вож.
3. Мыччысисны коръяс.
4. Тополь вожсö садитисны муö.

### Задание.

Энö вунöдöй кык дз-а кывъяслысь гижанногсö: аддзис, медводдза.

## Тшак вотöм.

Ягын быдмö быд сикас тшак.

Пуктан кöрзинаад банийöм булки кодъ еджыд гоб, а синъясыд бара нин котралöны яла кузя, корсьöны вильясöс.

А тшакъяс дзевсьöмаöсь, оз кöсийны петкöдчыны. Торъя нин уна тані виж да гöрд гобъяс, кодъясöс ылісянь аддзан гежöд пуяс костöд.

Он и төдлы — кöрзинаыд тырöма нин.

К ы в ъ я с: *быд сикас, булки кодъ, гежöд — шоч.*

### Заданиеяс.

1. Лыддьöй да висьталöй содержанияесö.
2. Гижöй изложение первой морт нимсянь.

## Зэр.

Небесасö вевттис ыджыд сьöд кымöр. Лои зэв төла. Кутисны шувгыны пуяс. Гартчигтыр лэбисны коръяс.

Войтыштисны медводдза зэр войтъяс. Югнитис чардби, гымыштіс гым. И кутис шливгыны-киссьыны гожся шоньд зэр.

*И. Соколов-Микитов серти.*

К ы в ъ я с: *шувгыны, чардби, шливгыны-киссьыны.*

### План.

1. Зэр водзын поводдя.
2. Зэр.

## Чикышъяс.

Чикышъяс локтісны шоныд тувсов асылö. Найö заводитісны вöчны миян керка вевт улö аслыныс позъяс.

Некымын лун мысти керка стен пöлөн, öшиньсянь неуна вылынджык, öшйисны чикышъяслөн позъяс.

Гожöмбыд гажöдісны менö лэбачъяс. А арнас бөр лэбзисны лунвылö.

Кы в ъ я с: *чикышъяс, вылынджык, гожöмбыд, лунвылö.*

### Заданиеяс.

1. Висьталöй, ещö кутшöм лэбачъяс локтöны гожйыны миян вой-вылö.
2. Гижöй изложение.

## Чоя-вока.

Витя олö сиктын. Сылы вит арöс. Витя ветлö детскöй садйö. А ыджыдджык чойыс, Галя, велöдчö мöдöд клас-сын. Быд асыв Галя колльöдö детскöй садйö воксö. Ре-гыд и Витя мунас школаö.

Кы в ъ я с: *ыджыдджык, колльöдö.*

### Заданиеяс.

1. Висьтсö лыддьöй да разберитöй вопросъяс серти:
  - 1) Кöні олö Витя? Кымын арöс сылы?
  - 2) Кытчö ветлöдлö Витя?
  - 3) Мый вöчö Галя чойыс?
  - 4) Кытчö Галя чойыс быд асыв колльöдö Витяöс?
  - 5) Кор мунас школаö Витя?
2. Лöсьöдöй план да гортаныд гижöй изложение.

## Мамлөн удж.

Петялөн мамыс штукатур. Сійö штукатуритö керка-яс. Öтчюд Петя аддзыліс, кыдзи мамыс керкаяссö выль платтьöо пасьтöдö.

Петялы окота лой öдйöджык быдмыны да мамыс моз жö штукатурөн уджавны.

*Е. Пермьк серти.*

Кы в ъ я с: *штукатур* — рабочёй, коді штукатуритчө; *штукатуригө* — стеньяс да пөтөлөкъяс мавтө лыа сора известьон; *платтьө, платтьөоддө*.

### **Задание.**

Лөсьөдөй текст серти план да гижөй изложение.

#### **План.**

1. Петялөн окотитөм.
2. Мам-штукатур.
3. Керкаяслөн выль платтьө.

## Первой космонавт.

Юрий Алексеевич Гагарин — лётчик-космонавт, 1961-өд вося апрель 12-өд лунө сийө первойысь лэбзис космической корабль «Восток» вылын космосө. Му шарсө сийө кытшовтис 108 минут чөжөн.

Первойя космонавтөн лон мян советской морт!

Кы в ъ я с: *космос* — вселенной, став мирыс; *лётчик-космонавт, лэбзис, корабль «Восток», кытшовтис*.

#### **План.**

1. Коді сэтшөм Ю. А. Гагариныс?
2. Кытчө сийө лэбззылис?
3. Кор лэбззылис Ю. А. Гагарин?
4. Кыдзи шусьө вөлі космической корабльыс?
5. Кутшөм кадөн сийө кытшовтис Му шарсө?
6. Коді лон первойя космонавтөн?

### **Задание.**

Висьталөй, кутшөм космонавтъясөс ти ещө төданныд.

## Булька.

Менам эм Булька нима пон. Сийө съөд гөна. Сөмын лапа помъясыс еджыдөсь. Ныр-вомыс паськыд, а синъясыс съөдөсь. Найө ёна югъялөны, Пиньясыс еджыдөсь.

Булька — раминик пон. Сійо некор оз курччась. Ме зэв ёна радейта Булькаѳс.

*Л. Толстой серти.*

К ы в ъ я с: *ныр-вомыс, оз курччась.*

### **Задание.**

Гижѳй изложение Булька йылысь.

### **План.**

1. Кутшѳм вѳлі Булькалѳн гѳныс, лапаясыс?
2. Кутшѳм вѳлі сълѳн ныр-вомыс? Синъясыс, пиньясыс?
3. Булька — раминик пон.

## **Тулыс.**

Воис тулыс. Кутісны визувтны шоръяс. Гѳпъяс тырисны ваѳн.

Пѳвторъясысь детинкаяс вѳчисны ичѳтик пыжъяс. Пыжъяссѳ найѳ лѳдзисны ваѳ. Пыжъяс кивтісны. Челядь гажаа горзісны да котѳртісны на бѳрся.

*Л. Толстой серти.*

К ы в ъ я с: *пѳвторъяс, лѳдзисны.*

### **Заданиеяс.**

1. Лыддѳй да текстѳ разберитѳй вопросъяс серти:
  - 1) Волѳн кутшѳм кад воис?
  - 2) Мый лоис тулысын?
  - 3) Мый вѳчисны детинкаяс?
  - 4) Къдзи найѳ ворсісны пыжъяснас?
2. Гижѳй изложение.

## **Чашка.**

Ѳти детсадйын вѳлі кызь вит челядь. Чай юан чашкаыс вѳлі кызь нѳль. Кызь витѳдыс вѳлі важ. Рисунокыс вушйѳма, дай дорыс потыштѳма.

Некодлы эз вѳв окота сѳтысь юны чай.

Но ѳтчыд со мый лои. Дежуритіс Лена. Сійѳ ставыслы пуктіс выль чашка. Чуймисны челядь. А кѳні нѳ важыс? Лена сійѳс босьтіс аслыс. Чай юисны лѳня, некод

эз норась. Челядь думайтисны: «Молодеч, Лена». И тайо кадсянь дежурнойяс кутисны юны важ чашкаысь. Сийос сідзи и кутисны шуны: «Миян дежурной чашка».

«Мурзилка» журналысь.

Кы въяс: кызь вит, кызь нель, «миян дежурной чашка», детсадйын.

#### План.

1. Кымын челядь вөлі детскöй садйын?
2. Мыйла некод эз көсйы юны важ чашкаысь?
3. Дежурной Лена.
4. Кыдзи кутисны шуны челядь важ чашкасö?

#### Бадь.

Бадь быдмö ва дорын. Сийö паныдасьлö быдлаын: ылі войвылын и Сибирса юяс пöлөн, жар пустынясын и сола ты берег пöлөн.

Тулыснас, кор ойдöны юяс, бадьяслөн йывъясыс сöмын тыдыштöны. Ойдöм бадьяс вылын спасайтчöны көчьяс да ручьяс. Тайö каднас ручьяс оз вөрöдны көчьясöс. Тулыснас бадьсö шуöны бербаён, а сылысь дзоридзьясö — берба-баляён.

Г. Снегирёв серти.

1. Көнi быдмö бадь?
2. Көнi спасайтчöны көчьяс да ручьяс тулыснас?
3. Кыдзи тулысын шуöны бадьсö?

#### План.

#### Заданиеяс.

1. Точкаяс местаö гижöй **э** либö **ь** знакьяс: бад...яс, йыв...яс, руч...яс, көч...яс.
2. Гижöй изложениесö дженьыда, шуам, тадзи:

#### Бадь.

Бадь быдмö ва дорын. Кор ойдöны юяс, бадьяс йылын спасайтчöны көчьяс да ручьяс. Тулыснас бадьсö шуöны бербаён, а дзоридзьясö — берба-баляён.

## Тигрпи.

Ми олім Дальньої Востокин.

Бать вайис вөраланінысь тигрпиос. Сійо вөлі ыджыд юра, гөгрөс виж синъяса, паськыд кымөса да дженьыд пельяса. Водз лапаясыс вөліны кызөсь да ёнөсь, а бөръяясыс — ёна вөсныдджыкөсь. Тигрпи вөлі дзоляник, укшаль, сійо гартчис бать кок дорын.

Кы в ъ я с: *Дальней Восток, вөраланін, тигрпи, укшаль* — зэв нёжмыд, абу пельк.

### Задание.

Сетöй тигрыслы подробной описание.

### План.

1. Тигрлөн кутшөм юрыс?
2. Кутшөмөсь синъясыс, кымөсыс, пельясыс?
3. Кутшөмджыкөсь сылөн лапаясыс?

## Медводдза коми книга.

1920-өд воын петіс медводдза коми книга. Тайö вөлі «Букварь». Коми йөз кутісны велөдчыны грамотаö асла ныс кыв вылын.

Тайö кадсяньыс заводитчис Коми муын книга лэдзөм.

Кы в ъ я с: *медводдза, книга лэдзөм, 1920-өд во.*

### План.

1. Кутшөм воын петіс медводдза коми книга?
2. Кутшөм книга серти коми йөз кутісны велөдчыны грамотаö?
3. Кутшөм кадсянь заводитчис Коми муын книга лэдзөм?

## Гортса библиотека.

Ме зэв ёна радейта книгаяс. Таво ме думышти чукөртны гортса библиотека. Сэні эм нин комын книга. Став книга нимъяссö гижала тетрадьö. Сэтчö жö гижала книгалысь авторсö, книгаса геройяссö. Гижала и мича кывъяс, кодъяе меным воисны сёлөм вылө.

Кы в ъ я с: *библиотека, геройяссö, сёлөм вылө, автор* — книга гижысь, писатель.

### **Задание.**

Гижой асланыд библиотека йылысь татшом план серти:

#### **План.**

1. Қымын книга эм тэнад гортад?
2. Гижома-о налысь нимъяссө тетрадьо?
3. Мый ещө сэтчө гижома?
4. Кодлы сетлывлан лыддыны ассыд книгаястө?

## **Лев да руч.**

(Басня.)

Лев пöрысьмис, эз кут вермыны кыйны зверьясöс. Вот и мөвпыштис мудеритөмөн овны: водис пещераö да висьомö уськөдчис. Зверьяс кутисны воylvлыны сийöс видлыны. Но некод бöрсö эз петаvлы. Лев кватитлис да сөйлис быдөнöс, кодi пыравлис пещераö.

Локтис руч, сувтис öдзöс дорö да юалис левлысь:

— Кыдзи нин олан?

— Лёка. Мый нö тэ он пыр ме ордö?

— Қок туйяс серти аддза: тэ ордö уна зверь пырöма, а бöрсö некод абу петöма.

### **Заданиеяс.**

1. Лыддьöй баснясö да висьталöй содержаниесö асланыд кывйөн.
2. Гижой изложение татшом план серти.

#### **План.**

1. Мыйла лев эз кут вермыны кыйны зверьясöс?
2. Кыдзи сийö кутис мудеритны?
3. Мыйла руч эз пыр пещераö?
4. Кыдзи сийö гөгөрвоис лев мудеритөм йылысь?

## **Туй дорын памятник.**

Отчид ме Танякөд мунi вөрö вотчыны. Вотöсыс вöли уна, и регыд мян көрзинаяс тырисны. Вöрсыс петигмоз тшöтш вотим и цветьяс.

Тöдлытөг ми петим сэтчө, көни сулалис памятник. Памятник вылас вöли гижома, мый татчө гуалöма Великöй

Отечественной война дырйи пöгйбнитöм сöветскöй воиньясöс. Памятник гөгöрыс быдмисны цветьяс. Ми тшöтш пунктим памятник бокас цветьяснымöс.

«Пионерской правда» газетысь.

Кы въяс: *вотчины, петігмоз, тиöти, памятник, Отечественной война.*

### План.

1. Кытчö ми мунім?
2. Мый ми вотім?
3. Кытчö ми тöдлытöг петім?
4. Мый быдмисны памятник гөгöрыс?
5. Мый вöлі гижöма памятник вылас?
6. Кытчö ми пунктим цветьяснымöс?

### Заданиеяс.

1. Гижöй изложениесö коймöд морт нимсянь.
2. Висьталöй, эмöсь-ö тиян сиктын памятникьяс. Эмöсь кö, коды сувтöдöма памятниксö.

## Олеко Дундич йылысь.

Чорыд тыш пансис Воронежса уличаяс вылын. Олеко Дундич чепöсйис водзлань да кутіс тövзыны пышйысь белöйяс бöрся. Ылын дöлаліс сылөн пашкыр гöна буркаыс.

Сійö кераліс белöйясöс. Друг ранитісны Дундичлысь вöвсö. Дундич чечыштіс муö. Верзьöма белöйяс кытшалісны сійöс.

А тайö кадас лэбисны нин отсöг вылö Дундичлөн ёртьясыс.

Верзьöмаясöс аддзöм бöрын белöйяс уськөдчисны пышйыны. Дундич сьöкыда лолалігтыр висьталіс, мый сылысь вöвсö ранитісны. Друг Дундич шатовмуні. Будённый пыр жö корис фельдшерöс. Вөлөмкö Дундичöс сьöкыда ранитöмаöсь.

Н. Тихонов.

Кы въяс: *Воронжса, верзьöма, ёртьяс, лолалігтыр, шатовмуні, фельдшер.*

### Задание.

Висьталöй, гражданскöй войнаса кутшöм геройясöс ещö тöданныд.

## Будённийлөн ус.

Будённий шойччис Карловы Вары чешскöй курортын. Отпускъяс дырйи Будённий эз пасьтавлы военнöй мундирсö. Сийö новліс штатскöй костюм.

Некымын чешскöй челядь, кор аддзисны Будённийöс, кутісны ас костаныс вашкöдчыны.

— Сийö!— шуис öти детинка.

— Оз вермы лоны!

— А тэ юав.

Дженьыдик гача детинка смелмöдчис да юалис:

— Висьталöй, пöжалуйста, ті — Будённий?

— Да. Ме. А кызди нö ті тöдінныд?— юалис Будённий.

— Эм öмöй татшöм ускыс мöд мортлөн?— горöдіс Иржи нима детинка.

— Но, сідзкö, тöдмасям. Ме — Будённий. А тэ?

— А ме — Иржи Крейчи,— вочавидзис детинка.

Челядь кытшалісны Будённийöс.

*И. Всеволожский.*

*Кы в ъ я с: Карловы Вары, мундир — военнöй паськöм; штатскöй костюм, шöпкöдчыны ас костаныс, Иржи Крейчи.*

### **Задание.**

Висьталöй текстö татшöм вопросъяс серти:

1. Көнi шойччис Будённий?
2. Кутшöм паськöма сийö вöлі?
3. Кодъяс аддзисны Будённийöс?
4. Мый серти чешскöй челядь тöдісны Будённийöс?

## Василий Кисляков.

Тайö вöлі Отечественнöй война первöя тöлысьясö. Сержант Кисляков аслае куим боецкöд дорйис сопка. Боеприпасъяс кутісны бырны. Кисляков тшöктіс ёртъясыслы мунны отсöгла.

Ёртъясыс мунöм бöрын кык час чöж на Кисляков тышкасис врагъяскöд. Но патронъяс да гранатаяс öдйö бырисны. Коли сöмын öти граната. Шыбитіс сийöс Кисляков гитлеровецьяс пöвстö да горöдіс: «Взвод, ме бöрся, атакаö!»

И буретш сэки воис отсөг. Сопка гөгөрыс куйлісны сё кымын виём гитлеровец. Тайё подвигсыс Василий Кисляковлы сетісны Сöветскöй Союзса Геройлысь ним.

Кы въяс: *боеприпасъяс, сопка* — неыджыд гөра; *звод, Сöветскöй Союзса Герой*.

#### План.

1. Кор тайё вöлі?
2. Мыйла Кисляков мөдөдіс ёртъяссö?
3. Кыдзи сійö тышкасис ёртъяссыс мунөм бöрын?
4. Кутшөм ним сетісны Василий Кисляковлы?

### Куимөн космосын.

1964-өд вося октябрь 12-өд лунö космосö лэбзис миян выль корабль «Восход». Корабляс вöліны куимөн: лётчик Владимир Комаров, инженер Константин Феоктистов, врач Борис Егоров.

Тайё космическöй корабльыс 16 пөв кытшовтіс Му шар гөгөр да пуксис бөр.

Став сöветскöй йөз радлісны да чолөмалісны повтөм космонавтъясöс.

#### Задание.

Вочавидзöй татшөм вопросъяс вылө, сэсся гижöй:

1. Кор лэбзис космосö корабль «Восход»?
2. Кодъяс лэбзисны тайё корабль вылас?
3. Кымын пөв кытшовтіс Му шар гөгөр космическöй корабльыс?

### Менам көрөбкаöй.

Мөд класса велөдчысыс труд урок вылын кленталöны картонысь көрөбкаяс. Көрөбкаяссö найö вöчалöны фабрикалы. Клеитіс көрөбка и Серёжа Блинов. Көрөбка пельöсас гөрд карандашөн сійö гижис ассыс нимсö.

«Кодлы веськалас менам көрөбкаöй?» — думайтіс Серёжа.

Колис куим төлысь. Серёжалы ньöбисны выль ботинки. Сійö восьтіс көрөбкасö да долыда горөдіс:

— Менам көрөбкаöй!

И збыль: көрөбка пельöсас вöлі гижöма Серёжалөн нимыс.

### План.

1. Мый вöчисны челядь труд урок вылын?
2. Мый гижис Серёжа көрöбка пельöсö?
3. Кодлы веськаліс Серёжалөн көрöбкаыс?
4. Кызди детинка төдіс асьыс көрöбкасö?

### Задание.

Думыштöй да висьталöй *ф* звука кывъяс.

## Руч да ручпиян.

Ичöтик ручпи чужис джуджыд да дзескыд гуын. Ручпи вöлі синтöм, дженъыдик гöна, а пиньясыс эз на вöвны.

Ручпилөн вöлі нель чоя-вока. Ставныс найö вöлісны синтöмöсь жö. Мамныс вердіс найöс аслас йöлөн да шонтіс ас бердас: гöныс сылөн вöлі пушыд да небыд. Сійö шоча петавліс гусьыс. Петалас сөйыштны да котөрөн бөрвоас аслас пияныс дінö. Шоныд да лöсьыд вöлі ручпиянлы мамыс дінын.

А. Бостром серти.

Кывъяс: *ручпи, дженъыдик, чоя-вока, ас бердас.*

### План.

1. Кöні чужис ручпи?
2. Кутшöмöсь чужöны ручпиян?
3. Кызди мамыс төждысьö на вöсна?

### Задание.

Торйöдöй кыв вужъяссö татшöм кывъяслысь: синтöм, мамыс, ручлөн.

## Петя.

Ар. Вöрын уна тшак. Петя чукöртіс тшаксö көрзина тыр да көсйис мунны гортас.

Друг кыліс кутшöмкö шы. Куст улын куйліс ичöтик ур. Лапаясыс сылөн вöлі доймöмабсь. Петя пöрччис фуражкасö да пуктіс сэтчö ранитчöм зверöс.

Гортас Петя вердіс урсö öрешкиөн да йöлөн. Некры-

мын лун мысти ур бурдіс. Петя лэдзис сійӧс вӧля вылӧ.  
Онӧ, дерт, урыс чеччалӧ увйысь увйӧ.

«Пионерской правда» газетысь.

Кы в ъ я с: *кӧрзина тыр, кутшӧмкӧ, фуражка.*

**План.**

1. Петя вотӧ тшак.
2. Ранитчӧм урпи.
3. Петя нуӧ урписӧ гортас.
4. Урпи вӧля вылын.

**Задание.**

Тетрадяныд гижӧй *-тч-*а да *-чч-*а кывъяс.

## Шоныд зэр.

Рытнас сѡвкнитӧс шоныд зэр. Эз на удитны бурджы-ка мыссыны сѡдасьӧм туйяс да керка вевтъяс, небесаыс заводитӧс бӧр воссыны. Посныдик сера кымӧръяс вуджисны Эжва сайӧ, сѡсся шлывгисны асывывлӧ. Ружтыштӧс, пошыктыштӧс мудзӧм морт моз тӧв и ланьтӧс шойччыны. Зато дугдывтӧг бузгӧ паськыд шор.

*И. Коданѡв серти.*

**Задание.**

Думыштӧй предложенеяс татшӧм кывъясӧн: сѡвкнитӧс, шлывгисны, пошыктыштӧс.

## Слӧнъяс.

Индияын слӧнъяс вылын ветлӧны уличаясӧд. Слӧнъяс зѡв кывзысьысьӧс, найӧ кывзысьӧны весиг ичӧтик детинкалысь.

Слӧнъяс уджалӧны вӧрын, пӧрӧдӧны пуяс да тѡчӧны найӧс ӧтчукӧрӧ.

Слӧнъяс вылын охотникъяс ветлӧны кыйсьыны.

Слӧн зѡв тӧлка. Сійӧ некор оз вӧч мортлы лѡктор. Сӧмын лѡк морт вермас скӧрмӧдны слӧнӧс — сѡки сійӧ буртор мед оз виччысь.

Кы в ъ я с: *Индия* — страна; *кывзысьысь*, *охотникъяс*, *лѡктор*, *буртор*.

## План.

1. Индияса слонъяс.
2. Слонъяс уджалоны, кыйсьоны.
3. Слон — толка животной.

## Бобувъяс.

Садьми асывнас, видзодлі ывлао. Став гопъясыс кынмомаось — пуксьо тов.

Челядь и шуоны:

— Мунамой садийо пелысла! Оні пелысыс зэв чоскыд, дзик варенно кодъ.

Ми котортим садийо, октим пелысь. Пу улысь ме адзи косьмом кык бобувос. Босьтигон отиыс чеги. А модсо ме гартышти бумагао да пукти зепто. Вайи гортю да косий петкодлыны ертлы. Рази бумагасо, а бобулыс жбыркнитис-лэбзис. Зептын сийо шоналома да ловзьома.

*Н. Беляков.*

К ы в ъ я с: *варенно кодъ, пелысь, жбыркнитис.*

## План.

1. Пуксьо тов.
2. Октом пелысь.
3. Кос бобувъяс.
4. Бобув ловзис.

## Пурьясысыяслон посёлок.

Берег полон сулалис ичотик посёлок. Сэни олисны пурьясысыяс. Откодъ выль керкаясыянь Эжвалань видзодисны гырысь ошиньяс. Посёлоксо кытшаломаось поньыдик вор дияс, тыяс, видзьяс.

Водз асывсянь серь рытодз пуо ю вылын удж. Кузь бонаяс костод дугдытог кывтоны керьяс. Керьяссо машинаяс кортавлонь гырысь пурьясо, кодьясо керьяс кылдоны заводьясо.

*И. Коданев серти.*

К ы в ъ я с: *пурьясысыяс, кытшаломаось, посёлок, бона.*

### План.

1. Кутшом посёлокыс пуръясысыяслон?
2. Пуръясысыяслон удж.

## «Доктор».

Тайо вöли Великöй Отечественнöй война дырйи. Сикт-сянь, кöни олісны Ваня да Гриша, фронтыс вöли матын. Фронт вывсянь локтіс ранитчöм вöv. Сувтіс сикт помö, а пырны полö. Ваня казяліс вövсö да шуö:

— Лок, лок, эн пов.

А сэсса нуöдіс сійöс школа йөрö. Сэні вöлыс и кутіс овны. Вердісны сійöс ставöн, лечитіс сöмын Ваня. Вöv некодлы эз лэдзлы мавтны ассыс ранасö. Сöмын ас ді-нас сибöдліс Ваняöс.

Ваня бурдöдіс вöлöс. Сэксянь челядь кутісны шуны Ваняöс «докторөн».

*И. Василенко серти.*

### План.

1. Ранитчöм вöv.
2. Ваня вövсö нуöдö школа йөрö.
3. Ваня — «доктор».

## Космосын морт.

Тайо вöли 1961-öд вося апрель 12-öд лунö.

Москва эз тöд, и мир эз тöд, мый тайо кадö ракетаö пырис морт да шуис: «Ме гöтов!»

Зэв ыджыд ракета шумөн кыпöдчис вывлань.

Космическöй корабльын пилот-космонавтөн вöли Сöветскöй Союзас гражданин, лётчик-майор Юрий Алексеевич Гагарин.

Став мир кыліс: «Космосын морт!»

Коляс уна во, но йöз пыр кутасны казътывны сійö лунсö, кор прöстöй сöветскöй морт Юрий Гагарин пер-войөн восьтіс кодзувъяслань туй.

К ы в ъ я с: *лётчик-майор, ракета.*

### План.

1. Кор морт первойысь кыпöдчис космосö?
2. Кюді вöли пилот-космонавтөн космическöй корабльын?
3. Мый йылысь кутасны казътывны йöз?

## Вильыш ошпи.

Миян корабль вуджис Севернӧй Ледовитӧй океан. Сійӧ вӧлі матыстчӧ нин рӧднӧй берегъяслань. Морьякъяс радпырысь сёрнитисны Владивосток йылысь. Но друг кодздӧдіс. Моремыс кутіс йизыны. Пароход лои йи пӧвстын. Отсӧг вылӧ локтіс ледокол.

Пароход да ледокол сувтісны орччӧн. Пароход вылын вӧлі еджыд ошпи. А буретш сэки ледокол вылын восьтісны треска бӧчка. Ошпи кылӧма дуксӧ и заводитӧма гусьӧникӧн кыскавны черисӧ пароход вылӧ. Боцман казяліс ошпились дурӧмсӧ да кутіс вӧтлысьны сы бӧрся. Ошпи ваяліс черисӧ, а боцман бӧр нуалис.

М. Зингер серти.

Кы в ъ я с: *боцман, Севернӧй Ледовитӧй океан.*

### План.

1. Регод гортӧ.
2. Виччысьтӧмтор.
3. Отсӧг вылӧ локтӧ ледокол.
4. Вильыш ошпи.

## Ваня мездӧ пышкайӧс.

Тӧвся рыт. Челядь юкисны кык пельӧ да заводитисны ворсны хоккейӧн. Друг кодкӧ горӧдіс:

— Ваня! Видзӧдлы, тиян каньныд пышкайӧс кутӧма.

Ставӧн бергӧдчисны сылань, кысянь кыліс гӧлӧс шы.

Потшӧс бокин Ванялӧн руд каньыс кык лапа костас кутіс пышкайӧс, коді мый вынсыс нетшкысис.

Кодкӧ ошкыштіс каньлысь — збойлунсӧ. А Ванялӧн юрас югнитіс ясыд мӧвп: мездыны пышкайӧс.

— Серӧй! — меліа чукӧстіс Ваня. Кань нявӧстіс. А пышкайлы тайӧ и колӧ вӧлі: жбыркнитіс-лэбзис кызд пу йылӧ да радпырысь ӧвтчыштіс бордъяснас.

А Серӧй скӧра видзӧдліс Ваня вылӧ.

В. Рочев серти.

Кы в ъ я с: *хоккей, жбыркнитіс-лэбзис.*

### План.

1. Челядь ворсӧны хоккейӧн.
2. Кань кутӧма пышкайӧс.
3. Ваня мездӧ пышкайӧс.

## Дималён чашка.

Ира да Вася вöліны дежурнöйсөн. Вася весаліс пуртъяс да вилкаяс. Ира мыськаліс чашкаяс да скöраліс. — Дима век кольö сакарсö чашка пыдöсас,— шуасис сійö.

Ира муртса пожйыштіс Дималысь чашкасö. Сэсся тэчис чашкаяссö шкапö да котöртіс ворсны.

Рытнас челядь дорö локтісны гöстьяс. Челядь пуксьö-дісны найöс пызан сайö чай юны. Лампа югөр улын сідзи и дзирдалісны Васяөн весалём пуртъяс да вилкаяс. А Ира поліс видзöдлыны чашкаяс вылас. Но омöля мыськём чашка эз веськав некодлы. Мыйла?

Оля вайис чашкаяссö пызан вылö, аддзис няйт чашкасö да выльысь мыськаліс сійöс.

*А. Гарф серти.*

### План.

1. Қызди дежуритіс Вася?
2. Қызди мыськаліс чашкаяссö Ира?
3. Кодъяс локтісны челядь дорö?
4. Мыйла омöля мыськём чашка некодлы эз веськав?

## Видз вылын.

Витя ворсіс ю дорын. Зорöд дорсянь чуксаліс сійöс Семö дядь. Детинка пыр жö котöртіс.

Вөр сайсянь кыпöдчис сьöd кымөр. Семö дядь висьталіс:

— Зэрмытöдзыс колö зорöдавны öстатки турунсö. А öти вöv прöст сулалö. Пуксьы да тшöтш кыскав юрсö.

Детинка кавшасис Қарко вöv вылö. Вит турун юр вайис Витя. Унджык на эськö удитіс зэрмытöдзыс вайны, но турун юрыс эз коль. Чöвтысьяс зілісны жö. Зертöдз на эштіс зорöдыс. Семö дядь ошкіс Витяöс. Витялы лои зэв нимкодъ.

*Г. Юшков серти.*

### План.

1. Мый вöчис Витя?
2. Мыйла сійöс корис Семö дядь?
3. Қызди отсаліс Витя турун пуктысьяслы?
4. Мыйла Витялы лои нимкодъ?

## Вьюн.

Аддзис Сеня пывсян сайысь еджыд морёса кутюпиёс. Детинка босьтіс сійёс, чышкаліс да гортас катёдіс.

— Лым усигён Сеня бёрся вётлысис нин мичаник кутюпи. Кутюыс пыр шаньмис и шаньмис. Лои ёсь ныра да негырысь ёсь пельяса лайка. Сеня нимтіс сійёс Вьюнён.

Детинка вывті ёна радейтіс ассыс быдтассё да быд чудесаас велёдіс. Босьтас бёчка асык да тшөктас сы пыр чеччавны. Первойсё Вьюнлөн некыдз оз вёлі артымы. Сенялы теш — мёдысь тшөктё, коймёдысь. Но медсясё нин Вьюнлы кажитчё разведчикавны да санитавны.

Г. Фёдоров.

Кы в ъ я с: *кутюпи, лайка* — понъяслён порода; *асык*.

### План.

1. Кодёс аддзис Сеня?
2. Кутшөм лои кутюпиыс?
3. Мый вёчны велёдіс Сеня кутюписё?

## Отсасьысьяс.

Недель чөж буситіс зэр. Кор зэрыс кобис, челядь кутісны мөвпавны, көні колявны прөст кад. Дыр на эськё вензисны найё, эз кө матыстчы совхозса бригадир.

— Но, геройяс, мый йылысь сэтшөм збодера варовитанныд? Гашкё, совхозлы картофель идравны ветланныд? Ок, и гырысь картофель быдмёма. Пёжалан да пөтөдзыд өти картофельыс лоё.

Детинкаяс видзөдлісны өта-мөд выланыс да шуисны: — Мунам!

Картофельыс збыльысь вөлёма зэв гырысь. Некымын котыр и перъян, а ведраыд тырёма нин. Сөмын удит кисьтавны мешөкьясё.

Сералігтыр да шмонитігтыр уджалігад эз и төдлыны, кызди колис час-мөд. Сэки вёлисти казялісны, мый вунөдөмаёсь пестыны бипур.

Л. Палкин серти.

Кы в ъ я с: *сералігтыр, шмонитігтыр, бипур*.

## План.

1. Мый йылысь вензисны челядь?
2. Мый висьталіс налы совхозса бригадир?
3. Қызди уджалісны челядь?

## Ош да вертолёт.

Вертолёт лэбис черила. Черныс куйліс бөчкаясын ю дорын.

Индөм местаө вертолёт кутіс пуксьыны, но пыр жө ковмис бөр кыпөдчыны. Пуксьынысө мешайтіс бөр лапаяс вылө сувтөм ош. Ош дась вөлі тышкасьны машинакөд. Лётчик бергөдіс вертолётсө да веськөдіс хищник вылө сынөдлысь ён струя. Тайө лөньөдыштис ошкөс. Сійө кутіс пышйыны. Қор вертолёт пуксис муө, тыдовтчис, мый ошкыс удитөма нин сөйны кык бөчка чери.

«Югыд туй» газетысь.

Кы в ъ я с: *вертолёт, хищник.*

## План.

1. Мыйла лэбис вертолёт?
2. Мыйла вертолётис эз вермы пуксьыны муө?
3. Қызди лётчик вөтліс ошкөс?
4. Мый вөчөма ошкыс?

## Задание.

Правильнөя шуөй лётчик, вертолёт, хищник кывъяс. Юклөй тайө кывъяссө слөгъяс вылө.

## Шушь ю дорын.

Сибырын Шушь ю дорын сулалө Шушенское сикт. Важөн этшаөн төдлісны тайө сикт йывсьыс: сійө вошөма вөръяс да нюръяс пөвстө.

Сійө кадсянныс прөйдитіс уна во. Шушенское сикт лон төдса став мортлы: быдөн төдөны, мый 1897-өд воын царскөй правительство мөдөдіс тайө сиктас Владимир Ильич Ленинөс. Куим во чөж сійө оліс ылі ссылкаын, Сибырын, медся шуштөм пельөсын.

Өні Шушенское сикт дзикөдз вежсис.

Шушенско́й челядь, кодъяс коркӧ иславлісны пу конькиӧн, важӧн нин быдмисны. Ӧні мукӧд челядь ислалӧны Шушь ю вылын. Сӧмын конькиныс налӧн настӧящӧй, бур стальысь.

А. Кононов серти.

Кы в ъ я с: *Шушь ю, ссылка, пу коньки, Шушенское сикт.*

**План.**

1. Кутшӧмӧн вӧлі Шушенское сикт революцияӧдз?
2. Мыйла Шушенское лон тӧдса став мирлы?
3. Шушенское сикт ӧні.

## Первойя зэрӧдз.

Таня да Маша ёна дружитісны. Найӧ век ӧтлаын ветлісны школаӧ. Ӧтчид нывкаяс мунісны ӧтлаын жӧ, но друг зэв ёна зэрмис. Маша вӧлі плаща, а Таня — платтӧ кежысь. Нывкаяс котӧртісны. Таня тшӧтш кӧсйис вевттысьсны Маша плащӧн, но Маша повзис кӧтасьӧмысь.

Воисны школаӧ. Учительница шуис:

— Мыйла нӧ Машалӧн платтӧбыс кос, а Танялӧн кӧтасьӧма. Ті жӧ ӧтлаын локтінныд. Позис ӧти плащӧн вевттысьсны. Тыдалӧ, тіян дружбаыд первойя зэрӧдз.

Нывкаяс гӧрдӧдісны: Маша ас вӧснаыс, а Таня Маша вӧсна.

В. Осеева серти.

Кы в ъ я с: *платтӧ, вевттысисны, плащ.*

**План.**

1. Кыдзи дружитісны Таня да Маша?
2. Мый лон зэр дырйи?
3. Мыйла гӧрдӧдісны нывкаяс?

**Задание.**

Висьталӧй, кыдзи ті гӧгӧрвоанныд татшӧм кывъяс: «Маша ас вӧснаыс, а Таня Маша вӧсна?»

## Овлö и тадзи.

Ыбъяслөн сöмын на лунвыв бокъясыс вöлі кушмöма-  
öсь, а скворечьяс воисны миянö. Кöть ывлаыс шоныд,  
шоръяс эз на жö визувтны.

Сэсса поводдяыс крута вежсис: кöдздöдiс, усис лым.

Воом лэбачьяслы нинöм лои сёйны. Сэк ми первойыс  
аддзим найöс кильчöбокса ёг чукöр вылысь. Лоис отсав-  
ны коньöръяслы: мöдiм вердыштавны.

Лун-мöд тадзи пöткöдчисны лэбачьяс. Сэсса бара  
шондöдiс. Мыччысисны ыбъяс вылын сьöд дöмасьяс.

*В. Торопов* серти.

Кы в ъ я с: *ыбъяс, лунвыв, лун-мöд, мыччысисны,  
сьöд дöмасьяс.*

### План.

1. Воисны скворечьяс.
2. Поводдя вежсис.
3. Лэбачьяс тшыгъялöны.
4. Челядь отсалöны скворечьяслы.

### Задание.

Висьталöй, кызди тi отсаланныд төвйыны лэбачьяслы.

## Библиотека.

Коймöд класса пионерьяс шуисны лöсьöдны асланыс  
классын библиотека. Висьталiсны та йылысь став че-  
лядьды, а сэсса ещö и объявление öшöдiсны. Ставöн  
вайисны гортсыыс гоз-мöд книгаöн. Пукталiсны книгаяс-  
сö шкапö джаджьяс вылö. Со и лои библиотека.

Светланаöс да Воваöс бöрйисны библиотекарьясöн.  
Найö лöсьöдiсны быд лыддысьысь вылö карточка. Сэт-  
чö кутiсны гижавны, кодi кутшöм книга босьтö.

Учительница Вера Николаевна прöверитiс карточка-  
яссö да шуис:

— Молодечьяс! Ставыс правильнö.

*С. Баруздин* серти.

Кы в ъ я с: *объявление, гоз-мöд, лыддысьысь, биб-  
лиотекарь.*

### План.

1. Мый шуисны лӧсӧдны коймӧд класса пионеръяс?
2. Қызди найӧ чукӧртисны книгагасӧ?
3. Кутшӧм удж кутисны нуӧдны библиотекарьяс?

### Задание.

Правильнӧя шуӧй библиотека, библиотекарь, объявление кывъяс да тайӧ кывъяснас думыштӧй предложениеяс.

## Кӧрпи.

Аслам синмӧн ме аддзылі кӧрпиӧс.

Ӧтчыл Байда нюр дорти мунігӧн паныдаси кӧрпикӧд. Сійӧ куйліс тӧв нырӧн пӧрӧдӧм конда бердын.

Кӧрпи чошкӧдіс пельяссӧ, видзӧдліс ме вылӧ да ӧдӧбтіс чечныны, но вӧсньыдик кокъясыс эз кывзысьны, найӧ кусыньтчисны, и кӧрпи пӧри бок вылас.

«А мамыс?! Мамыс кӧні?»— думайті ме. Видзӧдлі гӧгӧр, мамыс некӧн эз тыдав.

Окота лои вердыштны мамтӧм сирӧтаӧс. Перйи нопйысь няньтор да суйи сылы вомас. Но кӧрпи эз кут сейны, бӧр лэдзис вомсыс. Вӧлі кӧ йӧвтор, дерт, эськӧ юис.

Сідзи ме и эноті мичаник кӧрпиӧс.

Кывъяс: *Байда нюр; конда* — кос пожӧм пу; *вӧсньыдик, няньтор, йӧвтор.*

### План.

1. Кытысь детинка аддзыліс кӧрписӧ?
2. Қызди видзӧдліс кӧрпиыс сы вылӧ?
3. Кутшӧмджык вӧлі кӧрпиыс?
4. Мый кӧсийс вӧчны детинка?

### Заданиеяс.

1. Гижӧй правильнӧя кӧрпи кыв да эн вунӧдӧй сылысь гижанногсӧ. Асьныд думыштӧй татшӧм сяма кывъяс да гижӧй тетрадянд.
2. Гижӧй изложениесӧ коймӧд морт нимсянь.

## Пышкай.

Аддзис пышкай ыджыд нянь корка. А лӧптыны нянь коркасӧ да нуны аслас позйӧ пышкай эз вермы — эбӧсыс оз тырмы.

— Вай, отсалам, пышкой,— шыасисны ёртъяссы.—  
А тэ юксян мянкод нянь корканад, ставсö öд он вермы  
öтнад сёйны.

— Вот ещё, вот ещё!— скöрмис пышкой.— Менам  
нянь коркаыс! Ме аддзи! Некодлы ог сет.

— Ок тэ!— скöрмисны ёртъяссы дай лэбзисны.

А скöр рака виччысис, кор пышкой коляс öтнасöн,  
дай мырддис сылысь нянь коркасö.

Эн горшась, пышкой!

Кы в т я с: *нянь корка, эбöс — вын; ёртъяс, виччысис.*

### *Заданиеяс.*

1. Öтветитöй вопросъяс вылö:

1) Мый аддзис пышкой?

2) Мыйла пышкой эз вермы нуны нянь коркасö?

3) Мый шуисны ёртъяссы пышкайлы?

4) Мый шуис ёртъяссылы пышкой?

5) Коді мырддис пышкайлысь нянь коркасö?

2. Гижöй изложение веськыд сёрнитöг.

## Светлана.

Коркö Светлана вöлі ичöтик, а öні ыджыд. Водзті  
сійö ветлöдліс детскöй садйö, а öні ветлö школаö. И оз  
первой классö, и оз мöдöд классö, а коймöд классö нин.

Вот öтчыд урокъяс бöрын локтіс классö старшöй  
пионервожатöй. Сійö висъталіс, мый аски, Ленин чужан  
лунö, челядьöс кутасны примитны пионерö.

Вожатöй кутіс лыддьöдлыны челядьлысь нимъяссö.  
На лыдын тшöтш вöлі и Светлана Сергеева. Светланалы  
лои зэв нимкодъ. Радысла сійö котöрöн мöдöдчис гортас,  
медым та йылысь висътавыны гортсеяслы.

*С. Баруздин серти.*

Кы в т я с: *пионервожатöй, тшöти, нимкодъ.*

### План.

1. Кутшöм классын велöдчис Светлана?

2. Мый öтчыд висъталіс старшöй пионервожатöй?

3. Мыйла Светлана Сергеевалы лои нимкодъ?

### *Задание.*

Школаö, классö, челядьлы кывъясысь корсьöй кыв вуж да кыв йыв.

## Двойка.

Школа йöрысь частö позьö вöлі аддзыны понйöс. Нимыс сылөн Двойка. Мыйла понйыслы сетöмаöсь Двойка ним, некод оз тöд. Сöмын ставөн тöдисны, мый понсö эз радейтны челядь.

Двойкаöс челядь лыйлісны изйөн, нöйтісны. А сійö эргис.

Отчyd учительница петіс школаысь да аддзис тайöс. Сійö шыясис челядь дінö:

— Позьö öмöй нöйтны понсö сöмын сы вöсна, мый сылөн нимыс Двойка?

Челядь ланьтісны. Налы лои яндзим. Недыр мысти найö матыстчисны Двойка дінö да кутісны сійöс вердны. Регыд челядь казялісны, мый понйыс вöлöма зэв шань да тöлка.

*Е. Пермяк.*

Кы въяс: *яндзим, недыр мысти.*

### План.

1. Кытысь позьö вöлі аддзыны Двойка понйöс?
2. Мыйла сійöс эз радейтны челядь?
3. Мый отчyd аддзис учительница?
4. Мый лои та бöрын?

## Вышка.

Отчyd мян сиктö воисны йöз. Сиктын найöс шуисны экспедицияөн. Найö весь эз овны. Пила-черөн да мукöд инструментъясөн быд асыв мунісны Вашка ю сайö.

Мыйкö дыра кад кольöм бöрын парма весьтын мыччысис ёсь йыла башня кодь стрöйба. Тайö вöлі вышка.

Меным зэв окота вöлі кайлыны вышка вылас. И вот отчyd кавшаси ме вышка вылас посъяс кузя.

Паськyd эрдъяс воссисны менам синъяс водзын. Гөгөр шылькнитчöма парма. Сылөн помыс дзесбöма лöзальсь вöртас сайö.

Первойысь ме аддзи вышкасянь муса сиктöс: сійö, быттö йöжгыльтчöма гуö, ичöтик-ичöтик. Буретш сэки, вышка йылын сулалігөн, ме гөгөрвои: кутшöм ыджыд вöлöма менам чужан муöй, кутшöм сылөн эрдъясыс.

*Л. Палкин серти.*

Кы въяс: *экспедиция, пила-чер, шылькнитчöма, вöртас, йöжгыльтчöма, эрдъяс.*

### *Заданиеяс.*

1. Лыддьбй висьтсö да торйöдлй юкөнъяс вылö, медым артмис план.
2. План сертиыс висьталöй висьтыслыс содержаниесö.

## Асланыс колхозлы.

Нюшалөн киясыс абу на ёнöсь, но кужысьсöсь.

Со и öнi. Воис тулыс. Колхозса садйыс пуяссö колö мавтны известьён, мед эз сёйны вредительяс. А колхозникъяслы некор: гөрöны, кöдзöны.

Чукöртис Нюша пöдругаяссö да накöд и сёрнитчис та йылыс. Нывкаяс петисны уджавны.

Шондйыс вылын на, а уджыс пöшти эштö нин.

Рытнас локтис сэтчö председатель да чуймис:

— Кодi нö татшöм бура пуяссö белитöма? Кодлы аттьöсö висьтавны?

А нывкаяс чöв олöны. Нинöм оз вочавидзны. Да и мыйла найöс аттьöвны? Асланыс колхозлы öд уджалисны.

*Е. Пермь.*

Кы въяс: *кужысьсöсь, известьён, чöв олöны.*

### **План.**

1. Кутшöмöсь Нюшалөн киясыс?
2. Мый вöчисны Нюша да сёлөн пöдругаясыс?
3. Мыйла чуймис колхозса председатель?

### **Задание.**

Висьталöй, кызди тi отсаянныд асланыд совхозлы.

## Лэбачьяслы керкаяс.

Ваня да Вася кöсийöны лоны строительясөн. Стрöитны ыджыд керкаяс. Но тайöс дыр на ковмас виччысьны. А стрöитны окота.

Со и думыштисны детинкаяс стрöитны лэбачьяслы керкаяс.

Кöть сьöд ракаяслы и оз гырысь керкаяс ковны, а стрöитны найöс абу кокни. Кольöм во челядь вöчисны уна скворечник, но сьöд ракаяс эз овмöдчыны сэтчö. Кöрт тувъяс чурвидзöны, коластьяс эмöсь.

Таво детинкаяс керкаяссö вöчисны зэв бура: пöвъяссö шыльыда стружитісны, көрт тувъяссö мичаа тувъялісны, коластьяссö эз кольны.

Позьö шуны — бур строительяс быдмöны.

Л. Палкин серти.

Кы въяс: *сьöд ракаяс, көрт тув, чурвидзöны, стружитісны, виччысьны.*

### План.

1. Ванялөн да Васялөн көсийом.
2. Сьöд ракаяс эз овмöдчыны скворечникъясö.
3. Челядь вöчöны лэбачьяслы выль керкаяс.

### Задание.

Правильнöя гижöй виччысьны кыв. Асьныд думыштöй -чч-а кывъяс.

### Клякса.

Отчыд учительница корис Виталикöс дöска дорö да тшöктіс решитны задача. Гортас Виталик абу вöчöма уроксö да эз тöд, кызди решитны тайö задачасö.

Вера Николаевна Виталиклы пуктіс двойка.

Виталик пуксис парта сайö, видзöдліс двойка вылас да шогысла кутіс йирны ручка помсö.

Перöсьыс чернилаыс друг войтыштіс веськыда дневникас. Буретш двойка вылас веськалі.

Рытнас батыс юаліс Виталикльыс:

— Мыйла тайö кляксаыс тэнад дневникын?

— Да сідз, тöдлытöг.

Ачыс гөрдöдіс яндзимысла.

Виталик рытивбыд велöдіс урок.

Аскинас Вера Николаевна бара корис Виталикöс дöска дорö да тшöктіс- решитны задача. Виталиклөн дзик пыр артмис задачаыс.

Вера Николаевна ошкис Виталикöс да пуктіс дневникас четвёрка.

С. Баруздин серти.

Кы въяс: *тшöктіс, буретш, яндзимысла, рытивбыд, четвёрка.*

## План.

1. Мыйла Виталик пöлучитіс двойка?
2. Мыйла батыс эз казав двойкасö?
3. Мыйла Виталик аскинас вермис пöлучитны четвёрка?

## Задание.

Правильнöя гижöй **рытивбыд** кыв да тайö кывнас думыштöй предложение.

## Куим ёрт.

Школаö мунігөн Витя воштіс завтраксö. Ыджыд перемена дырйи ставөн кутісны завтракайтны, а Витя сулаліс бокрын.

Витя дорö матыстчис сьлөн ёртыс — Коля. Сійö юаліс Витялысь, мыйла сійö оз завтракайт. Кор Коля тöдмаліс, мый ёртыслөн вошöма завтракыс, кутіс янöдны Витяöс.

Матыстчис Витя дінö сьлөн мöд друг — Миша. Кор тöдмаліс, кызди Витялөн вошöма завтракыс, сійö велöдис водзö вылö пуктыны завтраксö сумкаö.

А Володя, Витялөн коймöд ёртыс, нинöм эз юасы Витялысь. Сійö шöри чегис выя нянь шöрöмсö да джынсö сетіс Витялы.

*В. Осеева серги.*

К ы в ъ я с : завтрак — тани: выя нянь; зеп, водзö вылö.

## План.

1. Ыджыд перемена.
2. Коля янöдö Витяöс.
3. Мишалөн сöвет.
4. Володя — настоящöй ёрт.

## Боты.

Баб быдлаысь корсис ассьыс ботысö. Некытысь эз аддзы. Ботыыс сьлөн вылькодь на вöлі. Сöмын пыдöсыс муртса розялыштöма. Баб думыштіс, эз-ö Вася внукуыс босьт.

Воис Вася школаысь. Баб юаліс сылысь боты йылысь. А Вася серöктіс да шуö:

— А тайо нө мый?

Баб видзөдліс вешалка улө. Чуймис: ботыыс сәни сулалө. Кутіс көмавы да ещө ёнджыка чуймис. Боты пыдөссө дөмөма да пыткас картон пунктөма. А картонасы гырысы букваон гижөма: «Дона баб, поздравляйта тәно Март 8-өд лунөн. Тәнад внук Вася».

Ю. Ермолаев серти.

Кы в ъ я с: *вилькодь, поздравляйта — чолөмала.*

**План.**

1. Мый корсис баб?
2. Коді босьтлөма ботысө?
3. Мыйла Вася босьтлөма бабыслысы ботысө?

## Сурка.

Отчид, өшинь дорын пукалігөн, ме кылі садыйсы норника никсөм. Мам кыліс жө никсөм шысө. Ме куті корны, медым меным петкөдласны, коді сәни бөрдө. Не-кымын минут мысти вайисны зэв ичөтик понпиөс. Сійө вөлі синтөм на, но зумыда нин сулаліс аслас чукля кокъ-яс йылас. Понпи зэв норника никсіс.

Меным зэв жаль лои понпиыс. Ме босьті сійөс да гарышті аслам дөрөмө.

Мам тшөктіс вайны блюдйын шоныд йөв. Недыр мысти понпи велаліс лакны йөвсө.

Сійө кадсянь понпи эз вешйыв ме дінысы. Ме верді сійөс луннас некымынысы.

Понпилы сетім Сурка ним.

Сурка быдмис да лоис неыджыд дворняжкаон. Сійө оліс миян ордын дас сизим во, и, дерт, эз комнатаын, а ывлаын.

С. Аксаков серти.

Кы в ъ я с: *некымын, блюдйын, дворняжка — понъ-яслөн порода; дас сизим.*

**План.**

1. Кутшөм шы кыліс садыйсы?
2. Коді никсіс сәни?
3. Кутшөмджык вөлі понпиыс?
4. Кутшөм ним сетісны понпилы?
5. Кутшөм лои понпиыс быдмөм бөрас?

## Задание.

Гижой дженьыдик изложение коймод морт нимсянь.

### Примерной текст.

#### СУРКА.

Детинка кыліс садйысь нориника никсём. Сэні вёлма ичотик понпи. Понписо пыртисны керкао. Детинка гартыштіс сійос аслас дөрөмө. Сэсся вердіс шоньд йёлөн. Детинка да понпи вёліны век отлаын. Понпиыслы сетісны Сурка ним. Сійо быдмис да лои недждыд дворняжкаоң. Сійо оліс дас сизим во.

### Виччысьоны скворечьясөс.

Көдзыд төвлы лои пышйыны збоя матыстчысь тулысысь. Көдзыд воздухыс небзис. Шондіыс лышкыда койис зарни югөрьясө му вылө. Шочиника буситыштавліс нин шоньд зэр.

• Талун «Лэбачьяслөн лун».

Урокьяс помасьём бёрын пионерской дружина стройон муніс туй кузя. Ставныслөн кианыс скворечникьяс: пөвйысь, фанераысь, весиг туисысь. Лунвывса лэбачьясөс октябрыта да пионерьяс виччысисны гөстьясөс моз, дасьтісны налы лөсьыд квартираяс. «Кымын сквореч кутас сывны мян сиктын! Мыйта ковтөм гагьясөс бырөдасны зіль лэбачьяс!»— радлісны челядь.

Б. Безносиков серти.

Кы вьяс: «Лэбачьяслөн лун», скворечникьяс, виччысисны.

### План.

1. Кыдзи тулыснас вежсис ывлаис?
2. Кыдзи пионерской дружина лөсьөдчис «Лэбачьяслөн лун» кежлө?
3. Кутшөм пөльза вайоны скворечьяс?

### Задание.

Асланыд изложениео пыртөй татшөм предложение:  
«Шондіыс лышкыда койис зарни югөрьясө му вылө».

## Лопи.

Лопи — Вашка юлөн вож. Лопиын олігөн ме частё ветлывлі пожома ягё. Небыд яла вылын сулалёны сись кодь веськыд пожомьяс. Налён стволас некутшём ув абу, сёмын дзик йылас шапка моз шляпнитчёмаёсь лысьяс. Татшём ягтіыс ветлігөн óta-мёдтё аддзан зэв ылісянь.

Ветлывлі и видз вылё, кёні быдмёны льём пуяс. Быдмёны найё чукөрөн-чукөрөн, абу джуджыдёсь, но сы пыдди чукляёсь да уна вожаёсь. Татшём льём пуяс костті сьёкыд писькёдчыны. А Лопи берег дорысь ми аддзылім быдса льём пу роцца. Сёмын кёнсюрё сьёд сэтёрлөн óta куст паныдасьлас.

Уна мичатор, уна шензьёданатор позьё аддзыны рёднэй вёр-ваысь.

*Л. Палкин серти.*

Кы въяс: *Лопи, Вашка, шляпнитчёмаёсь, óta-мёдтё, чукөрөн-чукрөн, кёнсюрё, шензьёданатор, вёр-ваысь.*

### *Заданиеяс.*

1. Лыддьёй да лёсьёдёй план.
2. Изложениетё гижёй коймёд морт нимсянь.

## Салдатскёй юкмёс.

Коркё мян сикт дорын салдатьяс велёдчисны лыйсьыны, кодйыны окопьяс.

Вёлі зэв жар. Ёти салдатлөн горшыс кутіс косьмыны. Босьтіс сійё зыр да кодйыштіс гёптор. Регыд мусьыс кутіс петны сёдз ва. Юыштіс васё салдат да муніс.

Мёд салдат джудждёдыштіс гёпторсё. Юыштіс васё ачыс да ёртьясыслы нуис.

Аскинас салдатьяс вайисны керьяс да вёчисны сруб. Кодкё на пнысь сюмёдысь вёчис кёш да ёшёдіс сійёс юкмёс дорын быдмысь пу вылё.

Регыд салдатьяс мунісны мян сиктысь да сэсся эз нин воыны. А юкмёс коли. Ваыс сэні сёдз да чёскыд. Сиктса йёз юёны сэтысь васё да бур кывйён казьтывлёны салдатьясёс. А юкмёсё и ёнёдз салдатскёйён шуёны.

*«Мурзилка» журналысь.*

Кы въяс: *джудждёдыштіс, казьтылёны, сруб.*

## План.

1. Мыйла сиктö волісны салдатыяс?
2. Мый вöчис öти салдат?
3. Мый вöчис мöд салдат?
4. Мый вöчисны аскинас салдатыяс?
5. Мыйла сиктса йöз казтылöны салдатыясöс?

## Динка.

Тайö вöлі война лунъясö. Партизанъяслы самолётöн вайисны Динка понйöс.

Öтчыл партизанъяслы сетісны задание: взорвитны железнодорожнöй состав. А кöрт туйсö видзисны врагъяс. Партизанъяс босьтісны сьöрсьыныс Динка понйöс.

Со тыдовтчис эшелон. Партизанъяс сетісны Динкалы команда:

— Öдйö, öдйö, Динка!

Динка котöртіс кöрт туй вылö да пиньнас заводитіс чайыны мыш вывсьыс тубрассö. Тубрасыс мыш вывсьыс уси, и Динка котöртіс бөр.

Регыл мысти кыліс взрывлөн шы. Вагонъяс путкыльтчисны насып öтар-мöдар бокö.

Партизанъяс тайö кадас вöліны ылынöсь нин. Динка понйыс сүөдіс найöс кок туй сертиыс.

*«Пионерской правда»* газетысь.

Кы въяс: *взорвитны, железнодорожнöй состав, сьöрсьыныс, эшелон* — тани: паровоз да вагонъяс; *насып öтар-мöдар бокö, кок туй.*

## План.

1. Көр да кытчö вайисны Динка понйöс?
2. Кутшöм задание сетісны партизанъяслы?
3. Коді да кызди отсаліс партизанъяслы выполнитны заданнесö?
4. Кызди Динка адзис партизанъясöс?

## Кань да ёж.

Гортын миян эмöсь кань да ёж. Öтчыл кань водіс джоджö да кутіс видзöдны ёж вылö. Ёж кутіс видзöдны кань вылö. Матыстчис ёж дінö кань да лапанас вөрзьöдіс сійöс. А ёж дзедис асьыс юрсö да чургöдіс емъяссö.

Каньлөн лапаыс сутшкысис емъясас. Кань вешйис бокö да заводитис нювны лапасö.

Рытнас ёж заводитис котравны. Кань дыр видзöдис сы вылö, окота лои сыкöд котралыштны. Чеччыштіс ёж вомöн, и емъясыс лапаяссö эз сутшкыны.

Кань заводитис ворсны ёжкöд. Окота лои каньлы кватитны ёжöс. Чеччыштіс сы вомöн да бара бытшкис лапасö.

Сэксянь кань дугдис ворсны ёжкöд.

*А. Бостром серти.*

Кы в ъ я с: *ёж, вöрзьöдис.*

#### План.

1. Кань да ёж.
2. Кань ворсö ёжкöд.
3. Мыйöн помасис каньлөн ёжкöд ворсöмыс?

### Смел детинкаяс.

Рытнас Юра да Витя видзöдисны телевизор пыр кино «Максимлөн юность». Друг öшиньö швачкис гöрд югөр. Вöлöмкö, сотчö орчча керкаыс.

Челядь уськöдчисны ывлаö. Керка вевтыс вöлі сотчöнин. А öдзöсас öшаліс томан.

Витя да Юра чепöсйисны öшинь дорö. Найö жугöдисны öшиньсö да пырисны керкаö. Керка тырыс тшын. Тшыныс сёйис налысь синъяссö.

Öти комнатаын крöвать вылын узисны квайт арöса Валя да нель арöса Оля. Юра да Витя кватитисны посни челядьöс да петкöдисны öшинь пыр ывлаö.

Друг пытшкöс комнатаас кыліс горзöм шы. Юра да Витя пыр жö гөгөрвоисны, мый тайö Саша. Челядь бара уськöдчисны сэтчö. Кökъямыс арöса Саша куйліс джоджын да ымзис.

Юра да Витя кыскисны ывлаö и Сашаöс.

Татшöмöсь миян пионеръяс.

*«Пионерскöй правда» газетысь.*

Кы в ъ я с: *сотчö, орчча.*

#### План.

1. Мый друг аддзисны Юра да Витя?
2. Кыдзи детинкаяс петкöдисны сотчысь керкаысь посни челядьöс?
3. Юра да Витя — настоящöй пионеръяс.

## Январь скӧралӧ.

Миян Коми республикаын январь лыддыссьӧ медся кӧдзыд тӧлысьӧн.

Январын частӧ пӧльтӧны кӧдзыд тӧвъяс Карскӧй моресянь. Сэки температураыс друг усьлывлӧ 40—50 градусъясӧдз. Та вӧсна и важ йӧз шулӧмаӧсь: «Январь-батьюшка — кӧдзыд, февраль — турӧб».

Январын шондіыс зэв шоча петкӧдчывлӧ. Войясыс кузьбӧсь. Усьӧ уна лым. Лым шебрасыс бура видзӧ мусӧ кынмӧмысь. Но кор тӧлыс пӧльтӧ рытиввывсянь, повед-дяыс шондӧдӧ.

Кы въяс: *Карскӧй море, январь-батьюшка, рытив-вывсянь.*

### План.

1. Январь — медся кӧдзыд тӧлысь.
2. Важ йӧзӧн шуӧм пӧслӧвича.
3. Сетӧй описание январь тӧлысьлы.

### Задание.

Асланыд наблюдениеяс серти висьталӧй, кутшӧм вӧлі январыс таво.

## Сиктса асыв.

Муртса на кыпӧдчыштас керка сигӧръяс весьтӧ шонді, заводитӧны гольскакывны кильчӧ ӧдзӧс каличьяс, дзуртны кильчӧ посьяс.

Видзӧдлан улич вылӧ, тэрыб вӧраса зіль нывбабаяс тэрмасьӧны нин керӧс горув, кӧні муртса дзользьысь шорбокын нюжӧдчӧмаӧсь скӧтнӧй картаяс.

Артыштны кӧ ставсӧ, мыйта татысь мӧдӧдӧма йӧвсӧ маслзаводӧ! А мыйта выйсӧ мӧдӧдӧма! Эз этша йӧзӧс вердны войвывса сиктьясид.

*И. Изъюров серти.*

Кы въяс: *Керка сигӧръяс, гольскакывны, дзользьысь, асывводз, быттӧ.*

### Задание.

Лыддӧй да висьталӧй текстыслысь содержаниесӧ.

## Тöлын вуграсьöм.

Иизьöма ты, вöв нин лыбас. Выль лым кызакодъ шлапкöма-усьöма.

Гожöмын тайö тыас гыбалöны сынпиян, ызöдчöны сиръяс.

А төвнас? Төвнас тыяс бытьö кулöма. Чайтан öмöй, мый чери вермас шедны? А, вöлöмкö, шедö.

Локтан водз асывнас ты вылö, корсян сувтанін, пöрчан ноптö, перьян сесь дженьыдик шатина төвся вугыр — аслыспöлöс кыснан. Сьöрсьыд ваян тшöтш и пыридз. Розьöдан йисö, лэдзан сэтчö кыснантö да заводитан вуграсьны. Нинöм оз шед, кöсьян нин бөр гортад мунны, и сэки кыснаныд бытьöкö кытчöкö крукасяс. Лэптан лым вылö öзьян бордья ёкышöс. Радыдла весиг ыркмунлö сьöлöмыд. И тадзи лунтыр пукалан йöрдан дорын.

А рытнас ёкыш юква панялан.

Г. Юшков.

### Задание.

Лыддьöй текстсö да висьталöй, кызди чери кыйысьяс вуграсьöны тöлын.

## Чапаев олöмысь.

Чапаевъяслөн семьяыс оліс гöля. Васялы водз ковмис отсасьны бать-мамыслы. Гожöмнас сійö пастукавліс, төвнас ветывліс вөрö песла.

Кор Вася быдмыштіс, батыс сетіс сійöс озыр купеч ордö. Сэні Вася мыськавліс магазиньсь джоджъяс, котравліс кытчö ыстывлісны, ваяліс складьсь төвар. Эз öтчыд Вася кывлы, кызди купеч велöдліс ассьяс отсасьысьяссö:

— Вузасьнытö абу сьökыд. Главнöйыс — пöрйöдлыны ньöбасьысьöс.

Но Вася быдмис честнöй зонкаөн. Сійö муніс купеч ордысь, а мунігас сылы шуис:

— Весьшөрö тэ ошйысян, мый ставсö верман вöчны. Эн вермы тэ менö жуликөн вöчны.

В. Баныкин серти.

Кы в ъ я с: *бать-мам, весьшөрö* — прöстö; *купеч* — озыр тöргöвеч.

## План.

1. Васялөн челядь дыр.
2. Вася уджалө купеч ордын
3. Вася — честной зонка.

## Задание.

Висьталөй, мый ещө лыддывлінныд Чапаев йылысь.

## Щорс йылысь висът.

Гражданскöй войнадырся знаменитöй герой Щорс вöлі повтöм мортөн.

Отчид ёртъясыскöд Щорс муніс туй кузя легкöвöй автомобильөн. Щорслөн ёртъясыс вöлі вооружитчöмаöсь, вöліны налөн и гранатаяс.

Туйыс муніс паськыд муяс вомөн.

Видзöдö Щорс: налы паныд бус кымөр пытшкын тövзö-локтö грузöвик. Грузöвик тырыс вооружитчöм йöз. А машинаас крепитöма петлюровскöй флажок.

Тövзöны машинаяс öта-мöдлы воча, кежны налы не-кытчö. Сöмын муртса позьö вежөн прöйдитны.

Щорслөн ёртъясыс кутчысисны оружиеö.

Петлюровецъяс казялісны жö Щорслысь машинасö да мöдісны öвтчыны кияснас, тшöктöны сувтны.

Со машинаясыс дзик нин орччаасисны. Щорс босьтіс граната да шыбитіс сійöс веськыда машина кузовас.

Куим секунд мысти найö мыш сайын кыліс гымöбтöм: взорвитчис граната.

*Н. Тихонов серти.*

*Кы в ъ я с: войнадырся, вооружитчöмаöсь, нюжаліс, петлюровскöй флажок, петлюровецъяс — белöйяс; öта-мöдлы воча, взорвитчис.*

## Задание.

Сетöм план серти гижöй дженъыд изложение.

## План.

1. Щорс да сылөн ёртъясыс казялöны петлюровецъясöс.
2. Кык машина локтöны öта-мöдлы воча.
3. Кудъяс петкöдлісны смеллун да сюсьлун?

## Ловья шляпа.

Шляпа куйліс камод вылын. Каньпи пукаліс джоджын, камод дорын. Вовка да Вадик рисуйтчисны.

Друг на мышкын мыйкө уси джоджө. Найö бергөдчылісны да аддзисны джоджысь шляпа.

Вадик кöсйис лэптыны шляпасö, но шляпаыс кутіс кыссыны сылань, муніс комната шөрөдз да сувтіс. Челядь полігтыр видзөдісны шляпа вылө. Сэсся шляпа бергөдчис да кутіс кыссыны диванлань.

Детинкаяс босьтісны кухняысь картупель да кутісны лыйлыны шляпаö. Лыйлісны, лыйлісны, сэсся и веськалісны шляпаö. Шляпаыс тай кызди чеччыштас вывлань! Сы улысь тыдовтчис руд бөж, лапа, а сэсся и каньпи петіс.

— Васька!— любö лои челядьлы.

Вадик кватитіс Васькаöс да заводитіс кутлыны. Каньпи сöмын куньтыраліс синъяссö.

Челядь гөгөрвоисны, мый каньпи пукаліс джоджын, а шляпаыс усьöма сы вылө камод вывсянь.

*Н. Носов серти.*

Кы в ъ я с: *камод* — шкап; *куньтыраліс*, *каньпи*, *кухня*.

### План.

1. Кызди каньпи веськаліс шляпа улö?
2. Мыйла детинкаяс повзисны шляпаысь?
3. Кызди найö дорйысисны «ловья» шляпаысь?
4. Коді вöлöма шляпа улас?

## Дöлалö пионерскöй флаг.

Эжва ю веськыдладор берегын, пожöма ягын, пионерскöй горн быд асыв чуксалö челядьöс линейка вылө. Барабанъяс шы улын мачта йылö кыпöдчö пионерскöй флаг. Тадзи заводитчö луныс «Белöй Бор» пионерскöй лагерын. Тані шойчöны уна нывкаяс да зонкаяс.

Лагерын кадыс кольö вывті öдйö. Быд лун челядьöс виччысьö мыйкө вьлитор. Медводз найö лöсьöдісны клумбаяс, футбольнöй да волейбольнöй площадкаяс, бөрйисны медводдза походлысь маршрут. А томиник чери кыйысьяс ветлісны вуграсьны. Кутшöма нимкодясисны найö, кодьяслы шеді медуна чери. Кутшöм чöс-

кыд вöлі ас пуом юкваш! Рытъяснас юргöны гажа сьыланкывъяс. А спортивной площадка вылын спортсменъяс петкöдлöны асьыныс пельклунсö.

«Югыд туй» газетысь.

Кы въяс: *футбольной да волейбольной площадкаяс, маршрут* — тани: походö муна туй; *спортсменъяс.*

### План.

1. Кыдзи заводитчö асылыс пионерской лагерын?
2. Мый вöчöны челядь луннас?
3. Кыдзи коллялöны пионеръяс рытъяссö?

### Задание.

Висьталöй сы йылысь, кыдзи тi шойчанныд пионерской лагерын.

## Валя.

Челядь ворсисны лыа чукöр вылын. Детинкаяс стрöитисны крепость. А Валя ворсис Андリュша вокыскöд. Вокыс вöлі ичöт на, кысъясис бауөн.

Друг колхозной сарай дорсянь кылис горзöм:

— Понйыс чеп йылысь орöдчöма!

Челядь ставныс пышйисны. Валя тшöтш жö котöртис потшöс сайö. Лыа чукöр вылö колис ичöтик Андリュша. Сийö зэв ёна бöрддзис.

Валя бöр уськöдчис вокыс динö да сайöдис сийöс мышнас. Пон котöртис веськыда на вылö. Сийö матын нин. Валя кватитис киас совок да мый вынсьыс горöдис:

— Мун татысь!

Пон бöрся вöтчис стöрöж. Сийö кутис понйöс.

Детинкаяс яндысьöмпырысь локтисны лыа чукöр дорö. А Андリュша пукалис да нюмъялис нин.

Н. Артюхов серти.

Кы въяс: *орöдчöма, яндысьöмпырысь.*

### План.

1. Кодъяс ворсисны лыа чукöр вылын?
2. Мыйла повзисны челядь?
3. Кыдзи Валя дорйис воксö? Мыйла сийö эз повззы?
4. Мыйла детинкаяслы лон яндзим?

## Сьöлаяс.

Вöравныд, дерт, абу кокни: унаысь кöтасьлан, пöсьлан, мудзлан. Но ме радейта вöтлысьны сьöлаяс бöрся. Тайö сера пöткаыс гулюысь абу ыджыд, но сюсь да тэрыб. Да и быть колö лоны сюсьöн да тэрыбöн, кор эмось уна врагыяс: сьöла бöрся кыйсьöны не сöмын вöралысьяс, но и тулангыяс, ручьяс, варышьяс.

Гожöмнас сьöлаяс олöны позтырöн. Водз асывнас на мамыс нуöдас ассыс пиянсö вотöса местаö, кöни быдмöны чöд-чöдлач. Найö шыръяс моз котралöны турун пытшкöд, велöдчöны корсьны сёян-юан.

Казялас кö мам-сьöла зверöс либö мортöс, сийö пыр жö чипöстас, а сьöлапиян öти здукöн дзебсяласны.

Вочасöн сьöлапиян быдмöны, лоöны гырысьсьöсь. Сэсся торйöдчасны мам дiнысь, кутасны овны-вывны ас кежас.

*И. Коданёв.*

Кы въяс:<sup>1</sup> *радлун, тэрыб, позтырöн, чöд-чöдлач, сёян-юан, öта-мöдныслы, овны-вывны.*

### *Заданиеяс.*

1. Гижöй сущестительнойяссö: чöд-чöдлач, сёян-юан. Татшöм сяма кывъяссö думыштöй асьныд да гижöй тетрадяныд.
2. Гижöй выборочной изложение сетöм план серти.

### **План.**

1. Сюсь да тэрыб сьöлаяс.
2. Сьöлаяс гожöмын.
3. Сьöла-мам тöждысьö пияныс вöсна.
4. Сьöлапиян торйöдчöны мам дiнсьыс.

## Воис тулыс.

Ульöв кодъ небыд төв лунвывсянь пöльтö, вайö чöскыд кöр, лöсьыда чужöмад öвтö... Енэжын шондiыс выли нин ветлö. Сывны нин вöрзьöма лым. Гож водзын лöзöдö, сöникö пöрö. Толаыс ляпкалö, чинö

Öдзöсыс тулыслөн паськыда вöссьö.

Ивлаын гораммö, бытьöкö виль мыськöм, пелькöдöм керка. Гажа сэн, гора и кыпыд. Енэжыс кыптö зэв вылö. Кымөрьяс качöны.

Вөссьöма вөр пу йыв. Гылалö-шупкысьö ув вылысь тукта. Лым ваён мыссьöмаöсь лысьяс.

Тёпкө-виялө вевт вылысь войтва...

Со и гож водзё петёма курөг, лажъялө-ветлөдлө ньөжйөнник, тшапа. Петуклөн чуксасьём кылө. Долюд-джык кажитчө ракалөн кравзём. Со детинка керкаысь ывлаө петис, керкаын тулысын гажтём. Письтөмаось шоръяс... Гөгөр дзик ловзьёма, нюмъялө-сьылө.

В. Чисталёв.

К ы в ъ я с: *ульёв кодь, сөник, гылалө-шупкысьё; тёпкө-виялө, нюмъялө-сьылө.*

### **Заданиеяс.**

Лыддьой висьтсө да корсьой образной кывъяс да выражениеяс. Гижой найос тетрадяныд.

2. Висьтыслысь первой абзацсө велөдөй наизусть да гижой сійос память серти,

## Ошкөд паныдасълөм.

Тайө лои гожөмын. Федя Мальков вотис тшак да мөдөдчис нин гортас. Друг мыйкө тратшмунис. Федя бергөдчис да аддзис зэв ыджыд ошкөс. Ош казялис детинкаос да веськөдчис сылань.

Федя шыбитис көрзинасө да өти здукөн кавшасис пожом вылө, ош — сы бөрся. Федя вылөджык кайис, а ош оз кольчы. Ош кучкис лапанас Федялы кокас. Но сэки увйис, көни пукалис ош, чегис. Ош шнөпкысис-усис муө, но пыр жө бөр кутис кавшасьны эргигтырйи пу йылө. Федя зэв матысь аддзис ошлысь скөр синъяссө да жергөдөм вомсө.

Сэки детинка шыбитис ошлы веськыда синмас асьыс кепкасө. Ош друг равөстис да бара уси муө. Но звирк чеччис да уськөдчис вөрө. Со кутшөма повзис ош!

Федя спаситчис.

К ы в ъ я с: *шнөпкысис-усис, эргигтырйи.*

### **План.**

1. Федя аддзис ошкөс.
2. Федя да ош.
3. Мыйла ошкыс пышйис?

### **Задание.**

Изложениеаныд пыртөй татшөм глагольяс: **тратшмунис, шнөпкысис-усис.**

## Знамя.

Лесник Иван Дмитриевич кытшовтіс аслас вөр участокті. Водзвылас котөртіс Барс нима понйыс. Иван Дмитриевич эз и казьяв, кыдзи воис Кукушкиноөдз, көні война дырйи мунісны чорыд тышгъяс. Друг лесник аддзис муөн тырөм землянка. Сійө весалис пыранінсө да пырис сэтчө. Барс пыр жө заводитіс парсавны мусө землянка пельөсысь. Сэні вөлөма плащ-палатка, а сы пытшкын знамя.

— Эз кө аддзы менам Барсөй, ме эськө эг аддзы тайө знамясө,— шуис лесник, кор сдайтіс знамясө военкоматө.

«Пионерскöй правда» газетысь.

Кы въяс: *кытшовтіс, Кукушкиноөдз, землянка* — му пытшкө вөчөм оланін; *плащ-палатка, военкоматө.*

### План.

1. Кытчө воис лесник?
2. Мый сэтысь аддзис сійө?
3. Мый аддзис землянкаысь Барс?
4. Кытчө нуис знамясө лесник?

### Задание.

Думыштöй висът сы йылысь, кыдзи миян салдатгъяс тышкасисны Кукушкино сикт вөсна, кыдзи землянкаас кольөма знамяыс.

## Сöветскöй морякгъяс.

Сöветскöй корабль кывтіс Краснöй мореөд, Койн ді пөлөн. Друг миян морякгъяс казьялісны сигнал: «Висьмис смотритель, корам отсавны». Сöветскöй корабль веськөдчис ділань. Ді вылө петісны врач да капитанлөн отсасысь.

Сэні найө төдмалісны, мый кык лун нин куйлө висъысь смотритель. Сöветскöй врач пырысь-пыр жө видлаліс сійөс да сетіс лекарство.

Смотрительяс пиысь öти висъталіс:

— Кык лун нин öшаліс сигналыс. Уна корабльяс прöйдитісны ді пөлөн. Но некод эз кеж отсавны висъысь мортлы. Сöмын сöветскöй морякгъяс отсалісны сылы.

Кы въяс: *Койн ді, Краснöй море, пырысь-пыр, смотритель* — тані: маяк вылын би öзталысь; *маяк* — башня, көні öзйө корабльяслы туй индалөм вылө би.

## План.

1. Кыті кывтис сѳветскѳй корабль?
  2. Мый казялісны сѳветскѳй морякъяс?
  3. Кытчѳ матыстчис миян корабль?
  4. Мый лоѳма ді вылын?
  5. Кутшѳм отсѳг сетис висысылы сѳветскѳй врач?
  6. Мый висьталіс смотритель? (Гижѳй та йылысь веськыд сѳрни-  
тѳг.)
-

### 3 класс

## Ильичлөн заветъяс серти.

Коми край, кызди и став Сöветскöй Войвыв, Великöй Октябрьскöй социалистическöй революцияöдз вöли Россия медся кольччысь районъяс лыдын.

Войвывлысь озырлунсö вöли тöдмалöма омöля, да и тöдса озырлунсö эз используйтны. Предпринимательяс интересуйтчисны сöмын сийöн, мый позис босьтны вөрваысь öдйöджык да ичöтджык рöскöдъясöн. Республикаын вöлины сöмын негырысь промышленнöй предприятияс.

Öнi Коми АССР лоис Сöветскöй Войвылын зэв озыр кладöвöйöн. Республика сетö из шом, нефть, газ, сов, уна сикас строительнöй материалъяс. Республика озыр вөррöн. Вöрсыс вöчöны фанера, целлюлоза, бумага, картон, древеснöй плитаяс.

Республикаын эм вынйöра энергетическöй база. Уджалöны нель ыджыд электростанцияс Воркутаын, Интаын, Ухтаын да Сыктывкарын да посни электростанцияс. Печораын стрöйтсö ыджыд ГРЭС.

Октябрьскöй революцияöдз Коми крайын öдва кужлисны кырымасыны да сiдз-тадз лыддысьны населениелөн сöмын нельöд юкöныс. Öнi республикаын уджалöны вузъяс да училищеяс, кöни велöдчöны уна тысяча том йöз.

«Войвыв кодзув» журналысь.

Кы въяс: Россия, Войвыв, предпринимательяс, фанера, целлюлоза, ГРЭС, сiдз-тадз, вузъяс, училищеяс, кладöвöй.

### Задание.

Лыддöй да лöсьдöй план. План сертиыс висьталöй текстыслысь содержаниясö.

## Мортлөн кок туй.

Отчуд Володя Ульянов да сълөн ыджыдджык вокыс Саша мунисны вѳрти. Мунисны найѳ кутшѳмкѳ морт кок туй кузя. Кок туйыс муртса-муртса тѳдчис. Со мортыс ѳшѳдѳма шор дорѳ сямѳд чибльѳг. Позьѳ сѳдз ва юыштны. Со шор вомѳн потшьяс пуктѳма. Позьѳ вуджны и коктѳ не кѳтѳдны. Со трѳпа вывсьяс шыбитѳма ыджыд вужля.

Володя нюмъялѳ. Сэсся шуѳ: «Кутшѳм лѳсьыд, мый миян водзын мунѳма зѳв шань морт. Мыйта буртор сийѳ вѳчѳма». Чуймис Саша Володялѳн тѳлка сѳрни вылѳ, сывыйштис сийѳс да шуис: «Вот тадзи и колѳ олѳмын быдѳнлы вѳчны сѳмын буртор».

Кы в ѳ я с: *морт кок туй, чибльѳг — сямѳдыс вѳчѳм кѳш.*

### План.

1. Володя да Саша мунѳны вѳрти.
2. На водзын мунѳма шань морт.
3. Володя да Саша костын сѳрни. (Гижѳй веськыд сѳрнитѳг.)

## Вѳр.

Югдѳ. Лѳз тѳдчѳ ягын. Сулалѳ-вугралѳ вѳр. Оз шыѳдчы, оз вѳрзьи — чѳв. Нѳмѳвѳйся сывтыръя пожѳмъяс, быттьѳкѳ дзор багатыръяс, орчѳн-орчѳн сувтѳмаѳсь, сынисадь узьѳны. Кымын тѳв и гѳжѳм нин найѳ нѳмъясын вѳлис! Кымынысь нин кынмывлис-унмовсьлис тѳв кежлѳ вѳр, садьмывлис-шувгылис тулысын!

Локтисны йѳз, тракторъяс. Шызис сынѳдыс ягын... Лѳзгѳны-пѳрѳны пуяс... ѳти, мѳд... уна нин водис. Оз нин аддзывны пожѳмъяс тавося тулыс. Мед но. Найѳ мортлы бур вылѳ мунѳны.

В. Чисталѳв.

Кы в ѳ я с: *сывтыръя пожѳмъяс, сынисадь, лѳзгѳны-пѳрѳны.*

### План.

1. Сулалѳ-вугралѳ вѳр.
2. Шызис сынѳдыс ягын.

## Задание.

Гижой изложение да пыртый сэтчө татшөм глагольяс: кынмывліс-унмовсыліс, садьмывліс-шувгыліс, лөзгөны-пөрөны.

### Сад кутас быдмыны.

Гөра йылө, изъяс костө, быдмөма дикой яблоня. Гашкө, төв татчө койдыссө вайис, гашкө, морт уськөдіс.

Оти нывка частө кайлывліс сэтчө дзоридзьяс вотны. Сийө пукавлывліс тайө ичотик яблоня дорас. Отчюд нывка перйис тайө пусө вужнас. Лэччөдіс да садитіс школа йөрө. Мөд луннас сийө киськаліс пусө. Яблоня ловзис. А сэсся мөдысь локтіс киськавны пусө, а сийөс кодкө киськалөма нин. Вөлөмкө, челядь тшөтш заводи-төмаөсь дөзьоритны пусө.

Сэсся тыдовтчисны нэриник розөвөй цветьяс. Сэки челядь шуисны татчө жө ещө садитны пуяс, мед яблоня-ыслы оз ло гажтөм. Челядь бура дөзьоритісны, и ни оти пу эз косьмы.

Школа помалөм бөрын найө тшөктісны садсө дөзьоритны посныдджык челядьлы. Сад кутас быдмыны!

«Пионер» журналысь.

Кы в ъ я с: *нэриник* — слабиник; *яблоня*.

## План.

1. Гөра йылын яблоня.
2. Нывка садитө сийөс школа йөрө.
3. Челядь дөзьоритөны яблонясө.
4. Школа йөрын быдмө сад.

## Ар.

Куим лун чөж нин гудрасис ывла. Гурйив восьтөм сарай өдзөсөд моз вөр пытшкө пөльыштлас төв. Гырысь пожийөн пожналыштас катшашыдөс. Ставыс заводитлас пөдны сапкөмөн усьысь лымйөн. Турөб отувтлас мусө и небесасө. Вына вөлөма тавося ар пом. Нельөд войнас сийө яра уськөдчис локтысь төвлы паныд, а югдандорыс бөр заводитіс сывны.

В. Юхнин.

Кы в ъ я с: *гудрасис ывла* — поводдяяс вөлі лөк; *гурйив, катшашыдөс, югдандорыс*.

### **Заданиеяс.**

1. Лыддьой висьтсё да висьталёй содержаниесё.
2. Висьталёй, мыйкөд сравнитёма авторыс төвлысь пöлыштёмсö, катшашыдöслысь усьёмсö.
3. Думыштöй да лöсьöдöй план. План сертиыс ещö öтчыд висьталёй содержаниесö, сэсся гижöй.

### **Примернöй план.**

1. Гудрасьö ывла.
2. Сапкö-усьö лым.
3. Бара заводитис сывны.

## Му шар гөгөр.

(Ю. Гагарин выступлениеысь.)

Ме кöсья висьтавыны неуна сы йылысь, мый ме аддзылі Му шар гөгөр лэбигөн.

175—300 километр вылнасянь Муыс зэв лöсьыда тыдалö. Зэв бура тыдалöны джуджыд гöраяс, ыджыд юяс, паськыд вöръяс, дiяс.

Зэв лöсьыда тыдалöны кымöръяс. Небесаыс дзик сьöд. Кодзувъясыс кажитчöны ыджыдджыкöсь.

### **Задание.**

Висьталöй, мый аддзыліс Юрий Гагарин Му шар гөгөр лэбигөн.

## Тешкодь дружба.

Бать вайис мянлы ичöтик ручпиöс. Ручпиыс вöлі гөрдоват, пельясыс сьöдöсь. Сьöд синъясыс видзöдисны мян вылö полiгтыр. Ми сетiм сылы Рыжик ним да пыр жö домалiм кöv йылö.

Мян понным матыстчис руч дорö, исалис да долыда öвтыштiс бöжнас. А сэсся кутiс нювны ручпиöс ассьыс понписö моз. Первойсö Рыжик нинöм эз сей. Вочасөн сийö кутiс велавны йöз дiнö. Но медся ёна сийö лöсяліс понкöд. Найö öтлаын узьлісны чомйын. Тешкодь вöлі видзöдны, кыдзи чомйысь чурвидзöны кык ныр-вом.

Пон да Рыжик частö сейлісны öти дозйысь. Пон некор эз эргы сы вылö. Лун дас вит мысти ручпи дзикöдз велалис йöз дiнö.

«Пионер» журналысь.

## План.

1. Бать вайис ручпиѳс.
2. Ручпилѳн ортсыса видыс.
3. Пон да ручпи.

## Детинка мездысис.

Кузь тѳвбыд йи эшкын улын узьѳм бѳрын садьмис Печора. Гождя шондѳ шонтѳс дзор Уралсянь визувтысь кѳдзыд васѳ. Кѳть ыркыд на ваыс, но йѳз лѳччывлѳсны нин ва дорѳ купайтчыны.

Со челядь дасѳн кымын пѳрччысьѳмаѳсь да сулалѳны берег дорѳ домалѳм пур вылын. Найѳ котыртѳмаѳсь суналѳм кузя ордѳйсыѳм: кодѳ дырдзык кутчыяс ва улын да ылѳджык кывтас.

Ылѳджык пур дорсянь петывлѳс Костя Уткин. А Ваня зѳв зѳля суналѳс, но Костяѳ суѳдны эз вермы.

— Локтѳй татчѳ, петкѳдла ставныдлы, мый колѳ вѳчны, медым дырдзык кутчысыны ва пытшкын,— шуис Костя.

Медся нин сьѳлѳмсяныыс кывзѳс Костяѳ Ваня. Ѳнѳ сѳйѳ виччысис ставныслысь суновтлѳмсѳ. Медся ылѳдз бара на Костя мунѳс ва увтыс. «Но ѳнѳ ме Костяѳ пановта»— мѳвпыштѳс ас кежас Ваня да суныштѳс ваѳ. Здукѳн и люкасис сѳйѳ ва пыдѳсас. Сѳсся кѳсйис чѳпѳсйыны водзлань, но эз вермы, сѳйѳс быттьѳ кѳрталѳсны. Ваня повзис, восьтѳс синьяссѳ да аддзис: пу вужля костѳ йѳрмѳма юрыс. Ваня став вынсыс кияснас вештышталѳс пу вужьяссѳ да быльк петѳс ваысь нѳйтѳсь юра да повзьѳм синьяса. Сѳйѳ ѳдѳйѳ кавшасис пур вылѳ, висьталѳс челядьлы лѳѳмторсѳ.

Та бѳрын сѳсся челядь эз нин сунавны да ѳлѳдѳсны мукѳдѳс.

*В. Рочев серти.*

*Кывъяс: тѳвбыд, Печора, дзор, ва дорѳ, лѳччывлѳсны, пѳрччысьѳмаѳсь, виччысис, быльк петѳс, лѳѳмтор.*

## Задание.

Лыддѳѳй да асьныд лѳсьѳдѳй план. Сѳсся сы серти гижѳй дженьыд изложение. Изложениыдлы думыштѳй ним.

## Кор кит обедайтö.

Учёнöйяс лэдзисны ваö специальнöй прибор — гидрофон. Сы отсöгөн найö тöдмалöны море пытшкысь шыяс. Шыясыс сэнi вöлины уна пöлöсöсь — тайö «сёрнитисны» черияс. А öти шы, мукöдъясысь гораджык, кылис быд куим минут мысти. Мый тайö татшöмыс?

Дыр думайтисны учёнöйяс, и медбöрын найö гөгөрвоисны, мый тайö... кит. Тадзи тiпкö сылөн сьöлöмыс, сийö уджалö мотор моз. Но сьöлöмыслөн тiпкöмыс кылö сöмын сэки, кор кит восьтывлö вомсö, медым нбылыштны сёян.

Öнi учёнöйяс тöдöны: кылö кö пульсыслөн тiпкöмыс, кит обедайтö.

«Мурзилка» журналысь.

Кы въяс: *учёнöйяс, специальнöй, гидрофон, тiпкис, пульс.*

### План.

1. Кутшöм прибор отсöгөн учёнöйяс тöдмалöны море пытшкысь шыяс?
2. Мый эз вермыны зэв дыр тöдмавны учёнöйяс?
3. Мый серти учёнöйяс тöдмалöны китлысь обедайтöмсö?

## Аляскаын памятник.

Войвыв Аляскаын Ном нима посёлोकын заводитчис дифтериялөн эпидемия.

Öти морт доддялис понъясöс да мунис карö лекарствола. Карöдз понъяс воисны, а бөр локтигас заводитчис пурга. Понъяс мудзисны, эбöссьыс петисны. Кутчысис сöмын понъяслөн вожакыс. Нимыс сылөн вöли Балт. Морт, кодi веськöдлис понъяснас, кöрталис Балтлы мыш вылас лекарстова пакетсö да сетис команда:

— Водзö, гортö!

Балт котöртис сё километрысь унджык.

Балт воис посёлөкö. А некымын минут мысти нин доктор ветлöдлис керкаысь керкаö, медым спаситны висъысьясöс.

Тайö случай кузя Аляскаын сувтöдöма Балтлы памятник.

«Пионерскöй правда» газетысь.

Кы въяс: *дифтерия* — висъöм; *эпидемия* — заразнöй висъöмлөн паськалöм.

## План.

1. Кутшөм висьөм паськалис войвыв Аляскаын?
2. Коді муніс карö лекарстволә?
3. Кутшөм поводдя кыптис?
4. Коді спаситис висьысьясöс?
5. Кодлы сувтöдöма Аляскаын памятник?

## Йöзлөн пасьяс.

Вөр-ва радейтысьлы ывла вылад век öткодь муса — төв көть ар, тулыс көть гожөм. Торйөн нин шондиә лунö.

Со орчча пожөмö кодкө лөсас вöчлөма, мыйкө пасйылөма сэтчö, но он нин гөгөрво. А вылынджык — тув, чорыда на кутчысьö, сирөд пуысь, тыдалö, вöчлөмаöсь. Пестерсö ли нопсö шойччигас öшлывлөмаöсь.

Көнкө и вөр керкалы колö лоны. Гашкө, мөд ягын? Но, дерт, тайö ёль бокас жö. Гортсяньыд та ылнаын олигөн коми мортыд кузь да пемыд войястö көнсюрö эз коллявлы.

Йджыд да паськыд миян парманым, а уналаысь позьö аддзыны йöзлысь пасьяссö, кодъяс висьталасны тэныд унатор. йылысь.

*В. Торопов серти.*

Кы въяс: *вөр-ва, лөсас-пас, шойччигас, көнсюрö, эз коллявлы.*

## Задание.

1. Лыддьöй да коллективнöя лөсьöдöй план. Сэсся план сертиыс висьталöй статьяыслысь содержаниесö.

## Арся поводдя.

Пуксисны шляка сора кодзыд зэръяса лунъяс. Пöшти оръявлытөг пыр öтмоза лэччис муö ва.

Важөн гөрдөдисны да вижөдисны, а сэсся дзыкөдз росмисны кыдзяс, пипуяс. Пувъяс кисьмисны да смоль сьöдөдз гөрдөдисны.

Ар пом лои кузь, гажтөм. Важөн лунвывлань лэбисны гожся лэбачьяс. Лөзөдисны уръяс. Заводитисны еждөдны көчьяс. Но лым эз вөв. Сөмын шляпкыштас шляка сора зэр да асья кын му вылö сявкмулö катшашыдöс.

*И. Изгюров.*

Кы въяс: *шляка* — лым сора зэр; *оръявлытөг* — дугдывтөг; *смоль съөддөз*, *шляпкыштас*, *сявкмулө*.

**План.**

1. Кутшөм поводдя пуксис?
2. Кутшөмөсь лоисны пуяс, вотөс?
3. Кутшөмөсь лоины уръяс, көчьяс?

**Задание.**

Висьталөй асланыд наблюденияс серти, кызди вежсьоны арын пуяс. Опишитөй, кутшөм вөлі ар помыс таво.

## Көні ёжыс.

Сашалы да Машалы пөдаритисны ёжөс. Сійө оліс на ордын гожөмбыд. Челядь вердісны сійөс няньон да йөлөн.

Пуксис ар. Челядь шочджыка петавлісны ывлаө, ворсісны ёжкөд гортас. Но өтчюд сійө воши кытчөкө. Челядь корсисны, чуксалісны, но эз аддзыны. Найө юасисны гортсаясылысь. Садовник висьталіс, мый сійө төдө, көні ёжыс. Садовник нуөдіс челядьөс садйө. Петкөдліс кустьяс костысь му чукөр да шуис:

— Ме аддзылі, кызди ёж кодйис гу, ваяліс турун да пырис сэтчө. Оні сійө чорыда узьө, садьмас сөмын тулыс-нас. Энө вөрөдөй сійөс.

Челядь кывзисисны садовниклысь.

Воис гажа тулыс. Отчюд шонюд лунө ёж локтіс челядь дінө. Налы лои зэв нимкодъ!

*М. Быкова серти.*

**План.**

1. Кодөс пөдаритисны Сашалы да Машалы?
2. Мый лои ёжкөд?
3. Мый висьтавліс челядьлы садовник?
4. Кор бөр локтіс челядь дінө ёж?

## Медся джуджыд ты.

Му шар вылын медся джуджыд ты миян странаын. Сійө Байкал ты.

Байкал тыёс кытшалёмаёсь джуджыд гөраяс. Гөра-  
яссиянь визувтöны уна шоръяс, кодъяслөн ваис лэччö  
Байкалö.

Ваис Байкалын уна да пыр öтмында, көть сэсянь  
визувтö уна ваа Ангара ю.

Кы в ъ я с: *Байкал, кытшалёмаёсь, öтмында, Ангара.*

**План.**

1. Кутшöм ты мирын медся джуджыд?
2. Мый кытшалö тысö?
3. Уна-ö ваис Байкал тыын?
4. Кутшöм ю визувтö Байкал тысянь?
5. Ещö мый тi тöданныд Байкал ты йылысь?

Му шар вылын медся кöдзыд места.

Вöли кад, кор лунвывса олысьяс лыддылісны медся  
кöдзыд местаөн Войвыв Европаса странаяс. «Мыйла йö-  
зыс олöны сэтшöм странаын, кызди Англия?»— юавліс-  
ны найö.

Неважөн на йöз лыддылісны медся кöдзыдінөн Яку-  
тияысь Оймекон посёлок. Тöвнас сэні овывлö 70 градус  
кöдзыд. Тайö местасö шулісны «кöдзыд полюсөн».

А öні, кор миян полярникъяс кутісны изучайтны  
Антарктида, артмö, мый сэні медся кöдзыд. Сэні кöдзы-  
дыс овывлö 80 градусöдз. Весиг январын, кор сэні го-  
жöм, кöдзыдыс овывлö 40 градус.

Сідзкö, медся кöдзыд местаыс — Южнöй полюс.

Кы в ъ я с: *лунвывса, неважөн на, Оймекон.*

**Заданиеяс.**

1. Индöй текстсыс кывъяс, кодъяс гижсьöны ыджыд буквасянь.
2. Гижöй öтветъяс татшöм вопросъяс вылö:
  - 1) Кутшöм странаясöс вöли лыддьöны кöдзыдөн?
  - 2) Кöні ещö кöдзыдджык?
  - 3) Кöні медся кöдзыд öні? Кымын градус кöдзыд сэні овлö?

Сыктывкарлы — 200 во.

1980 воö Сыктывкарлы тырис 200 во. 1780 вося янва-  
рын Сыктыв да Эжва öтлаасянінысь погостсö вöли шуöма  
Усть-Сы сольск карөн.

Революцияодз Усть-Сысольск вöлі уездной центрон. Тані видзисны скöт, вöралісны, кыйисны чери, вузасисны. Уджалис кум школа, öти платной библиотека.

Дзикöдз вежсис Сöветской власть воясö Сыктывкарлөн чужöмбаныс. Карлөн уличаясыс гожöмын вöйöны веж пуяс пöвстö. Став странакод да районьяскод Сыктывкар йитчöма көрт туйөн, авиационной линиясөн, автомобильной да ва туйясөн.

Сыктывкар — научной да культурной центр, көні велöдчöны студентяс, олöны уна том йöз. Карын олö 50 национальностя 190 тысяча сайö морт.

Сыктывкарын кыптöны выль промышленной предприятияс, олан керкаяс. Лоö стрöйтöма ЛПК-лысь мöд öчередь, выль речной вокзал. Кар сайö лоö петкодöма аэропорт.

Геройяслөн аллея вылын боевой Славалөн памятник дорын öзий куслытöм би.

Кывъяс: *Сыктыв, Эжва, Усть-Сысольск, библиотека, чужöмбаныс, ЛПК, аллея.*

### **Заданиеяс.**

1. Лыддой висьтö, торйöдлой юкөнъяс вылö да лöсьöдой план.
2. План сертныс висьталой висьтыслысь содержаниесö.

## **Эжва.**

Лöсьыд видзöдны Эжва вылö гожся лунö. Он вермы гөгөрвоны: визувтö-ö, сулалö-ö, сэтшöм лöня сийö нуö асьыс васö нюдзвиж берегьяс костті. Видзöдлан кө ва вылас, зеркалöысь моз аддзан асьтö. Татшöм кадас видзöдчöны Эжваö берег пöлөн быдмысь бадь кустьяс. Сы вöсна и кажитчö, кор мунан пыжөн ю кузя, быттö пыж боктыд прöйдитöны посныдик еджыд кымөрьяс. Мукöд дырйи чуймöмөн видзöдлан öтар-мöдар берегьяс вылö, медым гөгөрвоны, мый пыжыд збыльысь шывгöкывтö Эжва веркөсті, а оз енежтіыс.

*А. Лыюров*

Кывъяс: *нюдзвиж, шывгö-кывтö.*

### **Заданиеяс.**

1. Висьталой, кутшöм ю визувтö тіян сикт (кар) дорті.
2. Опишитой тайö юсö.

## Поход.

Воис субөта. Помасисны урокъяс. Челядь мөдөдчисны походо. Унаоһи на пиысь мыш саяс босьтөмаось вешевөй мешөкъяс. И Светлана босьтис мешөк.

Челядь прөйдитисны туй кузя да пырисны вөрө. Мунөны васөд трөпаясөд, видзөдөны гөгөрбок... Виталик друг конъясис да шнөпкысис ва гөптө. Челядь сөмын ойөстны удитисны.

Чеччис Виталик няйт сюръя кодь.

— Виталик!— друг горөдис Светлана.— Тэныд колө вежсыны. Менам шоныд носки эм. А мешөкын ещө эм чышъян да ботинки.

Виталик вежис паськөмсө.

— Но, а өһи тэрыба гортө!— шуис пионервожатөй Надя.— Пола, мый Виталик прөстудитчас.

Челядь бөр бергөдчисны.

Выльлунө Света лөктис школаө да кутис майшасыны: «Абу өмөй Виталикыс? Висьмис өмөй?»

Друг аддзө — Виталик сулалө класс өдзөс дорын, быттө немтор эз и вөвлы.

Сийө жө кадас классө пырис-вожатөй Надя.

— Эһ вишьмы, Виталик?— юалис сийө.

— Эг,— вочавидзис Виталик.

— Ме зэв рад,— шуис Надя да видзөдлис Светлана вылө:— Помнитан, тэ юавлин менсьым, кутшөмөн должен лоны пионер? Вот татшөмөн и должен лоны: не эновтны ёртөс.

*С. Баруздин серти.*

Кывьяс: *чышъян, гөгөрбок.*

### Задание.

Висьтыслысь содержаниесө висьталөй план серти.

### План.

1. Кытчө мөдөдчисны челядь?
2. Кыти найө мунисны?
3. Мый лон Виталиккөд?
4. Кыдзи отсалис Виталикы Светлана?
5. Мый висьталис Светланагы пионервожатөй?

## Кыйсьом эз удайтчы.

Колхозной му кузя муні трактор да кыскис плугъяс. Плугъяслон ёсь амысьяс путкылялісны васод му пластьяс.

Горъяс бөрся вөтлысисны ракаяс, кокалісны нидзувьяс да ньоти эз повны йозысь. Челядь сэні жө бергалісны. — Часлы оти еджыд ныраос кута, — шуис Ваня.

Сійо котортіс бөрөздаод. Со и трактор сы водзвылын. Амысьяс бөрын водоны джуджыд бөрөздаяс, путкыльтчоны пластьяс, разалоны комокъяс. А ракаяс ветлөдлөны, Ваня вылө весиг оз видзөдлыны.

Ваня кутіс матыстчыны на дінө. Шарик понйыс сэн жө вөлі. Сійо друг гөгөрвоис: Ваня куталө ракаясөс! Шарик долыда увтыштіс да уськөдчис гөрөм му вомон сылы отсөг вылө.

Но Шарик отсөгысь нинөм эз артмы. Мыйон ракаяс адзисны сійос, пыр жө лэбисны. Шарик чеччаліс, увтчис... Но судзөдан өмөй найос?

— И коді тэнө корис? — шуис сылы Ваня.

Кыйсьом сідзи эз и удайтчы.

*Л. Воронкова серти.*

Кы в в ь я с: ёсь амысь — лемех, путкыльтісны, пластьяс.

### *Заданиеяс.*

1. Лыддьой висьтсө да торйөдлөй сійос юкөнъяс вылө. Быд юкөнлы сетөй ним.
2. План сертиыс висьталөй текстыслысь содержанияесө.

## Парма весьтын.

Кыпөдчыны кө вертолётон Печора йывса парма весьтө, аддзан, кыдзи Урал гөра рытиввылын море моз шыльквидзө помтөм-дортөм вөр: пожөма ягъяс, еджыд расъяс, сус пу дяс. Сэні көр сюръяс моз шевкнитчөмаось посныдик шоръяс. Найө юклөдлөны веж пармасө. Көн-сюрө поздысьөмаось шег кодь ичөтик отка-отка керкаяс. Оти керкасянь мөдөдз уна дас верст.

Олом джыннысө коллялөны тайө керкаясас вөралысьяс. Во джын кежлө найө быттьокө дзевссылөны став остальной мирсыс. Тадзи тшөктө уджыс.

*В. Ширяев серти.*

Кы в ъ я с: шыльквидзё, сус пу — лыска пу; шевк-  
нитчёмаось, шег кодъ.

#### План.

1. Помтём-дортём вөр.
2. Отка-отка керкаяс.
3. Вөралысьяс.

#### Заданиеяс.

1. Изложениеаныд пыртёй татшём кывъяс: шыльквидзё, помтём-дор-  
тём вөр, шевкнитчёмаось посныдик шоръяс, поздысьёмаось ичотик  
отка-отка керкаяс.
2. Мыйкөд авторыс сравнивайтё вөр, шоръяс да отка керкаяс.
3. Висьталёй, кутшём пушной зверьясөс кыйоны вөралысьяс миян  
республикаса вөрьясысь.

### Юсьяс да дзодзөгъяс.

Таня кутис кывзыны. Көнкө вылын-вылын кылісны  
нюжйөдлана шыяс.

Дед шуис:

— Море сайсянь юсьяс гортаныс лэбёны. Найё татчө  
оз пуксыны. Налён гортныс войвылынджык. Сэні уна  
нюръяс, тыяс. Сэні найё и поздысьёны.

Юсьяс лэбисны водзё. Сэки йёрысь петісны дзодзөгъ-  
яс, сувтісны улича шөрө, лэптисны юръяснысө да лань-  
тісны.

— Видзөдлы, дед,— вашнитіс Таня,— миян дзодзөгъ-  
ясным кывзёны жё юсьяссө. Көть эськө мед оз жё лэб-  
зыны войвылө.

Но дзодзөгъяс эз нин вермыны кыпөдчыны. Найё  
горзыштисны да катласигтырйи мөдөдчисны улича кузя.

*Л. Воронкова* серти.

Кы в ъ я с: юсьяс, дзодзөгъяс.

#### План.

1. Көні юсьяслөн чужан муыс?
2. Мыйла найё лэбзылөны лунвылө?
3. Кодъяс кывзисны юсьяслысь гөлөсьяссө?
4. Мыйла дзодзөгъяс эз вөтчаны юсьяс бөрсяс?
5. Лэблывлөны-ө войвылө либө лунвылө тіян весьті дикй дзо-  
дзөгъяс?

## Важся олөмысь.

Сьöкыд вöли олөмыс көр видзысь пастукъяслөн помтөм-дортөм тундраын. Найö ичöтысянь тöдлисны сьöкыд удж. Школаяс сэн некор эз вöвлыны. Ковмас кө велöдны челядьöс — мөдöд найöс уна сё верст сайö. Та вылö колö көм-пась.

Вася Манзадей вöли бать-мамыслөн öтка пи. А öтка пи вöсна кызкө пыр ёнджыка тöждысьöны. Семён Манзадей, Васялөн батыс, уджалис пастукөн изьваса купеч Исак стадаын. Аслас нэм чöжнас тöдмалис сöмын кык буква — «С» да «М». Школаын велöдчыны сылы эз удайтчы. Но сийö көсийс бура быдтыны да велöдны писö.

Воис школаö пыран кад. Гожём помнас батыс мөдöдис Васяöс тöдса йöзкөд Макла сиктö. Уна лун ковмис детинкалы кывтны, уна ном-гебöс чöсмöдис тайö кузь туй чöжыс.

Öти мича арся асылö сийö локтис Макла сиктö. Тани Вася тöдмасис Геня Дуркинкөд, кодлөн батыс уна во нин вöли салдатын. Первой лунсянь жö найö лоины бур другъясөн. И медводдза асылö, кор Вася эз сяммы висьтавны учительлы ассыс арлыдсö, сы пыдди збоя вочавидзис Геня:

— Вася Манзадей! Дасöд вылын.

Тадзи заводитчис школаын велöдчём.

Я. Рочев.

Кы въяс: *помтөм-дортөм, көр видзысь, көм-пась.*

### План.

1. Көр видзысь пастукъяслөн революцияöдз олөм.
2. Вася Манзадейлөн челядь дыр.
3. Вася да Геня.

### Задание.

Изложениад пыртöй кывъяс: олөм-вылөмыс, помтөм-дортөм.

## Лэбалысь ур.

Муним öтчид воккөд вөрö да аддим пу йылысь алысьяма урöс. Заводитим вензыны. Вок шуö, мый ур оз вермы лэбавны. А ме сылы шуа, мый эм сэтшөм ур, кодi лэбалö.

Пу йылын пукалысь зверь быттьокö кыліс миянлысь вензьомнымос. Сійö паськөдіс бордьяссö да лэбзис орччон сулалысь пу йылö.

Ми сулалім да видзөдім зверь вылö. Вок пыр на эз эскы. Кыдзи нö ур вермас лэбавны, кор сылөн бордьясыс абуось? Эз-ö нин пушкыра бөжсьыс вöч чудо-бордсö?

Сэки ме висьталі, мый тайö — паляур. Аслыссяма вöрса зверь. Чуньяс костас сылөн эм кучик. Кор паляур көсийö пышйыны, паськөдö чуньяссö да артмö борд. Сійö вермö лэбзыны öти пусянь мөдö вель дыр.

Ми дыр котралім зверь нисьö пöтка бöрся. Медбöрын дзикöдз воштім сійöс син улысь.

*И. Коданёв.*

Кы в ъ я с: *аслыссяма, паляур* — лэбалысь ур; *чудо-борд, зверь нисьö пöтка.*

### **Задание.**

Лыддьöй висьтсö да висьталöй сылысь содержаниесö. Пыртöй висьтаныд вылын индöм кывьяссö.

## **ВЫЛЬ НИМЪЯС.**

Колхозса конюклөн, Корней Сергеевичлөн, вöліны бур поньяс. Тайö поньясыслысь пиянсö Корней век сетавліс колхозса челядьлы.

Со и öні детинкаяс виччысьöны сійö лунсö, кор понпийн быдмыштасны да позяс найöс торійодны мам дінсьыс.

— Сöмын, чур,— шуис Корней,— понпийансö тиянлы сета сэк, кор ті думыштаннуд налы дзик выль нимьяс да некодлы онö висьталöй. А то миян сиктын сідзи нин котралöны дасысь унджык Полкан да кызь кымын Стрелка, а Шарикьяслөн лыд ни тшöт абу. Колöны выль нимьяс.

Воис лун, кор позьö вöлі сетапны челядьлы понпийансö. Челядь воисны Корней Сергеевич ордö да быдөн вашнитісны сылы выль, сиктын кывлытöм на ним.

Öти детинка вашнитіс — Корней дядь ошкыштіс сійöс. Мөд вашнитіс — Корней Сергеевич ошкыштіс жö, но нюмуніс. Коймөд вашнитіс — старик гораа серөктіс. Квайтөдөдз öчередь воис — Корней дядь семдытөдзыс сераліс.

— Мыйла сійо сералө?— шензисны челядь.

А кор найо гораа шуисны асланыс быдтасъяслысь нимъяссö, ставныслөн серамныс петіс. Сы вöсна, мый квайтнан понйислы сетöмаöсь Лайка ним, а öтилы — Ракета.

Нинöм он вöч. Сійо воö тайö нимъясыс вöліны медся выль нимъясөн.

*Е. Пермьяк.*

*Кы въяс: понпиян, кызь кымын, лыд ни тиöт, семдытöдз, быдтасъяс.*

#### **План.**

1. Бур понъяс.
2. Челядь виччысьöны понпиянöс.
3. Корней Сергеевич сёрнитчис челядькөд.
4. Челядь думыштисны выль нимъяс.

### **Визувтöны юяс.**

Миян республика зэв озыр гырысь да посни юясөн. Ёна нин важысянь йöз кылöдöны юяс кузя вөр, новлöдлöны грузъяс, юясысь кыйöны чери.

Коми АССР-са рытив-лунвыв юкöнын визувтö Эжва. Сійо Печора бöрын медыджыд ю. Эжва пöлөн быдмöны помтöм-дортöм вөръяс. Эжва ёна чукльöдлө. Сылөн туй вылын паныдасьлöны уна тыяс, дияс, куръяяс, перекаъяс.

Апрель помын либö май заводитчигөн Эжва вылысь вөрзё йи, коді кылалö 5—10 лун чöжөн.

Тулысын Эжва туö. Сэки теплоходъяс кыпöдчылöны Вольдино сиктöдз.

Эжвалөн медгырысь вожъясыс — Сыктыв да Емва. Наысь кындзи, ещö эм 200 кымын посныдик ю. И быдлаын пуö олём. Ю берегъясын писькөдöны туйяс, стрöйтöны заводъяс, посъяс, ломзёны выль посёлокъяслөн да каръяслөн тысяча бияс.

*«Югыд туй» газетысь.*

*Кы въяс: рытив-лунвыв, перекач — ю шöрын ляпкыдін; куръяяс.*

#### **Заданиеяс.**

1. Öтветитöй вопросъяс вылö:

- 1) Кутшöм гырысь юяс визувтöны Коми республикаті?

- 2) Кыті визувтö Эжва?
  - 3) Кутшöм сійö тулысын?
  - 4) Кутшöм медгырысь вожъясыс Эжвалöн?
  - 5) Кутшöм пöльза сетö тайö юыс мортлы?
2. Опишитöй Эжва ю.
3. Думыштöй предложенияс медыджыд, медгырысь кывъясöн. Вись-талöй, кутшöм правилö тöданныд тайö кывъяс гижанног йылысь.

## Пармалöн друг.

Ми сёрнитчим Петыр дядькöд; асывнас меным кыйны öбед кежлö сьöлаöс, а рытнас сылы.

Мунам прöсек кузя козъя вöрті. Но, чайта, Петыр дядь ужынтöг оз коль. И збыльысь — жбыр. Тайö лэбзис сьöла да пуксис сэтшöм матö, мый быд гөн сылөн тöдчö. Петыр дядь нюжöдчыліс эськö ружьеланыс да друг мыйлакö бөр энöвтчис. Сулалö, видзöдö ичöтик лэбач вылö да чöв олö.

А сьöла пукалö. Вот-вот жбыркнитас-дзэбяс сук раскö, кытысь сійöс некутшöм сюсь син нин оз казав. Збыльысь сідзи и лои. Коли сöмын лайкъялысь увйыс. Ме шуи Петыр дядьлы, мый сійö омöлик кыйсьысь. А сійö сералö:

— Верми эськö ме сійöс лыйны. Но ме аддзи, кызди сійö полігтыр видзöдö гөгөр. Мед олас.

*«Войвыв кодзув»* журналысь

Кывъяс: *прöсек кузя, жбыркнитас-лэбзяс, полігтыр, лайкъялысь.*

### План.

1. Кытчö мунісны Петыр дядь да детинка?
2. Кодöс найö аддзисны вöрысь?
3. Мыйла Петыр дядь эз лый сьöласö?

## Лев Николаевич Толстой.

Лев Николаевич Толстой — великöй писатель. Сійö гижис уна интереснöй книга гырысьяслы да челядьлы. Лев Толстой зэв ёна радейтіс челядьöс. Тöлын сійö частö иславліс челядькöд конькиөн, котравліс лыжи вылын. Гожöмын ветывліс накöд вөрö вотчыны.

Том дырйиыс Толстой оліс Ясная Полянаын. Сэні вой-

дөр некүтшөм школа эз вөв, и челядьлы некөн вөлі велөдчыны. Толстой восьтіс школа да велөдіс сәні челядьөс. Сійө гижис налы лыддысян книгаяс да мукөд пөлдөс учебникъяс.

Лев Николаевич Толстой радейтіс уджавны. Сійө кужис вөчны быдсяма удж: гөрны му, тшупны керка, тэчны пач.

Лев Толстой оліс зэв дыр. Сійө кувсис 82 арөсөн. А дыр оліс сы вөсна, мый сійө радейтіс уджавны.

### **Задание.**

Думыштөй да лөсьөдөй план. Сы серти висьталөй Лев Николаевич Толстой олөм йылысь.

### **Примернөй план.**

1. Л. Толстой — писатель.
2. Л. Толстой радейтө челядьөс.
3. Сійө восьтө школа.
4. Л. Толстой кужө вөчны быдсяма удж.

## Саша Матросов олөмысь.

Уральскөй военнөй округын служитіс майор Иван Сергеевич Токарев. Сійө велөдчис Саша Матросовкөд пехотнөй училищын да өтлаын вөліны фронт вылын. Оттшөтш найө и комсомолө пырисны. Отлаын найө тышкасисны и сійө медбөрья бояс Чернушка сикт вөсна, көні пөгибнитіс Саша.

Сиктсө босьтөм бөрын Токарев ачыс гуалис Саша другсө Чернушка сиктө. Иван Сергеевич частө висьтавлывлө Саша йылысь:

— Сійө проклятөй дзот дорас вөлі сьөкыд бой. Миянлы оз вөлі позь ни бөрынтычыны, ни кытшовтны врагөс. И сәки, кор Саша шыбитчис дзот вылө да ланьтөдіс пулемөт, ми уськөдчим водзө. Қолө вөлі вөтлыны врагөс.

«Пионер» журналысь.

Қы в ъ я с: *пехотнөй училище, дзот* — му пытшкө вөчөм укрепление.

### **План.**

1. Матросов да Токарев.
2. Медбөрья бой.

## Володя Кузьминлөн подвиг.

Сійо сиктсаяныс, кōні оліс Володя Кузьмин, фронт вōлі матын. Володя Кузьмин тōдмасис сōветскōй салдатъяскōд.

Отчыл разведчикъяс тшōктисны Володялы да сълōн ёртлы, Наумкин Серёжалы, вуджōдны Ока ю вомōн сōветскōй разведчикъясōс. Заданиеыс вōлі зєв свōкыд: Ока ю мōдар берегын врагъяс. Серёжа да дас арōса Володя эз повзыны. Пемдигас детинкаяс пуксисны пыжō, а боецъяс пыж пыдōсō дзєбсисны. Володя да Серёжа зєв бура кужисны сынны. Пыж регыд мысти кутис матыстчыны мōдар береглань. Тайō кадас врагъяс зєв ёна кутисны лыйлыны. Вражескōй пуля ранитис Володяōс. Ковмис бергōдчыны. Кор воисны берегōдз, Володяōс нусны больничаō. Но вōлі сёр нин. Больничаō нуигōн Володя кувсис. Володя Кузьминōс гуалисны кыдзи славнōй геройōс. Сійо гу вылō сувтōдисны памятник, кытчō гижисны: «Татчō дзєбōма дас арōса геройōс, Володя Кузьминōс, коді сетис ассьыс олōмсō Сōветскōй Армиялөн делō вōсна».

Сōветскōй воинъяс, пионеръяс, матигōгōрса олысьяс воylvлōны Володя Кузьмин памятник дорō. Пионеръяс да комсомолецъяс быд во тайō памятник гōгōрыс садитōны дзоридзьяс.

«Пионерскōй правда». газетысь.

Кы в ъ я с: *дзоридзьяс, матигōгōрса.*

План.

1. Кутшōм задание сетисны сōветскōй салдатъяс Кузьмин Володялы да Наумкин Серёжалы?
2. Мыйла эз удайтчы помōдз вōчны заданиесō?
3. Мый сувтōдōма Володя гу вылō? Мый сэтчō гижōма?
4. Кыдзи сōветскōй йōз казътылōны найōс, кодъяс пōгибнитисны война дырйи?

## Мирнōй лунъясса герой.

Воин-десантникъяс велōдчисны чечѳавны парашютōн. Сержант Чеслав чеччыштитис самолёт люкысь. Му ойдō матыстчис. Пōра осьтыны парашют. Чеслав тракнитис кольчасō.

И сэки сержант казяліс, кыдзи сылөн парашютыс гартчө старшина Бисекеев парашюткөд. Найö кутісны усьны. Сержант мый вынсьыс мөдіс тракйыны асьыс парашютсө. Парашют заводитчис пөльтчыны. Но старшина эз вермы кутчысьны да кутіс исковтны-усьны. Чеслав удитіс кватитны старшиналысь парашют стрөпаяс-сө. Киясыс дубалісны, но стрөпаяс-сө эз лэдз.

Недыр мысти найö вөліны нин му вылынөсь. Старшина Бисекеев топыда кутліс асьыс другсө.

*«Пионерскöй правда»* газетысь.

Кы в ъ я с: *воин-десантникъяс, парашют, исковтны-усьны, стрөпаяс* — парашют бердө крепитөм гез.

План.

1. Сержант Чеслав чеччыштіс парашютөн.
2. Сержантлөн парашютыс гартчис старшина парашюткөд.
3. Öти парашют купол улын кыкөн.
4. Му вылын.

## Йи чой вылын.

Лунтыр мырсисны челядь — вөчисны йи чой. Öбед кежлө сөмын эштөдісны. Челядь киськалісны сійөс ваөн да котөртісны гортаныс сөйны. А сэсся көсйисны локны иславны.

Чижов эз петав йи чой вөчны. А кор челядь мунісны, тэрыба пасьтасис, конькиасис да петіс ывлаө. Аддзис йи чойсө да заводитіс кавшасьны, но шнөпкысис-уси. Чеччис да бара уси. Чижов котөртліс лыа тыра ящик дорө да фанератор вылын вайис лыа. Кисьтыштас лыанас йи чойсө да вылөджык и вылөджык кайө. Йылөдзыс кайис. Көсйис исковтны, но конькыс оз исковт лыа вывтис.

Регыд бөр локталісны челядь. Аддзөны — йи чойсө лыаөн киськалөмаөсь. Челядь тшөктісны Чижовлы чышкыны лыасө йи чой вылысь. Сетісны сылы зыр да рос... Сэсся Чижов шыблаліс йи чой вылө лым, а челядь бара киськалісны ваөн. Чижовлы сэтшөма кажитчис уджыс, мый чой бокас вөчаліс тшупөдъяс, мед кокныдджык вөлі кайны.

*Н. Носов* серти.

Кы в ъ я с: *йи чой, шнөпкысис-уси, тшупөдъяс, фанератор.*

## План.

1. Челядь вöчисны йи чой.
2. Чижев петö иславны.
3. Сійö киськалö йи чойсö лыаөн.
4. Чижев бөр лосьöдö йи чойсö.

## Петя да Витя.

Тайö вöли Великöй Отечественнöй война дырйи.

Карын мунис бой. Олысьясыс мунисны сэтысь. Карö колисны салдатъяс да ещö кык детинка. Витялы вöли сизим арöс, а Петялы — дас кык.

Недыр мысти кутисны взрывайтчыны минаяс. Детинкаяс лэччисны пöдвалö. Дыр ковмис сэни овны. Бырны кутис сёян-юан. Петя мунис корсьны сёян. Мунис и эз лок.

Витя ещö пыдöджык дзевсис. Друг сійö кылис ойöстөм. Витя уськөдчис сыланьö, кытисянь кылис ойöстөмыс. Пос тшупöдъяс вылын куйлис салдат. Сійö восьтис синъяссö да шуис:

— Ёртъясöй орчча керкаас, коймөд судтаас. Колö катöдны патронъяс.

Салдат бара воштіс садьсö. Витя бөрддзис. Сэсся сійö аддзис ящик да гөгөрвоис, мый сэни патронъяс. Көс-йис, лэптыны, но эз вермы. Витя пыр жö котөртіс стен пöлөн орчча керкалань. Воис коймөд судтаөдз, аддзис салдатъясöс. Найö сёрнитісны, мый фашистъяс бара заводитісны лыйсьыны, а налөн патронъяс бырисны. Сэки Витя горөдіс:

— Эмөсь патронъяс, дяденька! Эстөн салдат куйлö, сійö вöли вайö тиянлы патрон ящик.

Оти салдат котөрөн чепөсйис увлань да регыд мысти вайис патрон тыра ящик. Салдатъяс зарядитісны автоматъяссö да лосьөдчисны дорйыны карсö фашистъясысь.

*И. Туричин.*

*Кы в ъ я с: пос тшупөдъяс, патрон тыра ящик.*

## Задание.

Лыддьöй висьтсö да торйөдлөй сійöс юкөнъяс вылö. Быд юкөнлы сетöй ним, медым артмис план. План сертиыс висьталöй содержанияссö.

## Опасной случай.

Ёгор дядь, колхозса шофёр, унаысь пуксьодліс Фимкаос кабинаас, гоз-модысь весиг лэдзліс сійос руль сайо.

Талун Ёгор дядь сувтөдіс грузөвиксө аслас керкадорө. Моторыс дугдіс уджавны. Ёгор дядь тэрмасьомөн петіс кабинасыс. Кык детинка, Антипка да Серёжа, кайсны кузовас. Найос Ёгор дядь частө жө пуксьодліс машинаас. А Фимка петіс гортсыс, адзө: детинкаяс пукалоны нин кузовын. Но тайө нө мый? Машина кабинаын некод абу, а машинаыс вөрзис места вывсыс и... ньөжйөнник модөдчис увлань. Фимка уськөдчис машина бөрся, чеччыштіс подножка вылас, пырис кабинаө. Син водзас съод вуджөрөн вирдыштіс крут керос да лог. Фимка мый вынсыс личкис кокнас педальсө, тэрыба бергөдіс рульсө веськыдвылө. Машина ньөжйөнникөн сувтіс. Бөрья колесаясыс сылөн вөліны кыркөтшсяныс сомын метрөн-джынийөн ылнаын. Фимка кө сёрмис здук кезлө, эз нин эськө вермы петкөдны машинасө туй вылас...

А Ёгор дядь котөртіс нин чой горув. Повзьөмысла Фимка бледөдома. Сійө петіс кабинаысь. Ёгор дядь меліа тапкөдыштіс Фимкалы пельпомас да шуис:

— Тайө опасной случайсө некор ог вунөд. Век колө машинатө тормоз вылө сувтөдны.

*В. Баталов серти.*

*Кы в ъ я с: вирдыштіс, метрөн-джынийөн, кыркөтш, гоз-модысь, подножка, веськыдвылө.*

### **Задание.**

Гижой дженьыдик изложение татшөм план серти:

### **План.**

1. Ёгор дядь да Фимка.
2. Серёжа да Антипка машина кузовынос.
3. Машина вөрзис.
4. Фимка спаситө машинасө.
5. Тайос некор оз позь вунөдны.

## Честной ленинской.

Челядь дырйыс Володя Ульянов зэв ёна дружитіс Коля Нефедьевкөд. Найө отлаын ворслісны, котравлісны.

Коля Нефедьев мамыскөд оліс куим өшиня ичөтик керкаын, коді сулаліс Ульяновъяс дворын. Дворас вөлі сад, көні быдмис вишня, яблоня, өмидз, сэтөр, крыжовник.

Отчид Коля да Володя пырисны садйө. Коля горөдіс радысла. Сійө аддзис яблөгъяс, вишняяс, сэтөр, өмидз. Елена Григорьевна, Колялөн мамыс, эз ёна балуйтлы Коляөс фруктыөн. Найө олісны гөлиника.

Коля тувкнитіс Володялы:

— Вай нетшкам.

— Оз позь.

— Мыйла?

— Мам эз тшөкты. Регыд батылөн чужан лун, сәки кутам чукөртны. А водздзык оз позь. Ме сеті честнөй кыв.

Детинкаяс дыр на ворсісны садйын. Но Володя эз босът ни өти ягөд и Колялы эз тшөкты. А июль 14-өд лунө Ульяновъяс став семьянас петісны көрзинкаясөн өктыны садйысь ягөд. Сәки пөттөдзыс сөйис и Коля Нефедьев.

Кы в ъ яс: *сэтөр, өмидз, фрукты, пөттөдз.*

#### План.

1. Володя дружитө Колякөд.
2. Володя да Коля садйынөсь.
3. Володя да Коля костын сөрни.
4. Володя гөститөдө Коляөс ягөдөн.

#### Чавкан.

Чоя-вокалөн вөлі велөдөм чавкан. Сійөс вердісны ки помысь, малавлісны, лэдзлывлісны вөля вылө, но чавкан бөр воывліс гортас.

Отчид чойыс кутіс мыссыны. Пөрччис өчкисө да пуктіс мыссян доз вылө. Майтөгаліс чужөмсө, а пожъялөм бөрас видзөдліс: өчкиныс абу!

Сійө горөдіс воыслы:

— Вай өчкисө! Эн дөзмөдчы.

— Немтор ме эг босът,— шуис воыс.

Бабыс кыліс тайө сөрнисө, дай шуө:

— Вайөй менсым өчкиөс. Муртса на пызан вылө пукті. Кытчө воши өчкиныс?

Уськөдчисны ставныс өчкияс корсыны, а өчкияс абуөсь.

Баб кутіс видны внуксö.

— Тайö тэ бабсö дэльöдан?

Дöзмис детинка бабыс вылö, дай петіс гортсыйс. Видзöдö — керка весьтын чавкан лэбалö, нырас мыйкö югъялö. Детинка прамöйджыка видзöдліс да гөгөрвоис: да тайö жö öчки! А чавкан пуксис керка вевт вылö да кутіс дзебны öчкисö пöv костö.

Петіс бабыс кильчö вылас да юалис вьнукыслысь:

— Висьтав, кöні öчкиыс!

— Керка вевт вылын!— шуис детинка.

Чуймис бабыс. Детинка кайис керка вевт вылö да перйис пöv костысь чойыслысь öчкисö, сэсся бабыслысь. Сэсся кутіс перъявны стеклöторъяс, уна сикас деньга.

Чоя-вока бөр бурасисны.

А бабыс шуис:

— Чавканъяс да катшаяс став югыдторсö дзебöны аслыныс.

*Б. Житков серти.*

*Кы въяс: чоя-вока, мыссян доз, немтор, дэльöдны, югъялö, стеклöторъяс.*

### **Задание.**

Коллективнöй лöсьöдöй план да сы серти дженьыда гижöй изложение.

### **Примернöй план.**

1. Велöдöм чавкан.
2. Вошис чойыслөн öчкиыс.
3. Вошис öчкиыс и бабыслөн.
4. Öчкияс сюрисны.
5. Чавкан мыжа.

## **Лым.**

Войбыд сапкис-усис кöч пель кодь лым. Небыд лымлы радлісны пашкыр бöжа уръяс, еджыд байдөгъяс, посни челядь. Сöмын Боряöс да Воваöс шогöдіс. Кык друг кöсийсны иславны конькиөн, рытсаяныс на тöчитісны конькияснысö.

Найö жугыля видзöдісны йи вылö, коді тöрыт на дзирдаліс зеркалö моз, а талун — гыбөрөссьöм öшинь кодь. Боря видзöдліс йи вылö, сэсся шуис:

— Вова! Босьтчам кӧ ӧтвылысь, каток вылас час мысти ни ӧти лым чир оз коль. Со тані и пӧвъяс эмӧсь, а ме пывсян дорысь важ корӧсьяс лӧччӧда.

Боря босьтис пӧв да пондіс йӧткавны лымсӧ. Лым-йыс абу на удитӧма чорзыны да сетчис кокныда. Вова мӧдӧдчыліс нин мунны гортас, но бӧр бергӧдчис. Кықнад уджыс кутіс мунны гажаджыка. Кыськӧ сӧсса и мукӧдъяс локталісны. Лым бусыс сӧмын резӧ-кайӧ вывлань. Дуригмозыс эз и тӧдлыны, кызди каток лоис дась.

Каток гӧгӧр кыз эшкынӧн куйліс лым, а челядь кок улын зеркалӧ моз дзирдаліс йи.

*Л. Палкин.*

Кы в ъ я с: *гыӧрӧссӧм ӧшинь кодъ, сапкис-усис, кӧч пель кодъ, резӧ-кайӧ, дуригмозыс, зеркалӧ моз.*

#### План.

1. Войбыд сапкис-усис лым.
2. Каток тыри лымйӧн.
3. Вова да Боря весалӧны сійӧс.

#### Задание.

Изложениеаныд пыртӧй татшӧм кывъяс: *кӧч пель кодъ лым, гыӧрӧссӧм ӧшинь кодъ, зеркалӧ моз, сапкис-усис, резӧ-кайӧ.*

## Тӧвся вӧр.

Кутшӧм лӧсьыд тӧвся лунъясӧ ветлыны лыжиӧн вӧрӧ! Тӧвся вӧр ылісянь дзик мойдкывса кодъ. Пуяс сулалӧны да весиг увъяссӧ оз вӧрӧдны. Дай кызди вӧрӧдан, кор быд увйӧс личкӧ лым. А кор пыран вӧрас, первойсӧ кажитчӧ, мый ставыс кулӧма — шыч ни рач. Сувтыштлан, кывзысьыштан.

Со чотігтырйи дзик кок бердӧдз матыстчис пыста. Увъяс костын сійӧ дзирнясьӧ-вежнясьӧ: то пуксьылас, то бӧр кытчӧкӧ вошлас, то югнитас-локтас важ местаас. Гӧрд да виж рӧма крука ныра уркайяс пуксисны матыса тугъя пожӧм вылӧ. Вӧрса лӧбачьяс! Лунтыр дзользӧны, а коль кышъяс гылалӧны муӧ. Кымын кӧдзыд ывлаыс, сымын вӧрасаджыкӧсь уркайяс.

А видзӧдлан кӧ кок улад, вӧрса лымйыс книга кодъ. Со дзик на неважӧн чеччалӧма кӧч, а сы кок туй кузя удитӧма нин котӧртны байдӧг. Неылын со кодкӧ мунӧ-

ма, да кок туйыс омөля төдчө, чышкөма бөрсяныыс. Тайо руч. Вөрса эрд вылын тыдалоны лым пио кодийом гуяс. Татчө узьмөдчылөмаось тарьяс.

Ёна жө мича төвнад вөрыд!

Кы въяс: *оз вөрөдны, шыч ни рач, дзирнясьо-вежнясьо, чотигтырйи, югнитас-локтас, уркайяс, тугъя пожом, книга кодь, неважон, кок туй, узьмөдчывлөмаось, вөра-саджыкось.*

### *Заданиеяс.*

1. Төвся каникулъяс дырйи ветлөй вөрө экскурсияон. Гижөй неыджыд висът сы йылысь, мый адзылынныд вөрсьыс.
2. Тайо текст кузя гижөй изложение татшөм темаяс вылө:
  - 1) Төвся вөр (текст дорас мато кывъясон).
  - 2) Вөрса лэбачьяс.
  - 3) Лымйыс — книга кодь.

## Владимир Ильичлөн челядьдырся кад.

Гимназияо Володялы колө вөлі мунны көкъямыс час да джын кежлө. Стөч сизим часын Володя садьмыліс. Сійо пыр жө чеччыліс вольпась вылысь, прөстө эз туплясь. Весавліс пиньсө, бура мыссьыліс да зырасьліс көтөдөм ки чышкөдөн. Ачыс идравліс вольпасьсө.

Сэсса Володя пуксьыліс повторитны урокъяс, кодьясөс сійо век вөчлывліс рытнас. Сөйыштөм бөрын Володя мунліс гимназияо. Гимназияысь воом бөрын сійо гуляйтліс ывлаын. Володя ёна радейтліс ворсны мачөн да торйөн нин казак-рөзбойникөн. Сійо вөлі зэв честной. Володя көть вөлі и ён, некор эз косясьлы. Сійо пыр жө дугдыліс ворсны, челядь кө заводитлісны вензыны. — Тайо абу ворсөм, — шулывліс сійо.

Обед кежлө став семьяыс чукөртчывліс отлао. Обедайтөм бөрын Володя пуксьыліс велөдны урокъяс. Велөдліс урокьясөсө сетөм дорсьыс век унджык. Уна лыддьысьлывліс. Классын сійо век вөлі первой велөдчысьон.

*В. Бонч-Бруевич.*

Кы въяс: *гимназия — царской Россияын средной школа; көкъямыс час да джын, лыддьысьлывліс.*

### *Задание.*

Лыддьой да висьталөй, кутшөм вөлі Володя Ульяновлөн лунся режимыс. Кутшөм тиян лунся режимыд?

## Кыдзи Светлана спаситіс мортос.

Светланалон бабыс некымын лун кезлө муніс сиктө, а батыс да мамыс мунісны театрө.

Светлана кольчис гортас кэзйяка пыдди. Сійө мыскаліс тасьті-пань, чышкис джодж да кыскаліс цвельяс. Сэсса заводитіс ворсны ичот вокыскөд, Алешакөд. Недыр мысти Алеша унмовсис. Светлана пуксис лыдысыны.

Друг Светланады дум вылас уси ёг тыра ведра. Босьтіс ведрасө да котөрөн петіс ывлаө.

Ывлаын сап пемыд. Небесаыс кымөра.

Светлана мунө сад пөлөн. Со и керка пельос. Мый нө тайө? Тротуар вылын куйлө морт. Повзёмысла Светлана сувтіс. Сійө видзөдліс отарө-мөдарө, көсийс кодөскө чукөстны, но некод некөн эз вөв.

Светлана матыстчис морт дінө. Буретш сэки морт муртса кывмөн ойөстыштіс. Сідзкө, мортыс ловья.

Светлана шыбитіс ведрасө да котөртіс гортас. Квайтис телефонной трубка да корис «Скорой помощь», ачыс бөр петіс ывлаө.

Недыр мысти воис «Скорой помощь». Сэтысь петіс халата врач. Сійө копытчис куйлысь морт дінө.

— Нөсилка! Одиё!— тшөктис сійө санитарлы.

Санитар да шофёр пыртисны висьысь мортос машинаө.

— Атьё тэныд, нывка,— машинасяныс нин шуис доктор.

*С. Баруздин серги.*

Кывъяс: театр, кодзувьяс, тротуар, отарө-мөдарө, телефон, «Скорой помощь».

### **Заданиеяс.**

1. Лыдыёй да висьталөй содержаниесө татшөм вопросьяс серги:

1) Кытчө мунісны Светланаалон бать-мамыс, бабыс?

2) Мый сійө вөчис гортас?

3) Мыйла Светлана петіс ывлаө?

4) Кодөс аддзис сійө ывлаысь?

5) Мый вөчис сэки Светлана?

6) Мыйысь аттьөалис Светланаөс доктор?

2. Велөдчөй правильнөя шуны тайө кывъяссө: халат, телефон, «Скорой помощь».

3. Гижөмөн доньялөй Светланаалысь поступоксө.

## Метро.

Коді воліс Москваё, сійё аддзыліс метро. Метро — мупытшса кар. Сэні эмось уличаяс, мраморной дворецъяс. Мупытшса уличаясод — туннельясод төвзёны мича электрической поездъяс. Метроын поводдьяс пыр откодъ. Сэні оз овлы ни зэр, ни лым, ни жар, ни кодзид. Метроын век югыд, и он гөгөрво — лун али вой, асыв али рыт. Воздухыс метроын сөстөм. Сэні эмось машинаяс-вентиляторъяс, кодъяс отсөгөн проветривайтоны мупытшса карсө.

Кымын морт прөйдитө метроті өти луннас? Быд вагонө төрө кыксө гөгөр морт, а вагоныс — квайт. Сидзкө, өти поездын тысяча кыксө пассажир. А поездъяс ветлөны быд кык минут мысти, а то и частөджык. Метроын вагон өдзөсъяс асьныс воссьёны да пөдлассьёны. Посъяс асьныс катөдоны йөзсө вывлань да лэччөдоны увлань.

*М. Ильин да Е. Сегал серти.*

Кы в ъ я с: метро, мраморной дворецъяс, туннельяс, электрической поездъяс, вентиляторъяс.

### План.

1. Кутшөм карын эм метро?
2. Кутшөмджык метро пытшкөсыс?
3. Кутшөм сэні поводдьяс, воздухыс?
4. Уна-ө йөз прөйдитөны метроті өти луннас?

## Пичугин пос.

Кыдзи и став челядь, Сёма радейтліс ветлыны школаө веськыд туйөд — ичөтик Быстрянка ю вомөн. Тайё юыс визувтис крут берегъяс костті, но чеччыштны сы вомён вөлі зэв сьөкыд.

Кольөм во өти велөдчысь эз во мөдар берегөдзыс да турки-тарки турбыльтчис-уси юө. А таво төвнас кык нывка вуджисны юсө йи кузя да вильдісны рыө. Көтасисны.

Челядьөс дугөдісны веськыд туйөд ветлөмысь. А кыдзи нө кытшола туйөд мунан, кор веськыд туй эм!

Со и мөвпыштіс Сёма Пичугин пөрөдны кыз пу таладор берегсянь мөдарас. И кутіс Сёма керавны тайё пусө.

Абу кокни, вөлөмкө, тайё уджыс. Вывті нин кыз вөлі

пуыс. Сöмын мөд луннас бруткысис-пöрис сийö да водис ю вомөн. Сэссия Сёма кералис увьяссö. Сы бöрын сийö лöсьöдис перилöяс.

Бур и пос артмис. Öнi эз сöмын челядь, но и гырысьяс кутисны ветлыны сиктысь сиктö тайö туйöдыс.

А кодкö кö мөдöдчас кытшола туйöд, сылы шуасны: — Мун веськыда Пичугин пос кузя.

Сидзи и нимтисны сийöс Сёмалөн ов серти — Пичугин пос. Кор пуыс дзикöдз сисымис да ветлыны сы кузя лон öпаснö, колхоз вöчис выль пос. А послөн нимыс коли важыс — Пичугин пос.

Недыр мысти и тайö поссö вежисны. Туйыс нюжалис Быстрянка ю вомөн буретш сийö веськыд ордымöдыс, кытi челядь котравлисны школаö.

Вöчисны ыджыд пос. Чугуннöй перилöяса. Татшöмыслы позис сетны мөд ним. А сийöс век воддза моз шуисны — Пичугин пос. И некодлы весиг юрас эз волю сэтшöм мөвп, мый тайö поссö позьö нимтыны кызкö мөд ног.

Со кызди овльвлö олöмад.

*Е. Пермьяк.*

Кы в ъ я с: *Быстрянка, берегъяс косттi, турки-тарки, бруткысис-пöрис, перилöяс.*

### **Задание.**

Лыддьöй да висьталöй содержаниесö татшöм вопросъяс серти:

1. Кытi челядь ветльвлисны школаö? Кутшöмджык вöли тайö туйыс?
2. Мый думыштис вöчны Сёма Пичугин?
3. Кутшöм пос сийö вöчис?
4. Кызди шуисны тайö поссö?
5. Кутшöм пос вöчисны важ пос пыдди? Кутшöм ним сылы сетисны?

### **Сюсь лэбач.**

Шурик мөдöдчис чукöртны чаг. Мунiгмозыс повзьöдис лэбачьяссö. Шурик первойсö ачыс повзыштискодъ: нинöм эз вöв, а друг сы мында еджыд «мач» кыпöдчис. Лэбачьяс вöчисны кытш да бөр пуксисны-вошисны.

Бөр локтигас Шурик адзис му весьтти гöгралысь варышöс. Бордъя рöзбойникöс казялисны лэбачьяс. Го-раа чипсiгтырйи найö жбыркнитисны-лэбисны. А варыш бытгö тайöс и виччысис. Топöдис ёсь бордьяссö да ньöв моз тювгысис еджыд морöсьяса посни лэбачьяс пöвстö. Но варышлөн крукыля гыжъясö некод эз сюр. Шурик

чайтис, мый лэбачьяс усьысясны кытчөсюрө. Но песни лэбачьяс бергалісны варыш гөгөр, зілісны сійөс ко-кыштны.

Детинка казяліс, мый варыш усьласьө жебиник лэбач вылө. Шурик некымынысь гораа кучкис кияснас да горөдіс:

— Кыш, кыш!

И сэки лои дивө. Ичөтик лэбач уськөдчис детинка вылө, сатшкысис сылы пельпомас. Сы бөрся — варыш, но казяліс мортөс да тювгысис пуяс сайө.

Шурик сулаліс мыр моз, эз лысьт весиг лолыштны. Сійө став тушанас кыліс ичөтик лэбачлысь тіралөмсө.

*Л. Палкин* серти.

Кывьяс: *еджыд «мач», чипсігтырйи, ньөв моз, сатшкысис, мунігмозыс, повзьыштискодь, усьысясны.*

#### План.

1. Еджыд «мач» кодь лэбачьяс.
2. Варыш уськөдчис лэбачьяс вылө.
3. И сэки лои дивө.
4. Шурик сулалө мыр моз.

#### Задание.

Гижөй изложение да пыртөй сэтчө татшөм кывьяс: *пуксисны-вошисны, жбыркнитісны-лэбисны.*

### Эз сетчыны челядь скөр турөблы.

Вывті дыр кысьсө войвывса төв, артавны кө сійөс лым усьөмсянь да му кушмытөдз. Лунвылын заводитөны нин гөрны-көдзны, дзоридзалөны яблоньяс. А мян войвылын тулысылөн весиг дукуыс на оз кыв. Февраль төлысь, но вежон чөж нелямын градуса көдзыд сулалө. А мыйөн төкөтөь шондөдіс, заводитчис турөб. Керкаяс костын, потшөсьяс пөлөн кыптисны пывсян судта лым толаяс. Тыртис турөбыс и сиктса челядьлысь исласянінсө, кодөс найө вөчлісны Печора кыр бокө да кадысь кадө весиг ваөн киськавлісны.

Челядьлы сэтшөм эз вөв окота сетчыны тайө турөбыслы. Од дадынад поэяс на исласьны март чөжыс. А төлысь помнас буретш каникульяс.

— Вай вөчамөй субботник, — шуис аслас другьясылы Яков Пыстин.

Тайо водзмөстчөмыс уналы кажитчис. Нывкаяс эз жө көйыны кольчыны детинкаясысь. Быдөнлы окота исласьнытө. Ыджыд перемена дырйи челядь котөртлісны гортаныс: вайисны пу зыръяс, гөликъяс да ведраяс, а кодсюрө лыжияс да дадыас. Өткымынъяс, тыдалө, тайо рытнас нин думайтісны исласьны.

И урокъяс бөрын школьникъяс эз разөдчыны гортаныс, а тэрыба пасьтасисны да петісны кильчө помө. Регыд найо лэччисны кыр бокө. Сэні челядь гажаа босьтчисны уджө. Ызөбтіс варов сёрни, кокъяс улын дзуртіс лым. Кодкө заводитіс сывны. Эз, эз сетчыны челядь скөр турөблы!

*Б. Ширяев серги.*

Кы в ъ я с: *исласянін, субботник, водзмөстчөм.*

**План.**

1. Войвывса кузь төв.
2. Турөб тыртіс челядьлысь исласянінсө.
3. Челядьлөн субботник.

## Шойччанін.

Сиктсаянь матысса вөрөдз туйыс муніс паськыд му шөрті. Гожөмын жар, шондыс пөжө. Чайтан, оз нин помась туйыс. Но стөч туй джынъяс, дзик туй бокас, быдмис пашкыра кызд пу. Сы вуджөр улын жар лунъясө шойччывлісны и челядь, и гырысьяс.

Өтчыд, арнас, челядь пестісны кызд пу улө бипур. Кулисны кызд пулысь сямөдсө, чегъялісны увьяссө. Найо ещө некымынысь на пестылісны татчө бипур.

Воис тулыс. Гөгөр ставыс вежөдіс. Сөмын кызд пу эз тупкысь веж коръясөн — косьмис. Локтісны йөз да пилитісны сійөс пес вылө. Му шөрө коли куш сьөд мыр.

Арнас челядь садитісны туй пөлөн пуяс да кустьяс. Коли дас во. Оні туй пөлөн быдмөны кустьяс да кызд пуяс. Но му шөрын век на чурвидзө сьөд мыр. Сэтчө важ моз пуксьывлөны шойччыны ветлысь-мунысьяс. На юр весьтын оні кышакылөны нин том кыздыслөн коръясыс.

*Г. Скребицкий серги.*

Кы в ъ я с: *сямөд, вевттьысисны, вежөдіс, некымынысь.*

## План.

1. Йбзлөн шойччанін.
2. Қыз пу дорын челядь пестісны бипур.
3. Қыз пу косьмис.
4. Челядь садитісны выль пуяс.
5. Дас во бõрын.

## Памятник.

Тайо вöлі öти ичöтик карын.

Дзик кар помас сулаліс школа, а сы водзын — Ленинлы памятник.

Памятник гөгөр школьникъяс садитісны цветъяс да нель кыз пу. Найо көсйисны садитны быдса сад, но эз удитны: заводитчис война.

Фашистскöй самолётъяс шыбитісны бомбаяс мирнöй кар вылө. Олысьяс кутісны мунавны карсьяс. Медбөръя олысьяс — найо вöліны сöмын квайтөнөсь — чукөртчисны öтлаө. Сёрнитчитөг видзөдлісны төдса мыльк вылө, көні асывнас на сулаліс Ленинлы памятник, а сэсся сідз жө ставныс веськөдчисны мыльклань. Квайт советскöй морт кыпөдісны бомбаөн поткөдөм изъяс да пуктісны орчөн. Сэсся видзчысьөмөн босьтісны статуясө да шумтөг сүвтөдісны сійөс важ местаас. И изйыс сулаліс крепыда, быттьө сійөс некор эз и жугөдлы немецкöй бомба.

Сэсся сотчөм карысь медбөръя олысьяс кутісны писькөдчыны вөрлань.

А. Кононов серти.

К ы в ъ я с: *видзчысьөмөн, статуя.*

## План.

1. Ленинлы памятник.
2. Фашистъяс бомбитöны кар.
3. Карса олысьяс бөр сүвтөдісны Ленинлы памятник.

## Ичöтик партизанка.

1941-өд вося гожöмын Лариса Михеенко гөститіс бабыс ордын Печенево сиктын. Тані сійөс суис Великöй Отечественнöй война. Дась нель арөса пионерка лои партизанкаөн.

И вот партизанской отряд сетіс Ларисалы задание: воодчыны Морозово сиктö да тöдмавны, эмöсь-ö сэнi фашистъяс.

Морозовоö вотöдз сійöс кутісны немецъяс. Нывкаöс вайöдісны керкаö, кодöс сійö бура тöдіс. Войнаöдз тані вöлі изба-читальня, а öні оліс вöвлöм кулак Антон Юринлөн гöтырыс. Нывкаöс войбыд стöрöжитісны, медым сійö эз пышйы. Но асъядорыс Антонлөн гöтырыс петіс мöс лысьтыны.

А керка дорас сулаліс часöвöй. Лариса тöдіс, мый öти öшинь видзöдö град йөрö, мый тайö öшинь пырыс позьö пышйыны. Мыйön вешйис öшинь дорысь часöвöй, Лариса ньöжйöникön восьтіс öшиньсö да уськөдчис овраглань. А сэсянь матын и вөр.

Задание вöлі пöртöма олöмö. И тадзи Лариса пöртіс олöмö уна задание.

1943-öд вося ноябрын Лариса Михеенко пöгибнитіс. Но сійöс эз вунöдны Ленинградса 106 №-а школаысь велöдчысьяс. Тайö школаас öти класс öдзöсын öшалö гижöд:

«Тані велöдчис повтöм партизанка Лариса Михеенко».

*Н. Надеждина* серги.

Кы в ъ я с: *Печенево, эмöсь-ö, изба-читальня, асъядор.*

#### **План.**

1. Ларисаöс суис война.
2. Нывка лои партизанкаөн.
3. Ларисалы сетöны задание.
4. Сійöс кутöны немецъяс.
5. Партизанка пышйö.
6. Ларисаöс эз вунöдны.

#### **Задание.**

Асланыд изложениеö пыртöй татшöм наречиеяс: **войбыд, вөйдөр, асъядор, ньöжйöник.**

#### **Салдат сулаліс пост вылын.**

Тайö вöлі кöдзыд тöвся войö. Салдат Николай Черных служитіс Сöветской Армияын. Буретш тайö войнас Николай вöлі нарядын. Друг сійö казяліс неылысь би

югөр. Сэк жө кыліс тревога шы. И вот кок йылынось нин став салдатыяс.

Сотчис детскöй сад. Друг öти öшинь весьтысь Николай аддзис нывбабаөс. Николай чепөсйис би пытшкө. Нывбаба öдва сулаліс кок йылас öдзөс көсяк бердө нөрөвтчөмөн. Öти здук — и сійö вермас усьны. Николай кватитіс сійөс да уськөдчис öшиньяль.

Со и öшинь. Тані абу нин жар. Николай мыччө нывбабаөс ывлаын сулалысь йөзлы. Черных көсйö нин вөлі чеччыштны муө. Тайö здукас сійö кыліс:

— Сэні вермасны лоны челядь!

Тайөс кылөм бөрын Николай бөр чепөсйис би пытшкө. И вот тайö здукас кссис керка вевт...

Николай Черныхлы недыр нин коли служитны. Сійö көсйис лоны строительөн, унатор йылысь мөвпаліс, но эз удит вөчны.

Но Николай Черных вөчис унджык: подвиг.

*«Известия»* газетысь.

К ы в ъ я с: *нарядын* — тані: дежуритіс; *неылысь*, *керка вевт*, *нывбаба*, *неуна*, *унатор*.

План.

1. Николай Черных нарядын.
2. Сотчө детскöй сад.
3. Николай спаситө нывбабаөс.
4. Николай Черныхлөн подвиг.

## Виктор Иванович Лобанов — Сөветскöй Союза Герой.

1943-өд вося сөр арын мян армия лөсьөдчө вөлі вуджны Днепр ю. Сэки Виктор Иванович Лобановлы вөлі сөмын на дас көкъямыс арөс. А сійö нин куимысь вуджавліс Днепр ю.

Первойсө сылы ковмис вуджлыны сы могысь, медым мөдар берегас вуджөдны секретнөй пакет. Вуджис луннас. Сы юр весьтөд дорыв лэбисны фашистскöй пуляяс. Ранитчис кокыс, но век жө мөдар берегөдз воөдчис.

Тайö документас вөлі гижөма сы йылысь, мый регыд заводитчас штурм, мый батальонлы колө лөсьөдчыны сы кежлө.

Мөд лун асывнас сылы бара ковмис вуджны мөдар берегас, сы вөсна мый сэні вөлі сөмын дас сизим морт.

Луннас найо вѳлі атакуйтѳны врагѳс вит-ѳ-квайтысь. Кор комбат сѳѳкыда ранитчис, командуйтны кутіс Лобанов. Сѳѳкыд тыш бѳрын нѳльѳд сутки кежлѳ коли сѳмын квайт морт. А регыд и воис отсѳг.

Виктор Иванович Лобановлы сетісны Сѳветскѳй Союза Геройлысь ним.

Та бѳрын Виктор Лобановлы унаысь на ковмывліс пѳртны олѳмѳ зѳв важнѳй заданиеяс.

*«Красное знамя» газетысь.*

Кы в ѳ я с: *Днепр, дас кѳкѳямыс, дорвыв, штурм, батальон* — некымын рота, *дас сизим, вит-ѳ-квайтысь, комбат* — командир, коді веськѳдлѳ батальонѳн.

#### План.

1. Сѳветскѳй Армия лѳсьѳдчѳ вуджны Днепр ю.
2. Виктор Лобанов куимысь вуджавліс Днепр ю.
3. Виктор Иванович Лобанов — Сѳветскѳй Союза Герой.

#### Связь восстановитѳма.

Великѳй Отечественнѳй война заводитчан первойя луно жѳ Сереговскѳй сов пуан завода рабочѳй Павел Ешкилев муніс фронт вылѳ. Воуйтис Ленинградскѳй да Волховскѳй фронтѳяс вылын.

1944-ѳд вося гожѳмын заводитчисны чорыд тышѳяс Львов кар дорын. Ѳтчыд, кор фашистѳяс заводитисны контрнаступление, кык подразделение костын ори связь. Дугдывтѳг грымгисны вражескѳй пушкаяс, миномѳтѳяс, стрѳчитисны пулемѳтѳяс. Муыс тіраліс взрывѳясысь, воздухыс тыри тшынон. Кык салдат мунісны восстановитны связь, но кыкнанныс пѳгибнитисны. Сѳки командир мѳдѳдіс Ешкилевѳс.

Сѳѳкыд вѳлі мунны боецлы противник би улын. Но Ешкилев кыссис пыр водзѳ и водзѳ. И вот аддзис проводлысь орѳминсѳ. А снаряджѳяс да минаяс взрывайтчисны пыр матынджык и матынджык. Друг Ешкилевлы веськыд сояс веськаліс пуля. Сійѳ кыліс, кыдзи визувтѳ вир. Но эз сувт, кыссис водзѳ. Содтис кабель, йитис, вывсѳяныыс гартис изоляционнѳй лентаѳн. И связь лои восстановитѳма. Провод кузя лѳбисны командалѳн кывѳяс, а Ешкилев воштис садьсѳ. Воис садѳяс сѳк, кор сійѳс кутисны кыскыны плащ-палатка вылын санитарѳяс.

Тайо подвигсыыс Ешкилевос наградитисны «Слава» орденон.

«Войвыз кодзув» журналысь.

Кы въяс: *контрнаступление, восстановитны — тані: проводъяс йитны; изоляционнõй лента, подразделение.*

**План.**

1. Львов кар дорын тыш.
2. Подразделениеяс костын ори связь.
3. Пõгибнитисны кык боец.
4. Ешкилев лосьодõ связь.

## Максимка.

Максимкаос примитисны партизанскõй отрядõ. Сийõ чайтис, мый сылы пырысьтõм-пыр сетасны пулемёт. Но партизанон лоны, вõлõмкõ, абу кокни.

Пõшти быд вой партизанъяс ветлõны походõ. Мунõ тшõtш и Максимка, нуõ пулемётнõй лента да ранитчõм боецлысь винтовкасõ. А луннас боевõй учёба. Велõдчõ лыйсьыны автоматысь, тõдмасьõ вражескõй оружиеон. Но детинкалы окота воюйтны. А сийõс оз босьтны — ичõt на. Обиднõ детинкалы.

Отчyd войнас партизанъяс уськõдчисны фашистскõй войска вылõ. Враг первойсõ лыйсис воча, а сэссия кутис пышйыны. Муын куйлысь партизанъяс вомон друг чеччыштис вõв. Вõв вылас пукалис ичõtик морт. Верзьõма морт тõвзыштис вõрлань. Вõли пемыд на, и некод эз тõд Максимкаос.

Вõр дорын сяркнитис пулемёт, а сэссия ставыс лõнис.

Недыр мысти партизанъяс бара аддзисны верзьõмаос. Верзьõма водзын восьлалисны куим фашист.

— Примитõй пленнõйясõс, — кылисны партизанъяс детинкалысь лэчyd гõлõссõ.

Во мысти Максимкалы сетисны оружие: сылы тыри дас нель арõс.

А. Жариков.

Кы въяс: *шутьлялõ, сяркнитис, недыр мысти, пемыд на, некод.*

**План.**

1. Абу кокни лоны партизанон.
2. Максимка отсасьõ партизанскõй отрядын.

3. Детинка кутö куим фашистöс.
4. Максимкалы сетисны оружие.

### *Задание.*

Изложение аныд пыртöй кывбöра существительнойяс: партизанъяс вомöн, вöв вылын, вөр дорын.

## Том партизанъяс.

Фашистъяс пырисны сиктö. Сэни некод эз вöв. Сиктса йöз муномаöсь вөрö. Немецкöй салдатъяс пырисны керкаясö.

Но муртса пемдыштіс — кыліс лыйсьöм шы. Салдатъяс вайöдісны офицер дорö партизанöс. Тайö вöлі лöz дөрöма ар дас неля детинка. Детинка повтөг видзöдіс офицер вылö. Дыр мучитісны сійöс фашистъяс, но детинка нинöм эз висьтав. Асывнас том партизанöс лыйлісны.

Войнас партизанъяс взорвитісны фашистъяслысь складъяс. А асывнас чуймöм офицер водзын бара сулаліс лöz дөрöма детинка, кодöс тöрыт лыйлісны.

Офицер лёкысь горöдіс:

— Öшöдны, пырысьтöм-пыр жö öшöдны!

Детинкаöс öшöдісны.

Эз удайтчы узыны фашистъяслы и коймöд войсö. Взорвитісны партизанъяс гитлеровскöй комендатура, а фашистскöй офицерöс босьтісны пленö да нуöдісны партизанскöй лагерö.

Кор разисны офицерлысь синъяссö, сійö адзис олöма партизанöс, а сыкөд орччөн... лöz дөрöма детинкаöс.

Фашист бледöдіс. Сійö лэдзчысис пидзöс вылас да йöй моз горöдіс:

— Ме ёра тэнö, Гитлер! Тэ ыстін миянöс странаö, кöні йöзыс бөр ловзьöны...

Переводчик висьталіс олöма партизанлы, мый йылысь горзіс офицер.

Партизан шуис:

— Висьтав сылы: ме бать сійö кык детинкаыслөн, кодъясöс сійö лыйліс тöрыт да voidöрлун. А öні сы водзын сулалö коймöд пийй.

*К. Курашкевич.*

### **План.**

1. Сиктын фашистъяс.
2. Найö лыйлöны лöz дөрöма детинкаöс.

3. Немецкӱй офицер водзын бара сулалӱ лӱз дӱрӱма детинка.
4. Фашистскӱй офицер партизанскӱй отрядын.
5. Кодъяс вӱлӱмаӱсь лӱз дӱрӱма детинкаясъ?

### **Задание.**

Изложениеаныд пыртӱй веськыд сӱрниа предложениеяс.

## Герой нимӱн.

Тайӱ вӱлӱ выль волю паныда лунӱ. Коля Емельянов да Жора Мальцев ветлисны орчча колхозӱ видлыны висъысь ӱртсӱ. Найӱ нуисны выль вося пӱдаркияс. Бӱрсӱ локтигӱн тӱрмасисны школаӱ. Колӱ вӱлӱ ӱшӱдны стенгазета да гажӱдны ӱлка.

— Кӱдзыд. Тӱлыс кок йывсыйд уськӱдӱ. Мед эськӱ пурга эз ло...— шуис Жора.

Детинкаяс мӱдӱдчисны тӱрыбджыка.

Пургаыс суис найӱс ыб вылын. Тӱлыс шутьялис, омьялис, гартис лымсӱ. Дженъыдик тӱвся лун помасис, пемдӱс. Детинкаяс ылалисны туйысь.

ӱни найӱ мунисны сьӱдас, нинӱм эз аддзыны водзвылысь, вӱйласисны тола пиӱ. Лӱчыд тӱв сотис чужӱмьяссӱ. Жоралӱн кынмисны кокъясыс, сийӱ ӱдва осьлалис. Тӱв ныр уськӱдис сийӱс кок йывсыйс. Коля чеччӱдис Жораӱс, но Жора бара уси. Коля кутис кыскыны сийӱс. Жора муртса кывмӱн шуис:

— Ог вермы... мун... ӱтнад...

Друг Коля син водзын быттьӱ вуджӱртис кодлӱнкӱ мужественнӱй чужӱмыс. Сылы тӱд вылас уси лым вывтӱ кысыйсь раненӱй морт. Коля матыстчис Жора дӱнӱ да скӱра горӱдис:

— Жора... чеччы! Думаышт Мересьев йылысь.

Жора осьтис синъяссӱ да видзӱдлис Коля вылӱ. Зӱвтис медбӱръя вынъяссӱ да чеччис.

ӱни найӱ кыкнанныс аддзисны лым вывтӱ кысыйсь геройӱс. И мунисны водзӱ турӱблы паныд — олӱмлань.

А сикт дорын вуджрасисны электрическӱй бияс. Тайӱ пионеръяс петӱмаӱсь корсыны ӱртъяссӱ.

В. Осеева серги

Кы в ъ я с: тӱв ныр, вуджӱртис, кодлӱнкӱ, кыкнанныс.

### **План.**

1. Коля да Жора висыйсь ӱрт ордын.
2. Заводитчӱ пурга.

3. Жора петіс эбӱссыс.
4. Отсаліс геройлӱн подвигыс.

### *Задание.*

Асланыд изложениеӱ пыртӱй однороднӱй членъяса предложениеяс: Тӱлыс шутъяліс, омляліс, гартіс лымсӱ. Жора восьтіс синъяссӱ да видзӱдліс Коля вылӱ.

## Дозорыӱ.

Талун налы — Игорлы, Санялы да Сенялы колӱ вӱлі мунны караулитчыны колхознӱй му вылӱ.

Бӱръя каднас колхозникъяс казялісны нянь новлӱм — быдмысь сюсӱ шырӱны, чумалиясысь шырӱны. А кодъяс? Кодъяслӱн лыбӱ кыыс?

Паськыдӱс колхознӱй муяс. Гӱгӱр шы ни тӱв, бытӱо кулӱма тани ывла вылыс.

Куим пионер да Вьюн разӱдчыласны, кытшовтасны да бӱр ӱтлаасысны. Пуксыыласны чумали дорӱ, сӱрни-тыштасны да бара чеччасны кытшовтны.

Игорь да Саня мунісны ва дор пӱлӱн, а Вьюн да Сеня — Катша мыльклань.

Друг Вьюн сувтіс. Тадзсӱ сійӱ сувтлывлӱ, кор казялас кутшӱмкӱ зверӱс либӱ мыйкӱ лӱктор.

Вьюн дугдіс легӱдны бӱжсӱ, чошкӱдіс пельяссӱ. Сеня кыын кӱвӱыс зӱлаліс — Вьюн лӱсӱдчис чепӱсйыны.

Чумалисянь чумалиӱ котӱртышталӱны Сеня да Вьюн.

И друг водзвылын чепӱсйис кык морт вуджӱр. Копыртчыштӱмӱн мунӱны, но тӱдчӱ, ӱтиыс кузь тушаа, а мӱдыс ляпкыдик. Кыкнанныслӱн мышканыс мыйкӱ эм.

Гусясысыяс, мыйӱн казялісны понйӱс, бытӱо петшӱр вылӱ тальчисны. Ичӱтджык тушааыс заводитіс пышйыны. Мӱдыс, кузьыс, тшӱтш жӱ ӱдзӱдчис. Но мыйла сійӱ чотӱ?

Котӱртан статьис серти, туша мыгӱрыс серти Сенялы кажитчис зӱв тӱдсаӱн. Бать?..

— Бать! — прамӱя думышттӱг горӱдсис Сенялӱн.

— Бать, сувт!..

Но мыйла нӱ, бать кӱ, оз сувт?

Тадзи найӱ котӱртісны му помӱдз. Воис шор, а сӱні, потшӱс саяс, сӱн.

Батьыс воис потшӱс дорӱ, лӱдзис мышсыс мешӱксӱ, кутіс вуджны потшӱс вомӱн.

Сеня матыстчис потшӱс дорӱ.

— Тэ нӧ мый тани вӧчан, бать? Тэ гусясян! Тэ — вӧр!  
Сенялӧн юр вежӧрыс друг кутіс путкыльтчыны, син  
водзыс руалис.

Кыліс на ещӧ Вьюнлысь лӧкысь увтӧмсӧ. Сэсся и  
Вьюн дугдіс эргыны.

— Виа татчӧ!..

Татшӧм медбӧръя кывъяс кыліс Сеня, водзӧ нинӧм  
нин эз помнит.

*Г. Фёдоров.*

Кывъяс: шы ни тӧв, Катша мыльк, лӧктор, котӧр-  
тан статьяс, Вьюн.

### **Задание.**

Гижӧй дженьдык изложение сетӧм план серти.

### **План.**

1. Кытчӧ мунісны Игорь, Саня да Сеня? Ещӧ коді накӧд вӧлі?
2. Кыдзи найӧ караулитчисны?
3. Коді казяліс гусясьысьясӧс?
4. Коді вӧлӧма ыджыд тушаа чотысь мортыс? Кодъяслы, вӧлӧм,  
сийӧ отсасьӧ?

## **Выль туйяс.**

Миян Коми му ӧні дзикӧдз вежсис. Со кӧть босьтам  
туйяс.

Войдӧр, кытчӧкӧ кӧ мӧдӧдчан гожӧмын, лоӧ вӧлі  
мунны подӧн либӧ верзьӧмӧн. Некутшӧм бур туй эз вӧв.  
А ӧні? Республиканымӧс ӧтар помсянныс мӧдар помӧдзыс  
юковтіс Севернӧй кӧрт туй. Йитчис странаса кӧрт туйкӧд  
Сыктывкар столицаным. Нюжӧдӧма кӧрт туйяс Микунь-  
сянь Косланӧ да Ухтасянь Троицко-Печорскӧ, Сынясянь  
Усинскӧ.

А коді ӧні оз журъяв-ветлӧдлы автомобильнӧй туй-  
ясӧд? Республикаын медся тӧдчана туйясӧн лоӧны:  
Сыктывкар — Мураши, Сыктывкар — Железнодорожный,  
Сыктывкар — Усть-Кулом, Ухта — Троицко-Печорск.  
Машинаяс тӧвзьӧны татшӧм туй кузяыс ньӧвъяс моз.

И, дерт нин, оз позь не казтыштны воздушнӧй тран-  
спорт йылысь. Сыктывкар, Ухта, Воркута, Москва, Ле-  
нинград, Сочи да странаса мукӧд каръяс костын лӧба-  
лӧны гырысь самолӧтъяс. Сыктывкар йитчӧма воздушнӧй  
туйясӧн республикаса став каръяскӧд да районъяскӧд.

*«Войвыв кодзув» журналысь.*

Кы в ъ я с: журъяв-ветлӧдлы, ньӧв моз, некутшӧм, ӧтпырйӧ, Троицко-Печорск, кӧрт туй.

### Задание.

Гижӧмӧн ӧвтитӧй татшӧм вопросъяс вылӧ:

1. Кутшӧмӧсь водзті вӧліны туйясыс Коми муын?
2. Кутшӧм каръяс да сиктъяс ӧні йитчӧмаӧсь кӧрт туйясӧн?
3. Кутшӧм автомобильной туйяс стрӧитӧма республикаын?
4. Кутшӧм самолётъяс лэбалӧны республикаса каръяссянь миян странаसा гырысь каръясӧдз, районса центръясӧдз?

### Зэр.

Мича поводдяыс быттьӧ эз и вӧв. Виччысьтӧг кыптис тӧв. Сійӧ скӧра котраліс посёлокса уличаясӧд, гартис, кояліс кос лыа, тшын моз лэптис муысь буссӧ.

Посёлок сайсянь мыччысис ыджыд съӧд кымӧр. Тӧв нырыс сэк кості уськӧдчис нин паськыд Эжва вылӧ, ас бӧрсяыс колис посныдик серъяс, тшупӧдъяс. Берег пӧлӧн сулалысь пуяс садьмисны, заводитисны копрасыны. Кузь ныра номъясӧс сӧмын нинӧм эз повзьӧд, зыньгисны, вӧтлысисны йӧз бӧрся.

Кымӧр матыстчис и матыстчис, сайӧдіс щондісӧ, пискӧдчис посёлок дорӧ. Небесаыс вочасӧн пемдіс.

Друг гымыштіс — югнитліс гӧрд билӧн кузь бӧж, сӧсся шковмуні, дрӧгнитис вӧрыс и ваыс.

Зэр войтъяс варова таркӧдчисны шиферӧн вевттьӧм керка вевтъяс вылын.

Туйяс небзисны, кӧтасисны. Гӧпъясын да гуранъясын гӧвкъяліс ва.

А недыр мысти бара пуксис мича поводдя, быттьӧ эз и зэрлы.

И. Коданёв серти.

Кы в ъ я с: тшын моз, сэк кості, тшупӧдъяс, зыньгисны, матыстчис, шковмуні, гӧвкъяліс.

### План.

1. Кыптис тӧв.
2. Пуяс.
3. Зэр.
4. Бара мича поводдя.

### Задание.

Думыштöй да висьталöй предложениея: шковмуні, гөвкъяліс, югнитіс глаголъясөн.

## Пышкой.

Оліс-выліс виж вом дора пышкой. Шуисны сійöс Пудикөн. Оліс сійö пывсян öшинь курич вылын, öшинь юрйылас, шоньд позйын.

Лэбавны сійö эз на куж, но бордъяснас öвтчывліс нин да пыр видзöдчис позсяньыс.

— Чив-чив?— юавліс сылысь пышкой-мам.

Пышкой пыркнитльвліс бордъяссö, видзöдльвліс муö.

Воывліс ай пышкой, вайльвліс Пудиклы гагъясöс. А Пудик ньылавліс гагъясöс да пыр мыччасис позсяньыс, ставсö видзöдіс.

Тадзи муніс кадыс, а бордъясыс эз на быдмыны.

Öтчьд кутіс пöльтны төв. Пудик пукаліс дзик дорыш вылас, дай уси позсьыс. Мамыс лэбзис сы бөрся, а виж бугыля гөрд кань сэні нин вöлі. Повзис Пудик, шевгöдіс бордъяссö, довъялö вöсни кокъяс йылас да чивзö. Мамыс тойлалö сійöс бокö, гöныс сылөн сувтöма, вомсö паськөдöма, — каньлы синмас метитчö.

Повзьöмыс кыпöдіс пышкойпиöс муысь. Сійö чеччыштіс, мөдіс бордъяснас öвтчыны — шыв-шыв — дай öшинь вылö.

Сэки и мамыс воис, бөжтөм, но зэв нимкодь. Пуксис сыкөд орччөн, кокыштіс сійöс балябөжас да шуис:

— Чив-чив.

А кань пукалö муын, пышкой-мамлысь гөнсö лапасьыс весалö. Видзöдö на вылö да нявзö.

Ставыс зэв бура помасис, вунöдны кö сы йылысь, мый мамыс бөжтөг коли.

*М. Горький серти.*

Кы в ъ я с: *оліс-выліс, пышкой-мам, ай пышкой, пышкойпи, шыв-шыв, балябөж, виж вом дор.*

### План.

1. Көні оліс Пудик?
2. Мый сійö вöчльвліс?
3. Мыйла Пудик уси позсьыс?
4. Мый лон пышкой-мамкөд?

### **Задание.**

Вопросъяс отсөгөн вөчөй дженьыд пересказ да быд юкөнлы сетөй ним.

## **Сөвман туй визъяс.**

Тимано-Печорскöй территориальнöй комплекс лоö кö-тыртöма Коми республикаын да Ненецкöй автономнöй округын. Экономика, география да мупытшкөсса озыр-лунъяс боксянь тайö местаыс зэв лöсялана, медым тані сөвмөдны ыджыдысь-ыджыд овмөс. Тані эм уна из шом, титан, боксит да сов. Эм позянлун корсьны кöрт. Колана мында эм вөр.

Öнi урчитöма нин, мый природнöй ресурсъяссö лоö сөвмөдöма куим боксянь. Медвойдөр кутасны сөвмыны нефть, газ, из шом перйöм, энергетика. Сэсса кутасны водзö пöрöдны вөр да сийöс перерабатывайтны. Медбö-рын заводитасны перйыны титановöй рудаяс, бокситъяс, калийнöй совъяс.

*«Войвыв кодзув» журналысь.*

### **Задание.**

Лыддьöй текстё. Висьталöй сылысь содержанияесö вопросъяс серти:

1. Мый сэтшöм Тимано-Печорскöй территориальнöй комплексыс?
2. Кутшöм ногөн кутасны сөвмыны Коми республикалөн да Ненецкöй автономнöй округлөн природнöй ресурсъяссыс?

## **Сьöла бöрся.**

Луныс сулаліс гудыр да зэра. Вель уна километр нин восьлалі пищальöн тöдса вөръясöд, а вещьөвöй мешöкöй дзик на тыртöм. Зэра поводдянад и пöткаясыдлы абу окота лэбавны.

Рытьявылыс вои кыддза раскö. Гөгөр сулалісны еджыд кока пуяс. Зэрыс найöс удитöма нин мыськавны. Бөрйи орччөн сулалысь кык кыз, пукси шойччыны. Перйи зептысь ыргөн чипсан, некымынысь чипöсті.

Эг на удит босьтны киö пищальöс, кызди кыліс пöт-калөн лэбзьöм шы. Месянь зэв матö му вылö пуксис сьöла. Сийö видзöдліс гөгөр, быттö кöсйис корсьны ас-сьыс пöдругасö, сэсса заводитіс кокавны пув тусьяс. Кыштас, котöртыштас водзö. Бара кокыштас, бара котöр-тыштас.

Со съола дзик нин ме діныи. Зэв бура аддза сылысь ичөтик гөгрөс синъяссө, дженьыдик гөрба нырсө, тэрыба котралысь вöсньыдик кокъяссө, голя увсьыс сьод пассө, кутшөмъяс овлоны сөмын ай сьөлаяслөн.

Пукала да любуйтча збой пөткаөн, весиг вунөді пищаль йылысь. Дыр на, колөкө, нимкодяси, но сьөла казяліс менө, өдийө лэбзис кызды вылө.

Позис, дерт, сійөс лыины, но кийө эз лыб тайөс вөчы. Вывті нин кажитчис мичаөн, донаөн.

И ог жалит, мед лэбалө.

*И. Коданёв.*

Кы в ъ я с: *пищаль, кыддза, зеп, қолөкө.*

### **Заданиеяс.**

1. Изложениесө гижөй коймөд морт нимсянь сетөм план серти:

#### **План.**

- 1) Кутшөм вөлі поводдяяс?
  - 2) Мый вөчис вөралысь кыддза раскын?
  - 3) Мыйла сы дорө пуксис сьөла?
  - 4) Кутшөмджык сійө вөлі?
  - 5) Мыйла вөралысь эз лый сьөласө?
2. Донъялөй вөралысьлысь поступоксө. А кызди эськө ті вөчинныд?

### **Ягын.**

Лесник Петрович — ар ветымын вита, тэрыб сёрниа косіник морт. Тулыснас сійө кытшовтіс ассьыс ыджыд участоксө. Ставыс сэні төдса, гөгөрвоана, быттьө оз ягті мун, а гуляйтө аслас керка гөгөрыс.

Вель дыр нин муніс лесник. А восьлавны колө на ылөдз. Радейтө сійө ветлөдлыны подөн. Неыджыд шор вуджөм бөрын воис кос ягө.

Поводдяяс вөлі лөнь да шоньд. Сынөдыс сөстөм. Лунтыр лолалан — он пөт. Яг вомөн нюжөдчөма уна рөма мегыр кодь өшкамөшка. Оти помнас сійө мыджсьөма Эжваө, быттьө сэтысь васө юө, мөднас — видзьяс вылө.

Мичаөсь тані местаясыс. Тані пыр кос, весиг арся зэръяс бөрын. Небыдик яла вылын быдмөны вöсньыдик пожөмъяс. Нырад век өвтө сир дук. Яг шөрөдыс лун и вой тельгө-визувтө ичөтик варов шор. Ваыс сэні кодзыд-кодзыд, тувччан кө көмтөг — сотыштас кокъястө.

*И. Коданёв.*

Кы въяс: ар ветымын вита, быттьö, суні-воши, лунтыр, мегыр кодъ öшкамöшка, сир дук, тельгö-визувтö, кöдзыд-кöдзыд.

План.

1. Коді сэтшöм Петровичыс?
2. Кутшöм вöлі поводдяыс?
3. Кутшöм вöлі ягыс?

**Задание.**

Пыртöй изложениеаныд татшöм предложение: Яг вомöн нюжöдчöма уна рöма мегыр кодъ öшкамöшка.

## Сьöд ты дорын.

Унаысь кевмысис Миша, медым Олег босьтис сійöс аскöдыс вөрö. Дырөн вокыслөн небзис жö сьöлöмыс.

Кык вок лунтыр ветлöдлісны вөрöд, чегъялісны пач чышкыны ньыв лыс, вундалісны рос вöчны ньөр. Мамыс, дерт, таысь ошкыны кутас.

Миша важөн мудзис, но терпитис, норасыны эз лысьт.

А вöрын сэтшöм гажа. Мыйсö сöмын эз аддзывны: кывзісны сьöлалалысь чипсöмсö, видзöдісны, кызди тар кокаліс кыз гарьяс. Аддзылісны сьöд сизьöс.

Лун шөр бöрын пуксисны шойччыны. Нурьясыштисны. Кутшöм чöскыдөн кажитчис рудзөг нянь да кöдзыд картупель.

Бöрсö найö мөдöдчисны Сьöд ты дорті. Паськыд ты пöшти ставнас нин кыммöма, дзесьсöма йи улö. Сöмын шöрыс ичөтика осьса, сэтысь пуркйö-кайö тшын кодъ ру.

— Кöч! Кöч!

— Чур, ме аддзи!— горзіс Миша.

Кузь пель сэтшöма повзис челядьысь да веськыда тövзис йöрданлань.

— Вöян! Бергöдчы!— шапканас шенасис Олег. Но гөгөрвоас öмöй көчилыд мортыдлысь кывъястö.

И друг лои виччысьтöмтор: повзьöм көч казяліс осьсаинсö, но эз вермы сувтны шылыд йи вылын да шливкнитис йöрданлань. Кöч бузгысис кöдзыд ваö.

— Вöйи-и-и...— горöдіс Миша.

А көч, йисö чегъялігтыр, парсасис, мырсис кайны ваысь, но эз вермы. Недыр мысти сылы удайтчис кыпöдчыны йи вылö. Кöч важөн нин саяліс-воши, а детинкаяс пыр на сулалісны öти местаын.

И. Коданёв.

Кы в ъ я с: лунтыр, ныв, лун шөр, нуръясьыштисны,  
тшын кодъ, йӱрданлань, виччысьтӱмтор.

### План.

1. Кытчӱ мунисны кык вок?
2. Мый найӱ аддзылисны вӱрысь?
3. Кутшӱмджык вӱлі Сьӱд ты?
4. Кодӱс найӱ аддзисны Сьӱд ты дорысь?
5. Кутшӱм виччысьтӱмтор лои вӱрын?

## Кӱрпи.

Куим лун Емеля ветлӱдліс Лыскокод вӱрӱд и дзик  
весь: пьяна кӱр эз шедӱдчы. А сійӱ кӱсйысис висысь-  
Гришуклы судзӱдны вижиник кӱрпиӱс.

Сӱмын нӱльӱд луннас найӱ веськалісны пьяна кӱр-  
кок туй вылӱ.

— Лыско, корсь, донаӱй!

Кӱр важӱн казяліс кыйсьысьӱс, но збоя кыйӱдіс сы-  
лысь быд вӱрзӱм.

«Тайӱ энӱыс ылӱдлӱ менӱ пи дінсьыс»,— мӱвпыштис  
Емеля. Ачыс матыстчис пыр матӱджык и матӱджык.

Старик кӱсйис метитчыны да лыйны, но кӱр виччысь-  
мӱн котӱртыштис некымын воськов да бӱр сувтіс. Емеля  
бара кыссис аслас пищальӱн.

Кӱр пыр ӱтарӱ дзебис кӱрписӱ. Пӱрысь Емеля скӱра-  
ліс да шензис кӱрлӱн збойлун вылӱ.

Воськов комын сайын кымын сулаліс буретш сійӱ-  
вижиник кӱрпийс, код бӱрся Емеля вӱтлысис дзонь куим  
лун. Тайӱ вӱлі мичаник кӱрпи, виж гӱна, вӱсньыдик  
кокъяса. Мича юрыс чатӱртчӱма бӱрвыв.

Кыйсьысь лӱптіс пищаль куруксӱ да метитчис весь-  
кыда юрас дзоляник животнӱйлы. Но тайӱ здукас пӱ-  
рысь кыйсьысьлы син водзас сувтіс, кыдзи кӱр видзис  
кӱрписӱ.

Думыштис да лӱдзис пищальсӱ. Кӱрпи ветлӱдліс  
кустьяс дінті да йирис коръяссӱ. Емеля шутӱвтис, и дзоля  
кӱрпи воши кустьяс пӱвстӱ.

Мӱд луннас Емеля матыстчӱ вӱлі аслас керка дінӱ.

Уськӱдчис сы дінӱ Гриша:

— А... пӱльӱ, вайин кӱрпитӱ?

— Эк, Гришук... Аддзылі... но эг вай. Виж гӱна кӱр-  
пийс, а ныр-вомыс сьӱд. Сулалӱ вӱлі кустьяс дінын да  
коръяссӱ йирӱ. Ме лӱсьӱдчи лыйны, но жалиті ичӱтик

зверёс. Дай мамсö жалиті. Ме шутёвті, а көрпи кызтай лыйыштас кустьяс пöвстö. Пышйис удал кокыд!..

Кор найö водісны узьны, висьысь детинка некымынысь на юалис пöльыслысь көрпи йылысь. А сэсся унмовсис да войбыд вöталіс дзоляник көрпиöс.

*Д. Мамин-Сибиряк серти.*

Кы въяс: *вижиник, көрпи, виччысьöмөн, некымын, збойлун, бөрвыв, дзоляник, ныр-вом.*

### **Задание.**

Коллективнöя лöсьöдöй план да сы серти гижöй дженьыдик изложение. Изложениеаныд пыртöй веськыд сёрниа предложенияс.

## Ме — Чапаев.

Чапаевлөн отряд сулаліс матын сійö сиктсыянысь, көнї вöліны белоказакъяс. Но кор сиктöдз көли километрысь не унджык, матысса мыльк йылын кутісны вуджрасьны вöлаяс. Сап пемыдас он вермы вöлі тöдмавны асланым йöз али абу.

— Стрöйтчöй, лоёй дасьöсь! — ньöжйöник командуйтіс Василий Иванович да уськөдчис водзö.

Кор Чапаев локтіс верзьöмаяс дінö, сійö гөгөрвоис: тайö белöйяс. Найö вöліны Чапаев отрядысь кык пöв унджыкөнöсь. Чапаев эз шöйöвош, лэптис нагансö да горöдіс:

— Ме — Чапаев! Шыблалöй оружитö! Тіянос кытшалöма!

Чапаевецъяс уськөдчисны асланыс командирлы отсөг вылö... Пленö сетчöм белоказакъяс пöвстын вöліны кык офицер. Офицеръяс ордысь сюрины важнöй документъяс: картаяс, приказъяс, донесениеяс.

— Меным буретш тайö ставыс и колö,— офицеръяслысь сумкаяссö босьтігмоз шуис Василий Иванович.

*В. Баныкин.*

Кы въяс: *белоказакъяс, вуджрасьны, ме — Чапаев, эз шöйöвош, босьтігмоз.*

### **План.**

1. Чапаевецъяс сикт дорынöсь.
2. Вуджөръяс.
3. Чапаев ылöдліс белоказакъясöс.
4. Трофейяс.

## Батълөн галстук.

Светланалөн батыс перйис чемоданысь прөстөй, сырйыссьөм помъяса гөрд галстук.

— Тайö галстукыслөн интереснöй история,— шуис батыс.— Кор ме вöлі пионерөн, немецкöй карын Берлинын мунис первойя международнöй пионерскöй слёт. Фашистъяс да полицейскöйяс көсийсны торкны слётсö: куталисны пионеръясöс граница дорын, туйяс вылын. Но слёт век жö чукöртчис. Витсё пионер став свет пасьтасысь чукöртчисны Берлинын, медым висьтавыны, кызди найö верстьö йöзкөд тшöтш тышкасьöны свобода вöсна, войнаны паныд. Миянлы окота вöлі висьтавыны, кызди Советскöй Союзса пионеръяс отсасьöны коммунистъяслы да комсомолецъяслы. Но врагыяс повзисны советскöй пионеръясысь, и миянös эз лэдзны слёт вылö. Кор мукöд странаысса пионеръяс тöдмалисны та йылысь, найö мөдöдалисны асьыныс делегацияяс миянö. Ми тöдмасим накөд, кутим дружитны. Мукöд странаысса пионеръяс вайисны миянлы пöдарок пыдди асьыныс гөрд галстукъяссö. Тайö галстуксö сетис меным öти негр. Сэксянь ме сийös век новли да öни видза.

С. Баруздин.

Кы въяс: *международнöй пионерскöй слёт, верстьö йöз, делегация, сырйыссьөм.*

### План.

1. Прөстөй галстук.
2. Первойя международнöй пионерскöй слёт.
3. Мирса пионеръяслөн делегацияяс СССР-ын.
4. Иностраннöй пионеръяслөн пöдаркияс.

### Задание.

План серти висьталöй статьяыслысь содержаниесö.

## Митипер дед.

Митипер дед радейтö челядьös. Сийö частö висьтавлöналы гражданскöй война йылысь. Со и талун челядь кывзöны сылысь висьтсö.

— Миян полкным сулалис Бадьдор сикт дорын. А сиктас вöлины белогвардеецъяс. Сиктыс мыльк йылын, некысянь сэтчö оз позь матыстчыны. Корис менö полкса

командир да шуо: «Ме косья сетны тэныд задание. Кык лун тани сулалам, а сиктсö ог вермой босьтны. Колчаковецъяс лэптöмаось вичко кёлöкөлняö пулемёт. Ставсö шырöны сэтысянь. Колö мырддыны налысь пулемётсö».

Войнас ме öтнамön мөдöдчи сиктö. Пемыд. Гөгөр шы ни төв. Сиктöдзыс кысси дыр. А вичко дорын часөвöй ветлөдлө öтарö-мөдарö. Гөгöрыс нэмөвöйся кыз топольяс сулалöны. Ме матыстчи топольяс дорö. Видзöда: часөвöйыс ме дорысь омөльдзык, ичөтджык. Ме уськөдчи сы вылö бөрвывсяньыс, тупки вомсö да кыски бокö. Пыри вичкоö. И ньöжйөнник кути кайны пос кузяыс. Сидзи и кайи кёлöкөлняödзыс. Кёлöкөлня пыткас пулемёт сулалö, а сы бокын кык колчаковец куйлöны. Ме найöс кыкнаннысö прикладön кучки.

Ывлаыс дзикöдз нин пемдiс. Но вылисяньыс бура тыдалö, кöни белöйяслөн окопьясыс... И заводити ме найöс шырны. Белöйяс котралöны öтарö-мөдарö. Сэк кости и мян полкным воис. Ена и нöйтiм сэки белöйясöс. Асывнас ми босьтiм Бадьдор сикт.

В. Баталов серти.

Кы в ъ я с: *Бадьдор сикт, некысянь, колчаковецъяс, кёлöкөлня, öтарö-мөдарö, нэмөвöйся, бөрвывсяньыс.*

#### План.

1. Бадьдор сикт белöйяс кыин.
2. Командирлөн задание.
3. Митипер — вичко кёлöкөлня вылын.
4. Бадьдор сикт лон босьтöма.

#### Заданиеяс.

1. Гижöй дженьыд изложение коймод морт нимсянь.
2. Донъялöй Митипер дедлысь поступоксö.

## Будённый йылысь висът.

Öтчид гражданскöй война дырйи туй кузя верзьöмön мунис Будённый ординарецъскöд. Вöли рыт. Пырисны найö хуторö, а сэни белöйяс. Матыстчисны на динö белöйяс.

А Будённый да сылөн ординарецыс вöлины буркааось. Белöйяс эз гөгөрвоны, кодъяс тайö татшöмьясыс: казакъяс али белöйяс, кодъяс буркаяс жö новлöны.

— Мыйла тэнад вöлыдлөн бöжыс тшöтшöдöма, кыдзи будённовскöй вöвъяслөн?

А Будённый малалö вöвсö да шуö:

— Будённовецъяслысь мырддим.

Пуксисны пызан сайö. Ужнайтигөн белöй салдатъяс ошйысисны: «Ок и повтöм Будённыйд! Мый дыра нин сийö миянкöд воютö! Ми Будённыйтö тöдам нин, унаысь нин ськöд паныдасьлим...»

Будённый да сьлөн ординарецыс ещö сёйыштисны дай петисны вöвъяссö видзöдлыны. Видзöдöны: некод матын абу. Чечыштисны вöвъяс вылö да лэбыштисны степö. Воисны асланыс йöз дорö. Дзык пыр жö Будённый нуöдис войскасö хуторö.

Петисны керкаясысь белöйяс, кодi киас пань кутö, кодi улыс белльö кежысь. Кутисны найö водзсасыны, но вöли сёр нин. Будённовецъяс босьтисны найös пленö да сувтöдисны стройö. Видзöдлис на вылö Будённый дай шуис:

— Мыйла пöръясанныд, мый Будённыйös тöданныд.

Видзöдöны найö Будённый вылö да шензöны, öни на öд сийö накöд ужнайтис.

А Будённый аддзö, мый сы водзын сулалисны прöстöй крестьяна, кодъясöс белöйяс мырдөн тшöктисны служитны, да и шуö налы:

— Тiянös, йöйясös, пöрийöдлöны белöй генералъяс. Мунöй гортаныд да белöйяелы сэсся энö нин служитöй. И лэдзис найös гортаныс.

Кы въяс: *верзёмөн, ординарец, хутор, бурка.*

### **Заданиеяс.**

1. Öтветитöй тайö вöпрöсьяс вылö:

- 1) Кыдзи веськалис Будённый белöйяс ордö?
- 2) Гөгөрвоисны-ö белöйяс, мый на ордын Будённый?
- 3) Кутшöм сёрни пансис белöйяс ордын?
- 4) Кыдзи Будённый да ординарецыс бөр пышйисны белöйяс ордысь?
- 5) Кыдзи Будённый да сьлөн ёртъясыс босьтисны белöйясös пленö?
- 6) Мыйла Будённый лэдзис пленнöй белöй салдатъясös?

2. Гижöй изложениесö дженьдöдöмөн сетöм план серти да пыртöй сэтчö веськыд сёрниа предложениеяс.

### **План.**

1. Будённый ординарецыскöд белöйяс ордын.

2. Белёйяс ошйысьоны.
3. Будённый аслас отрядын.
4. Хутор будённовецьяс кийн.

## Повтём партизан.

Гражданской война дырйи Севернэй Кавказса гөраясын лои татшөм случай. Белёйяслөн выныс вөлі ыджыд. Партизанъяс вөліны этшаёнось. Налы ковмис бөрыньтчыны.

Найё шуисны мунны гөраясө. Но белёйяс вөтчисны — сійё и видзөд, суөдасны. А партизанъяслы колө нуны гөраясө семьянысө да скөтнысө. Сэки өти том партизан шуис, медым ставныс найё мунасны, а сійё кольччас да кутас белёйясөс лунтыр, а гашкө, и дырджык.

Партизанъяс ставныс мунисны, а том партизан Данел кольччис.

Векныдык трөпа весьтса скала вылын сулаліс важ башня, көні Данел оліс мамыскөд. Кор партизанъяс мунисны, сійё локтіс мамыс динө да шуис:

— Ми тэкөд, мам, кутам видзны гөраясө туй, огө лэдзөй татчө белёйясөс.

Данел чукөртіс башнясыс став оружиесө. Сюрис куйм винтовка да кык ружье. Вөліны и патронъяс. Сійё сюяліс винтовкаяссө да ружьеяссө башня өшиньясө да зарадиталіс найөс. Сэсся шыясис мамыс динө:

— Мам, ме кута лыйсыны, а тэ ружьеяссө зарадитав.

Регыд трөпа вылын тыдовтчисны белёйяс.

Данел метитчис да лыйис. Сійё лыйліс разнөй өшиньяссянь да щельяссянь, медым кажитчис, мый башняс уна йөз.

Белёйяс заводитісны дугдывтөг лыйсыны. Пуляяс сідзи и шутьялісны.

Данел лыйсис бура. Уна белёйөс сійё виис да ранитіс. Сэки белёйяс кутісны советуйтчыны, мый вөчны водзө. Найё шуисны ыстыны башняө сёрнитчөм вылө оружиетөм мортөс.

И вот Данел аддзө: трөпа кузя башнялань локтө морт.

— Эй,— горзө сійё,— пет кодкө өти, нинөм ог вөч, колө сёрнитчыны!

Данел сувтіс изъяс сайө да юалис:

— Мый колө, мый висьталан?

— Онö кö дугдöй лыйсыны, ми öни жö сувтöдам пушка да тiянöс ставнытö лыйлам...

— Колö думыштны,— шуис Данел.

Вöли рытгорув нин. Данел артыштіс, уна-ö коли патронныс,— патрон вöлі этша.

Сэки Данел горöдіс белöйяслы ассыс условиесö: кор пемдас — ми мунам.

Белöйлы лои нимкодъ, сійö чайтіс, мый партизанъяс повзисны пушкаысь, и радпырысь бөр муніс аслас йöз дінö.

Данел пырис башняö да пыр жö лöсьöдчис мунны гöраясö.

А белöйяс радысла войбыд сулалісны öти местаын. А тайö каднас партизанъяс вöліны ылынöсь нин. Найö лöсьöдчисны выль тышъяс кежлö.

*Н. Тихонов* серти.

Кы втъяс: *Северной Кавказ, лунтыр, щельяс, шутьлялісны, уна-ö, радпырысь.*

### **Заданиеяс.**

1. Текстö висъталöй сетöм план серти.

### **План.**

- 1) Северной Кавказса гöраясын.
  - 2) Том партизан Данел öтнасөн башняын.
  - 3) Белöйяскöд Данеллөн тыш.
  - 4) Белöйяс сёрнитчöны Данелкöд.
  - 5) Партизанъяс ылöдісны белöйясöс.
2. Гижöй выборочной изложение сы йылысь, кызди Данел öтнасөн тышкасьö белöйяскöд.
-



Лия Владимировна Барышева  
и Анна Семеновна Мозымова

*Сборник изложений по коми языку  
для I—III классов*

Редактор *Т. Н. Чукичева.*  
Художественный редактор *В. Б. Осипов.*  
Технический редактор *А. Н. Вишнева.*  
Корректор *Э. С. Греггер.*

ИБ № 696

Сдано в набор 28.12.82. Подписано к печати 10.02.83. Формат 84×108<sup>1</sup>/<sub>32</sub>.  
Бумага № 3. Гарнитура «Литературная». Печать высокая. Усл. печ.  
л. 5,88; усл. кр.-отт. 6,09; уч.-изд. л. 5,06. Тираж 500. Заказ № 95. Це-  
на 15 коп. Коми книжное издательство. 167610, г. Сыктывкар, ул. Карла  
Маркса, 229.

Республиканская типография Государственного комитета Коми АССР  
по делам издательств, полиграфии и книжной торговли. 167610.  
г. Сыктывкар, ул. Коммунистическая, 20а.



15 көп.

1-29740

~~29020~~

8 июл 1983